

**Lologena Wo Kiena Ne
Yesu Kristo Naña
LUK
Siriyuia
Visayuena Na Tusi Nene**

Kompasinen suniena plas na tusi nini

Tusi nini, “*Lologena Wo Kiena Ne Yesu Kristo Naña Luk Naga Siriyuia*”, naga pisayu Yesu sape naga yaru naña Ntewa pisayu pa lus nae Israel lala nanua rui, sape yoko naga imin tamalia la, a vena tamaliena yeririna makega na yomarava. Luk sirilua pa e kiena tusi nini, sape Yesu nene, Ninuna Ntewa namava ke narui pio naga vena “visawal kiena lologena wo va la naña limala korena ga.” Ana komin sur ne nanene, lologena wo naña Luk siriyuia, pulen suniena la naña kilologia sape Ntewa sinena miyee yaru la naña asike e nalogeviowaena.

Suri tañena la moki naña toñal e tusi nini, nane suniena kiena yaru la naña amloge po pona akekara. Suniena la moki na sanene sike e marana na keviu taaga [1] naña pisawal sape yoko Yesu imi, a e marana na keviu lua [2] naña pisawal sanape naña Yesu paeme.

A e mña e marana na maro, yaru la akekara pañisi kome naña Yesu mal sina, a pñasuñe si pa mae peni.

Yaru naña siri tusi nini naga siri si tusi tañena tai naña kiena kia “*Yumñaena Kiena Li Nalologena*”

Lala". E tusi na lua nene, naga pisawal suniena lala naña moluwe marea e pogos naña Yesu pa mae peni. Suniena la nene pisa lologia sape yaru la naña amlelaga e Yesu Kristo apimi moki liluwe, ana asuñña apa apisawal kiela lelagaena nene e yo tañena lala.

Tusi nini "*Lologena Wo Kiena Ne Yesu Kristo Naña Luk Siriyuia*", komsus orelu sike ea. E kompasnena na lua, amio na orai nena, pisawal suniena lañas la naña sike e ga e tusi nini, ana pe su re e tusi tañena lala naña Matiu, Mak a Yoane la telu asiriyuia.

Naga suniena la naña pisayu navisi lala naña amiyau, a suniena naña pisayu yaru na visuaren sipsip lala naña apimin apisu Yesu e pogos naña naga paeme, amio mēna suniena naña pisayu pogos naña Yesu pa e yuñña mēna Ntewa pogos naña naga pe yaru viu ke ga wa, ñakaiwa na yaru wo nae Samaria, a ñakaiwa na ninis naña kovio.

Pupia suri mēna lañasia naña Luk pisayu kañarania e tusi nini, naga sanini. Naga pisayu lotena, a Ninuna Wa, a yo kiena sira lala loyūña e yuññaena kiena Yesu, a pisayu naña Ntewa kilia viyewo ita, kilia warplan kieta milamulena viowa lala.

Kompasnen tusi la nini

Visena na sumo 1:1—4

Yoane Nakeena amio Yesu lalua apaeme, a lalua akapuru 1:5—2:52

Yuññaena kiena Yoane Nakeena 3:1-20

Yoane kee Yesu, a Yermare tañalia 3:21—4:13

Yesu kila kiena yuũaena e lepas nae Kalele
 4:14—9:50
 Yesu moluwe Kalele pa ma Yerusalem 9:51—
 9:27
 Legiena maro naũa Yesu kila kiena yuũaena
 garu Yerusalem a e yo la naũa lavisin
 Yerusalem 19:28—23:56
 Yesu mali sina a kiena nalogena la apisu naga
 24:1-53

Visen ẽesia

¹ Inu Luk nesiriyu suniena nini pan ko, Yerkawa Tiopilas. Sa naũa ko okilia ẽisi rui, yaru la moki liu naũa asiri suniena na suri la nene komẽas rui naũa aũaalũalivin ita e kas laũas ẽaro rui. ² Suri la nene, ita pe tepisu mesmesun re e kilamarata poli, ana la naũa apisuia, siar e purẽesa, a la na sa naũa la ape li Nalologena Wo ẽesia, la ke narui la apisawal ruru lelein pimi pan ita. ³ Ana siar nakonua rui, nesuũa nepisusu ruru ke mũaki taũana la naũa la asiria, a nesuũa nemla ke visena na suri la nene, ana nepisu sane popon visae nekilali nela sunien taũana la nene komẽasa, nesirikolia vena aim sane tus wo tai naũa taveve ruru narin mrapa lala na suniena nene. ⁴ A nane nesiri sike na rui, a nekekarana naũa neligan imi ve kiũa, vena ouloyuia, okilia ovisu kilalea sane suri la naũa osuũa omloge ke rui, la amesmes ga a ape lelaga, la sa naũa kiau tus nini pisawalia.

Navisi pimi pisawal pa Sakaraea pisape yoko naga war Yoane Nakeena

⁵ Suniena nena naga siar sanini, sape: E pogos naþa Ðarin Suþe Erot naga pe suþen ke lepas nae Yutea, yaru wa tai, naga pe namratava kiena ne Apisa, a naga þere sira tai naþa naga mena molue kome lus kiena ne yaru wa lala, nane e namratava kiena yermarua Eron, wenla Mosis nanua sumo ne. Yaru nene kiena kia Sakaraea, a wona kiena kia Lesipet. ⁶ Ana lalua nene kiela malena mesmesu po paþisi e navisuen a kiena ne Ntewa, naþa la asuma amlogear kiena navisaluaena lala, a asuma akila ke þelaga la naþa mesmes silaga, pe akilalu re tai poli. ⁷ Ana suri ga tai, lalua pe narila re tai poli, komin sira naþa Lesipet naga pe lumaluma ga, a nanagane lalua apimi ape yermarua laa rui.

⁸ Ana e pogos tai, pe pog na þegas kiena ne Sakaraea naþa monar ava akila kuþaþaena e Yuma Wa mana ne Ntewa, sa naþa þegas tai kila e wik tai, þegas tai kila e wik tai. ⁹ A silaga, pogos naþa akila sanene, la monar akila sa naþa amlil mapila, vena alual yaru ai naþa yoko naga kila pupia yumaena navaen loyumua e Yo Wa na Yuma Wa nene, vena sikapen ponotaninu na wonta naþa sike ne. Ana e poglis nene akila sanene, a kia kiena ne Sakaraea naga pa metava, asape naga narui naþa va kila yumaena nene. ¹⁰ Ana e nena e pogos na sikapen ponotaninu nene, naga pa loyumua vena va kila, a pupia þina na yeririna lala asike vanua, asuma amlen maga.

¹¹ Ana pog naþa Sakaraea pa loyumua, ana milan kare navisi tai kiena ne Ntewa naþa malivinia, sumal ga sike e lepas nen wonta

nařani lepas na řamarua. ¹² Ana pogos nařa Sakaraea pisa navisi nařani, naga mninue kare narui sape ařa kila ve sanape na wa, naga marau pařisi. ¹³ Ana navisi nene pisa pania, pisape "Sakaraea, ve omarau manene re. In na nepimin ga nesape nevisawal van ko, Ntewa mloge kiamiu leniena amlua rui, a yoko woma Lesipet, řisi na war naruma na moře tai, a pogos nařa vaeme, yoko oligan kiena kia Yoane.

¹⁴ "Pogos nařa vaeme, yoko akekara vařisi, aloge wo, ana ve amiu re ga, ana yaru tařena mrena lala akekara vařisi.

¹⁵ "Sisi nene, yoko imi ve yerkawa tai kiena ne Ntewa, a naga sane ve yaru wa tai, řisi na naga valia kuruta a wii marera mrena lala. Siar e pog nařa naga teke e lořeřena anena wa, ana yoko Ninuna Wa ulen naga vařisi. ¹⁶ Yoko naga ve yaru tai nařa řisi na vilon le Israel la ve moki awasuře la si puna Ntewa na Mava, kiela Suře. ¹⁷ Yoko avisu nařa ninuna a namareraena nařa se e Navisawalena Elaisa sumo sike sina ga e naga maran ve taaga, komin nařa naga imi sumo, vena visawal visave ve ve piavi re Navisaarena naga imi raunia. Yoko naga vilon sinen ata lala vena asitomyu ruru sina ga narila lala, a yoko vilon sitomena kiena ne li nakilaroen navisaluaena lala vena ataveve si řelaga nařa pe manmarua a mesmes ruruia. E mrapa ne la nanene narui, řisi na naga kila ruru řegas nen yeririna la tai va Ntewa, vena asumate naga imi malivin la."

¹⁸ Ana Sakaraea mloge visena la nene, ana pisa

pa navisi nene, pisape “Ei, ve ovisa re sanene. Tařatete ve sanene, komin imimi lua na mrae pito tano rui.”

¹⁹ Ana navisi nařani pisa ke sina pania, pisape “Peraga, yoko ve sa ga nene. In na Navisi Kařriel nini, nařa silaga nesuńal luen ga nesike e marana Ntewa vena nowar kiena visena, ana naga mligan inu nepim puńa vena nevisawal lologena wo nini van ko. ²⁰ Ana pogos nařa nepisawal pan ko, ko na pe omlelaga re e poli, ana nevisa van ko sanini, yoko ove puru, ana řisi na osumńa ga sanene imi tol pogos nařa ovisu suri la nene imi mńalivin ko nena ga e kana pogosia.”

²¹ Ana pogos nařa navisi pis ke sanene pa Sakaraea, yeririna la asuńal asike vanua na wa, asuńate mńa pano-o, ana kiela sitomena lua narui, asape “Vanon ya ne naga pa loyumuńa, kila malion manene suri sanene.” ²² Ana siraunia na, molue sina, ana la apisu nařa naga pe pis re si pan la poli, ana la apisu kilale asape naga sike loyumuńa, naga pisu suri tai, nane kila naga sanene. Ana naga pis ga e limana pan la, naga pe puru ga mońa ga. ²³ Ana sumńa kila kiena yumuńaena e Yumuńa Wa mńana ne Ntewa, pano-o kilamake kiena pogosia, ana řasuře si pa mńana.

²⁴ Ana asuńa sanene pano-o, pe piavi re poli, wona sena, ana pogos nařa naga mloge sane mńeřena sanene, naga pa mońa ga mńala uńa sanene pano-o tol kupario lima. ²⁵ A e pogos nene, naga sumńa pisa sanini, pisape “!Ntewa kila po pan inu pařisi nene wa! Sumonia, yaru la asuńa apisu memawan inu komin nařa pe

nořar re sisi poli, ana nanagane Ntewa pisuveve inu, sinena miye inu, ana mlalua memawaena na kiau luřalumřaena nene rui.”

Navisi pimi pisawal pa Maria pisape yoko naga war Yesu

²⁶⁻²⁷ Ana Lesipet sena tol kupario orai rui, ana Ntewa pitetalia kiena navisi nařani, Kařriel, vena vito visawal kiena visena tai va sira mřee tai, kiena kia Maria, nařa naga sira mřee tai na pulkumali nae Nasaret e lepas nařa Kalele. E pogos nene, la apisaar Maria rui vena va talopa amio yaru tai, kiena kia Yosop, nařa naga molue kome lus kiena ne Parin Suře Tepet nanua sumo, ana Maria pe pa su re amio naga poli wa.

²⁸ Ana navisi nařa Kařriel pimi mřalivin Maria, pisape “O, Maria, Ntewa sitom ruru ko nena pařisi, naga sumřa pisa ruru ko, sike kemua amio ko lelaga.”

²⁹ Pogos nařa Maria mloge visena nene, naga sitom pařisi, sape visuvevelia, pisape navisi nene pisa po pařisi, ana kana kinas sanape.

³⁰ Ana navisi pis sina pania, pisape “Maria, ve omarau re. Ntewa kekaran ko ga, ana yoko kila pupia navisa ruruena tai imi e kiořa malena. ³¹ Nanagane, yoko osena, vano-o owarwal narumřa na yermřene tai, a visae naga vaeme pae, monar osikia kiena kia Yesu. ³² Visena Wa nanua sumo naga pisayu pa narumřa nene rui, nařa pisape

‘Naga yoko ve yerkawa, a kiena kia,
“Narina ne Ntewa na mava,”

a Suḻe Ntewa yoko kila naga imi ve ḻarin suḻe tai naḻa kus lelen repina marua nene Parin Suḻe Tepet nanua,

³³ ana ḻisi na naga ve suḻen la naḻa amolue e mratava m̃ana yermarua Sekop, nane le Yu ne la ne asike nanagane, a la naḻa yoko aim sirau,

a kiena nasuḻenena nene yoko taḻatete ḻisi pogos tai.' "

³⁴ Ana Maria milan visena nene paḻisi naḻa sape yoko naga war sisi, ana naga piun tan navisi nene, pisape "¿Ana suri nene yoko m̃alivi ve sanape ne, komin naḻa in na pe nesu re nemio wou nene poli wa?"

³⁵ Ana navisi pisatam̃ea, pisape "Ninuna Wa yoko naga vitom e ko, a nam̃areraena kiena ne Ntewa na mava ḻisi na kalo ko, ana yoko osena. A komin naḻa yoko ove sanene, ḻisi na avisave sisi wa nene naḻa yoko owaria, naga ve narina ne Ntewa.

³⁶ "E kioña navisuena, opisu suri nene sane m̃arera paḻisi naḻa yoko ve sanene, ana popon ositomli anom̃a sira marua Lesipet nene. Asum̃a apisu ke naga asape naga taḻatete nena ga war sisi narui, ana nevisa van ko, naga pe sira marua rui, ana nanagane, kiena kupario orai narui.

³⁷ Ositomlia, sa naḻa Ntewa pisa pa sira marua Sera nanua sumo laa rui, e lepas na puna, pe suri re nena tai naḻa naga kila ḻele poli."

³⁸ Ana Maria pisatam̃ea, pisape "Lelaga kemua naḻa. In na nepe sira m̃ee na yum̃aena kiena ne Ntewa ga, ana netam̃an inu ga vena naga kila suri la nene imi ve lelaga e inu ve sa ga naḻa

naga sinenania, sa naþa opisawal pan inu.” Ana navisi nene purmatania.

Maria pa m̃alivin Lesipet

³⁹ Ana Maria sum̃a sitoñal ke visena lala kiena ne navisi nene, ana sinenan manene pañisi sape va visu anena nene, naþa Lesipet, ana pe piavi re poli na, mligan kiena yo, mial kawa pa e pulkumali naþa Lesipet amio wona Sakaraea lalua asike ea, nane e lepas na kunus lala nae Yutea.

⁴⁰ Ana Maria pa tol m̃ala yuñã, pa pio Lesipet. ⁴¹ A poglis naþa Lesipet mloge kilale pulgo Maria naþa pis pania, mloge narina naþa teke e naga kulul keviu. Ana Ninuna Wa pitomi e Lesipet, pitomi pule ea, ⁴² ana Lesipet pio manenea, pisape “!O, Maria, Ntewa pisa ruru ko keviu pañisi, taulu make sira la punu ga, a yoko pupia kiena navisa ruruena sike m̃ena e mrasnoñã naþa yoko owaria. ⁴³ In na pe nepe sira wo re nena tai poli vena anenane kiau Suþe imi yal li inu sanene, ana nepisu sane po pan inu pañisi. ⁴⁴ A kiau sisi tomtom pisu kilale ko, kekara pañisi, komin pogos nena naþa memloge þesan pulgoñã, naga kulul pañisi e lom̃eþeu. ⁴⁵ Ita lua tekekara na tekekara, komin temlelaga e visena kiena ne Ntewa, a yoko imi ve lelaga van ita ve sa nena naþa naga pisaar pan ita.”

Maria mieluar Ntewa e yauena tai

⁴⁶ Ana e poglis nene, yauena kiena Maria tai sanini, sape
“Sineu mieluar Ntewa keviu,
⁴⁷ ninuu kekara pañisi

pa kiau Suḗ Natamaliaena,
 48-49 naga pisu inu nesike tano
 nepe sira na kiena yuḡaena tai,
 naga pe Ntewa naḡareraena,
 naga sitomaḡ inu, kila po pan inu.
 Teras lelei la naḡa aim sirau avisayu inu, asape
 ‘Sira nene, Ntewa pisa ruru naga keviu,’
 nepisirlua kiena kia wa.

50 Sinena miye la naḡa apatanonia,
 teras na sumo, na sirau.

51 Naḡareraena na limana kila suri moki, naga
 mlipureure la naḡa ape ḡarḡarera, kila la
 apa tetai.

52 Kila plan ḡarin suḗ e lelela la, pisirilua la
 naḡa sitomena su ga tano.

53 La naḡa viso kar la, pagan ruru la,
 li na suri moki, ḡene plan la, limala korena ga.

54-55 Kila sa naḡa pisaar pa repita lala,
 pimi miila ita kiena le Israel lala.

Pe sinen ḡesan re Epraam poli, sinen ye luen ga
 kiena piaparavi, vano-o ve uro re.”

56 Yauena kiena ne Maria nane ḡisi e nene, a
 naga sike amio Lesipet pano-o tol kupario telu,
 siraunia ḡasuḗ si pa ḡana uḡa.

Yoane Nakeena paeme

57 Ana pimi tol ruru pogos na narina ne Lesipet
 vaeme, ana paeme pe moḡe. 58 Ana pogos
 naḡa namratava puna ne Lesipet amio la naḡa
 asike lavisinia amloge suri nene, akekara paḡisi
 amio naga e pupia sinewo kiena ne Ntewa naḡa
 pimi pania, naḡa nanua sumo naga pe lumalaḡa
 ga, ana nanagane narina nasumo nane paeme

ne. ⁵⁹ Ana pogos naþa sisi nene kiena legiena olua, apimin akila naga pe þaviu. E pogos nene, la sinelan asape asikia mēna kien kia, Sakaraea, sane kia kiena ne arimana, ⁶⁰ ana anena pisa luþaria, pisape “Peraga, kiena kia, Yoane.” ⁶¹ Ana la apis pania, apisape “Ya ne sanene? Namratava puñña na pe amligan re kia tai sanene e poli!”

⁶² Ana apisi ga e limala pa ariman sisi naþani, vena aviun tania avisave naga sinenan sape aligan kia nape e narina nene. ⁶³ Ana Sakaraea pis ga e limana pan la, pisape ala maki tai vania, ana siri ea, pisape “Kiena kia, Yoane.”

Suri nene kila la nae yo nene amilan paþisi, ⁶⁴ a e mēna e pogos nene, purmenena ne Sakaraea kulul sina, kilia pis narui, ana mieluar Ntewa.

⁶⁵ Ana yaru punu lala na lepas nene amloge suri nene, amilan kare paþisi, a suniena nene pa laa narui tol pulkumali taþena lala na lepas na kunus lala nae Yutea. ⁶⁶ A la naþa amloge, asitom paþisi, komin naþa la apisu kilale asape limana ne Ntewa sike amio naga, ana la asuñña apiuviun pan la asape “?Nin sisi wa nene yoko naga ve sanape ne?”

Sakaraea pisawal visena naþa Ntewa pisa pania

⁶⁷ Ana Ninuna Wa pitomi pule e Sakaraea arimanane sisi nene, ana naga pisawal sanini, pisape

⁶⁸ “Teieluar kia kiena ne kieta Ntewa,
Suþe nae Israel,
pitomi pun ita, pul plan ita,

69 maplalarar kana keyowo,
molue e piaparavi na kiena yaru na yuññaena
Tepet,

naña yoko tamalia ita.

70 Nanene kiena navisaarena nanua, navi-
sawalena apisawalia, asape

71 Naga urelua ita vetan limana ne nasinekar
lala,

72 Tañatete mña sinen pñesan naviranarena amio
repita lala,

sinena mie la ke na wa,

73 nane navisaarena mñarera amio repita Epraam,

74-75 Ntewa pisaar pisape tamalia ita vetan li-
mana ne kieta nasinekar lala,

vena ve temarau re sina,

teve yaru wa,

temesmesu e marana,

teyuññae vania e legiena punu ga e kieta malena.

76 Nin naruu, avio kon Navisawalena kiena ne
Ntewa na meta manenea, osumon Suñe
okila ruru kiena mrapa.

77-78 Yoko ovisawal sane Ntewa sinena ye kiena
yeririna lala,

ve sinewo van la,

viewo kiela mlamulena viowa lala, tamalia la.

Yoko Ntewa kila kiena narin yomerarava pñesa na
kolulagi va metava van ita,

79 vitom tegoli ita naña tesike e yemalolo,

naña ninuna na marena kalo ita rui,

a vitom vivagali mrapa na suñare vena teyaloro
ea.”

Yoane Nakeena kapur pa metava

⁸⁰ Ana pogos naña kas la pimi ãaro pano, Yoane nene kapuru pimi keviu, a kiena sitomena marua ruru po, a sumãalu ñarera suwa wa se yuñãena kiena ne Ntewa. A naga pa sike e yokorena, vena va tol pogos naña naga monar vaeme e marana ne le Israel lala.

2

Yesu paeme

Matiu 1:18-25

¹ Ana e pogos nene, ãarin suñe kiena ne le Rom lala, naga kiena kia Sisa Okastas. Ana naga pisawal pisape monar aulo yeririna punu ga e purvanua make ga naña asike vatanon kiena navisuarena. ² Yuñãena nawuloen yaru la nene, la akila ãesania, a e pogos naña la akila, yeririna kiena ne Sisa tai naga pisuar ke pupia lepas nene Seria, a kia kiena ne yerkawa nena, naga Kuarinias. ³ Ana nakilaen yuñãena nene, apisape yeririna punu ga monar ava si e kiela yo lala, vena akilia asiri ruru kiela kia, a aulo ruru la.

⁴ Suri ne nanene kila Yosop molue e pulkumali nene Nasaret, naña naga sike ea, naga nene e lepas nae Kalele, ana naga pa ma metava e pulkumali nene Petleem, naña yermarua Parin Suñe Tepet naga paeme e nanua sumo, naga nene e lepas naña Yutea, komin naña Yosop naga molue e lus kiena ne yermarua Tepet nene.

⁵ A Yosop ãere wona naña Maria lalua apano, naña e pogos nene, naga lavisin ke naña kana sisi vaeme narui. ⁶ Ana lalua apano, a pogos naña asike Petleem wa, Maria mninu sane kiena pogos

na waren sisi pimi narui. ⁷ Ana Maria þarlua þesan kiena momþe nene, a naga mliluwo ruru e kinakinas nen kulmrae lala, ana pe mþana yo namonena po re poli, komin lalua akilali asape ava e yuþña mþana wolawa lala, ana pule rui, ana Maria mligan ga sisi tomtom nene mþene lelen navaganen surmali lala.

Navisi lala aþnalivin yaru navisuaren sipsip lala

⁸ Ana lemalo nene, yaru navisuaren sipsip laþas asike amio kiela surmali lala, e yo na vilumþini vanuan ga Petleem nene. ⁹ Ana navisi tai kiena ne Ntewa pitomi tano pula, a naurarena kiena ne Ntewa tegoli make yo nene sane pupia kapi tai, kila yaru la nene amilan paþisi. ¹⁰ Ana navisi naþani pis pan la, pisapenua “Ve amarau re. In na noþar ke visena tanea tai ne navisaen van amiu, naþa kilia kila yeririna make ga aloge won vaþisi. ¹¹ Yemalo ga nini, e pulkumali kiena ne Parin Suþe Tepet nanua, nane Petleem, nin sisi tai paememare ga na wa, naþa yoko naga ve kiamiu Natamaliaena. Naga ke narui pe kiamiu Suþe, naga pe Navisaarena naþa Ntewa pisaaria nanua rui pisape yoko ligan imi.

¹² “A nanene narui nane kile na sur ne tai nini. Yoko alual nin sisi tomtom nene, naþa la akila ve taþena vania. Yoko avisu naþa aliluwo ga e kinakinas nen kulmrae lala, a amligan mþeke e lelen kinanen kan surmali lala.”

¹³ Ana veraga ga amilan ga pupia þegas nen navisi tai nae ma e peni apitom asikol navisi

nañani. Ana navisi la nene amieluar Ntewa, amiyau apisape

14 “Ma metava ma e peni, asike amieluar ke Ntewa keviu pañisi, a e yomarava nini, suñare sike e yeririna la naña Ntewa naga kekaran la.”

Yaru navisuaren sipsip la apa garu Petleem

15 Navisi lala apisawal visena nene ñisi, apur matan si yaru navisuaren sipsip la nañani, añasuñe la si apa ma e peni. Ana yaru la nene asuñña apisasayu ke sina suri la nene pan la, apisapenua “Suwala, ita, tevano. Popon teva garu Petleem vena tevisuli suri naña ñmalivi ga na wa, naña Ntewa pisawal pan ita.”

16 Ana amiyal kawa apano, apa añal Maria amio Yosop, apa akaten sisi tomtom nañani, ñeke ga ñmana yo e lele navaganen suri mali lala. 17 Ana pogos naña apisu suri la nene ana apisawal visena make ga naña navisi pisa pan la e lepas na sisi tomtom nene. 18 Ana pogos naña yaru tañena la amloge suniena nene, apule mamaga e pupia nailanena tai. 19 A Maria, naga mligan ruru suri la nene e losinena, pe sinen ñesan re poli, sisitoñal luen ga silaga.

20 Ana yaru la nene añasuñela si apa pun kiela sipsip lala, asuñña apisirlua ke kia kiena ne Ntewa, a asuñña amieluar naga pañisi vanon suri wo la naña amloge a naña apisuia, naña atorokin nena ga visena kiena ne navisi naña pisawal pan la.

Asikia Yesu

²¹ Ana pogos naþa moñe nene kiena legiena olua, ana kana pogos na kilaen þaviu ea. Akila sanene þisi, asikia asape Yesu, kia nena naþa navisi pisawal þesania, sumon naþa Maria mēþenania.

Akus toroun Yesu pa e Yumã Wa mñana ne Ntewa

²²⁻²⁴ A pogos naþa Yesu paeme wik orai þaro pae pano, pogos nakilaen kuþaþaena naikikena e Yumã Wa mñana ne Ntewa narui, naga nene komin kuruta kana sira naþa þar sisi. Ana akila kuþaþaena nene, taveve Navisaluaena kiena ne Mosis naþa pisape “La naþa limala korena ga, akilia awe ga loñe ve lua, pona narin kupa ve lua.”

Ana e ke e pogos nene, la akus toroun Yesu pa e Yumã Wa mñana Ntewa, amiyawawo pania. Suri nene taveve mñana Navisaluaena kiena ne Mosis, naþa pisape “Yermñene punu ga la naþa apaeme þesia ape wa, la ape kiena ne Ntewa.”

Yermarua Simion pisu Yesu e Yumã Wa mñana ne Ntewa

²⁵ Ana yaru tai sike e Yumã Wa mñana ne Ntewa e pogos nene, kiena kia Simion. Naga pe yaru nae ga Yerusalem, pe yaru mesmesu tai, a pe yaru mñarera tai e þelaga na leniena. Naga sumña sumñate ke sape sinenan visu Nasineyeena kiena ne Ntewa nene, nane Navisaarena, imi iila le Israel lala e pog mñarera nene naþa asike ea.

Ana Simion nene naga yaru tai naþa Ninuna Wa sike e naga silaga, ²⁶ a Ninuna Wa pisawal

pa naga rui naþa yoko naga taþatete kovio, vano vano-o kilamarana visu Navisaarena kiena ne Ntewa sumo wa. ²⁷ A Ninuna Wa þere pimi e Yumã Wa mñana ne Ntewa, e nena e pogos naþa akus sisi tomtom Yesu pimi, vena akila þelaga navisaluaena nene.

²⁸ Ana Simion miaþear sisi nene, mieluar Ntewa, pisa potena pania, pisape ²⁹ “Suþe Keviu o, nanagane nepisu suri naþa opisaar pan inu, pimi pe lelaga rui. Ana suri nene kila sumãare pimi e sineu, ana nanagane okilia otamãan inu, yaru na kioñã yumãaena, nevetan yomarava nini neiñasu. ³⁰ E ga e kilamarau, nepisu kioñã Natamaliaena, ³¹ naþa omligan pimi e maran yolai lala na yomerava, ³² sane kapi tai na kipian koena van yeririna taþena lala, a yoko aieluar imimi kioñã le Yu lala, komin kiamimi naurarena nene Yesu.”

³³ Ana Yosop amio Maria lalua amilan visena kiena ne Simion nene paþisi naþa pisayu Yesu, ³⁴ ana Simion pis ke sina ga, pisa ruru la, ana pisa pa anena Yesu, pisape “Ntewa mligan sisi nene pimi pan ita nae Israel vena kila ita ve moki teloru, a vena kila mñena ga ita ve moki tesuñalu sina. Ntewa mligan naga pimi sane kile tai, ana yokorena yaru ve moki naþa avisa kare ga naga. ³⁵ Ana ve sanene, yoko naga kila kiela nasitomwanena la nene añalivi e yometava.

“Ana e lepas na puñã, þisi na naloge viowaena yur losineñã sane playu na mara tai, yokorena sineñã worovia komin suri la naþa yoko imi mñalivin narumã nini.”

Sira marua Ana pisu Yesu e Yumã Wa m̃ana ne Ntewa

³⁶⁻³⁷ A sira marua tai naga m̃ena teke e poglis nene, kiena kia Ana, naña naga pe navisawalena tai. Ana nene, arimana Panuel, naña molue kome lus kiena ne Aisere nanua sumo. Naga talopa pogos naña pe sira m̃ee ke ga wa, ana naga sike amio wona na yerm̃ene tol kas olua ga, ana wona nene mare tania. Naga pe letano ga sanene, pano-o tol kiena kas lualima orelu pa vari.

Naga pe sira tai naña silaga sulueen ga e Yumã Wa m̃ana ne Ntewa, naña sumã pa ke e pogos na lotuena na kolulagi lala pa tol na yepekilavi, a silaga naga monsilu ga vena len.

³⁸ E poglis nene narui, pimi lavisin la, mlen, pisa potena keviu pa Ntewa vanon sisi nene, a siraunia, molue pano sumã pisayu Yesu pa yeririna la naña asun akiravan m̃ate ke asape Ntewa imi tamalia Yerusalem, ana Ana pisawal ruru pan la, naña kiela Navisaarena pimi rui.

Yosop la añasuñela si apa Nasaret

³⁹ Pogos naña Yosop amio Maria akila suri la nene sa naña Navisaluaena kiena ne Ntewa pisa ãisi narui, ana añar Yesu añasuñela si apito garo kiela pulkumali nene Nasaret, lepas naña Kalele. ⁴⁰ A nin sisi nene kapur pimi keviu, kiena sitomena pimi pe manmarua ruru po pañisi, a apisu naña Ntewa miila naga vena naga kila sur punu ga wo e kiena malena.

Yesu pe yaru viu ga, pian yaru la e Yumã Wa

⁴¹ Ana e kas punu ga, le Yu la asuñña akila ke kiela ãpaãagena tai, naãa Paãagena na Sitomãalen Natamaliaena. A silaga, la naãa asike e yo taãena lala, la sinelan manene paãisi vena ava ma Yerusalem akila ãpaãagena nene, a arimana Yesu amio anena, la mñena akila ke sanene. ⁴² Ana e kas tai, pog naãa Yesu kiena kas tol lualima taaga pa lua [12] ke na wa, apa sina, ana aãure Yesu amio la. ⁴³ Ana la akila suri na ãpaãagena la nene pano-o ãisi, ana yeririna la aãasuãela si apa e kiela yo lala. Ana Yesu na pe pa re poli, naga suñña ga Yerusalem, ana arimana amio anena pe akilia re poli. ⁴⁴ Lalua asitom ke asape pona naga sike amio la ãasia veraga e pupia ãegas na kiela namratava lala a kiela erau lala, ana amial mña pano-o tol legiena wetelu tai. Ana e yemalo nene akale Yesu pano-o, ⁴⁵ pe añal re naga sike amio la poli, ana apisu sane la monar atayu lala awasuãe si ava garu Yerusalem vena alualia. ⁴⁶ La amial legiena wetelu taaga, apim atol si Yerusalem, akale pano-o, ana e legiena taãena, naãa kana legiena na telu na kiela yalena, añal ga na wa, apisu teke tano e Yumña Wa mña ne Ntewa. Naga totano teke amio navianena lala nae e yo nene, toñña miyagogon ke kiela visena lala, a toñña piuviun ke naviunena la tan la. ⁴⁷ A la naãa asike lavisinia e pogos nene, la amilan manene pupia manmaruaena a nakiliaena kiena ne Yesu paãisi, amio navisatañeen la naãa naga suñña mla ke pan la naãa apiun ke suri tania. ⁴⁸ Ana pogos naãa arimana amio anena apisu naãa naga kila ke sanene, amilan paãisi, ana

anena pis pania, pisape “Ei, naruu! Komin ya ne sinoñan osape okila kare manene imimi sanene? Opisu ke ne, imimi lua makale ko pano-o, pe moñal ko re nena ga, ana okila imimi memloge piowa pañisi wa.”

⁴⁹ Ana e pogos nene Yesu mla navisatañeen tai pan lalua, pisa sanini, pisape “?Komin ya ne amiu lua apa akale inu e yo tañena la ne sanene? Sanape, amlua pe asitoñal re si sane in na monar nesuñña nekila ga yuññaena kiena ne kau Ata loyuñña e ñña yuñña poli?”
⁵⁰ Ana navisatañeena naña pisa pan la, aminue logekilaleen kana kinasia. ⁵¹ Ana Yesu mligan yo nene, naga pito amio la, ana la añasuñe si apito e kiela yo naña Nasaret.

A Yesu su pogaga amio la e yo nene, suñña mlogear ruru la ñña silaga. A anena naña Maria suñña sitoñal luen ga suri la nene loyuñña e losinena silaga.

⁵² Ana kas la pimi ñaro pano, a Yesu kapur pimi keviu, a kiena manmaruaena amio kiena maruaena suñña pimi keviu laa narui, a Ntewa suñña pisa ruru naga keviu pañisi, kila yaru la apisu naga po na po, akekanan manene naga pañisi.

3

Yoane Nakeena sike e yokorena, naga mlologon ke navilopuena

¹⁻² Ana kas lañas ñaro pa rui, ana Yoane Nakeena, narina ne Sakaraea, naga pimi ñaliv e yokorena. Naga nene e pogos naña pupia Parin

Suþe Taepirias Sisa nae Rom naga pe suþe keviu ke tol kana kas lualima taaga pa lima rui, a e poglis nene na mliganar kiena yerkawa laþas rui, sane Ponses Paelat, naga pisuar Yutea, a Erot, naga pisuar Kalele, a wenla naþa Pilip, naga pisuar lepas nae Ituraea amio Trakonatis, a Lasanias, naga pisuar lepas nae Apilin. A e mña ga e pogos nene, lalua naþa ape þar na yaru wa lala asike garu Yerusalem, naga Anas amio Kaeþas.

Ana Yoane sike garu yokorena, ana Ntewa mla visena la pania, ³ ana naga pa make e lepas punu ga na wii nae Yortan, naga sumña mlologon ke pisape yaru la punu ga monar avilopu la, a monar ava e nakeena, ana yoko Ntewa naga viewo kiela mlamulena viowa lala. ⁴ Naga kila sa ga naþa Navisawalena Aisea pisa nanua rui e kiena tusi, naþa sape

“Pulgo tai sumña pio ke e yokorena, sape

Akila ruru make mrapa kiena ne Ntewa,

vena naga kilia imi mñalivi e kiamiu malena lala.

⁵ *Yoko kam na monar asinwo make pulþalu lala,*

a monar akilro kunus la su ga tano,

a yo la naþa kapinia la monar aim amesmesu ruruia

a yo la naþa þilþil la monar aim ameri ruruia;

⁶ *ana sanene, yoko yolai la punu ga avisu kiela Natamaliaena naþa Ntewa ligania yalin la e mrapa nene imi mñalivin la.” Ais 40:3-5*

Yaru la apim puna Yoane

⁷ Yumãena kiena ne Yoane, naga mlologon sanene narui, ana pogos naña ãina la moki amolue apa e yokorena vena naga kee la, naga pis m̃arera pan la, pisa sanini, pisape “Kam na sa ga lom̃ara la naña amaraun kapi tai ana aãure, ana kam na asitom asape akilia aurmatan pupia anen kapi naña Ntewa yoko ligan imi? Peraga, komin pe apilopu amiu ruru re poli wa. ⁸ Ana visae lelaga kemua naña amaraun nakoena nene, kiamiu malena lala monar war mras wo la naña torokin kiamiu navilopuena nene. Ana avisuaria, ve awarwar amiu re sina, sa naña akila ke rui, naña asum̃a apisa ke asape ‘E, ita na tesum̃a poga ga rui, okilakan ita ke narui tepe lus kiena ne Epraam nena naña.’ Ana nanene na pe sur re tai nene poli, komin naña visae Ntewa sinenania, naga kilia war kilavaru la nene, yum̃aen lus kiena ne Epraam la ve moki ea, vena la akus lelemiu. ⁹ In na nevisa van amiu, nevisave m̃ekiavi mon ruru m̃eke rui, vena te plan laki la naña pe aãar re mras wo la poli, akoven la ava e kapi.”

¹⁰ Ana pogos naña ãina la amloge nene, amarau na amarau, ana apiunia, asape “Ana visae ve sa nene, yoko imimi mekila ve sanape narui?”

¹¹ Ana Yoane pisatam̃e la, pisape “Yar naña m̃ana kulsaket lua, yoko naga monar tam̃an tai va yar naña pe m̃ana re tai poli. Yaru naña kana kinanena keviu, yoko naga monar vion re kom̃as va yar naña pe kana re poli.”

¹² A yar na takis la moki, naþa ape li nakila keuiaen nena yar lala, apimin vena Yoane kila nakeena van la, ana la mēna ga apisu kilale kiela napiowaena lala, ana la apiun mēna ga asape “? Navianena, sanapen imimi, yoko imimi monar mekila ve sanape?”

¹³ Ana naga pisa pan la, sape “Yoko awarpolo vetan yaru lala torokin ga ya naþa la monar aulia, ana ve yuve re, sa naþa akila ke þisi rui.”

¹⁴ Ana yaru na mara mēna laþasia apiun sanini pa Yoane, asape “?A imimi, yoko mekila ya?”

Ana naga pis pan la, pisape “Amiu apuarar ke kiamiu suri na mara lala, ana yaru la asumã amaraun amiu paþisi, lala sane visae pog tai sinemiun kiela suri tai, amiu avisa ga ana monar atañania. Ana þelaga nene, yoko monar ve akila re sina. A asumã sinemiun mimi lue silaga asape yerka wa la nene apul amiu ve tokak ga, pona torok ga yo, ana monar akekaran ga narui.”

Yoane sape yoko Navisaarena imi

¹⁵ E pogos nene, le Yu lala asumã asitom ke asape kiela Navisaarena lavisi mālivi, ana amloge visena wo la nene kiena ne Yoane, akekarania, ana naviunena sike e kiela sitomena lala, asumã apiuviun ke, asape “O, pona yaru ne nanene yo, naga pe kieta Navisaarena, pona peraga?”

¹⁶ Ana Yoane suñã pisawal ruru merarava pan la, pisape “Peraga. In na nepitom sumo, vena nesuñã nekee amiu ke ga e wii, ana yaru taþena tai vim siraun inu. Yaru nene, naga to

laa metavan inu, a in na pe netorokin re naþa neluþarlua kulus nen lana poli pona nekila kiena yumãena taþena. Ana naga ke narui, yoko kee amiu e Ninuna Wa, amio kana kapi nena, vena kekan plan kororaki lala vetan kiamiu malena. ¹⁷ Naga sa naþa naga tarar ke koruak nayuraren wit, vena silsilin plan kana kinas lala. Ve sanene, yoko naga war ruru kinas nen wit la nene va uña, ana yoko naga koven vinus va e kapi tai naþa taþatete mare pogos tai.”

¹⁸ Nanene narui, Yoane Nakeena mlologon Lologena Wo pa yeririna la sa ke nene narui, a naga sumã pisa ke mēna visena wo naiilaaren taþena la pan la, a visena nakila þegelaena. ¹⁹ Ana yar tai pe kekaran re nena Yoane, nane Þarin Suþe Erot, komin Yoane sumã pis ke pania vanon naþa naga þerelua sira nene Lerotias, naþa wona wenla, a pis pania vanon sur taþena mēna laþasia naþa naga kila. ²⁰ Ana metavan kiena napiowaena taþena lala, Erot sinen kar Yoane pano-o, sumã narui koven pa e yumã naloge viowaena.

Yoane kee Yesu

Matiu 3:13-17; Mak 1:9-11

²¹ Ana pogos naþa Yoane pe pa re e yumã naloge viowaena poli wa, naga kee mña yeririna la pano-o, ana pog tai Yesu mēna pimi e yo nene, ana Yoane kee mēna naga. Ana pogos naþa Yesu molue e wii, sumã mlen mñaga, ana veraga ga sinapane pike, ²² a Ninuna ne Ntewa pimi pe

3:19 Mat 14:3,4; Mak 6:17,18

3:22 Mat 3:17; Mak 1:11; Luk

9:35

tasa, moña pitomi tano sane lomñe tai, pitomi pran ea. Ana Ntewa pis ma e peni pitomi pania, pisape “Ko Naruu nene, naña nepinaia ko pañisi. Kiau sitomena sike ga e ko, nekekaran ko pañisi.”

Repina ne Yesu lala

Matiu 1:1-17

²³ Ana siraun naña Yoane kee Yesu, ana naga siar kiena yumñaena narui, a e poglis nene, naga kiena kas la tol lualima telu. A lus naña Yesu molue komea, e lepas na yermene, siar e Yosop, naña apisu sane arimanane Yesu, pa sanini:

Yosop, naga narina ne Eli;

²⁴ Eli, naga narina ne Matat;

Matat, naga narina ne Livae;

Livae, naga narina ne Melki;

Melki, naga narina ne Sanae;

Sanae, naga narina ne Yosop;

²⁵ Yosop, naga narina ne Matateas;

Matateas, naga narina ne Amos;

Amos, naga narina ne Neam;

Neam, naga narina ne Esli;

Esli, naga narina ne Nagae;

²⁶ Nagae, naga narina ne Mat;

Mat, naga narina ne Matateas;

Matateas, naga narina ne Semein;

Semein, naga narina ne Sosek;

Sosek naga narina ne Sot;

²⁷ Sota, naga narina ne Soanan;

Soanan, naga narina ne Resa;

Resa, naga narina ne Seruñapel;

Seruñapel, naga narina ne Saltiel;

Saltiel, naga narina ne Neri;

28 Neri, naga narina ne Melki;
Melki, naga narina ne Ati;
Ati, naga narina ne Kosam;
Kosam, naga narina ne Elm̃atam;
Elm̃atam, naga narina ne Ere;
29 Ere, naga narina ne Yosua;
Yosua, naga narina ne Eliesa;
Eliesa, naga narina ne Sorim;
Sorim, naga narina ne Matat;
Matat, naga narina ne Livae;
30 Livae, naga narina ne Simion;
Simion, naga narina ne Suta;
Suta, naga narina ne Yosop;
Yosop, naga narina ne Sonam;
Sonam, naga narina ne Eliakim;
31 Eliakim, naga narina ne Melea;
Melea, naga narina ne Mena;
Mena naga narina ne Matata;
Matata, naga narina ne Natan;
Natan, naga narina ne Tepet;
32 Tepet, naga narina ne Sese;
Sese, naga narina ne Opet;
Opet, naga narina ne Poas;
Poas, naga narina ne Sala;
Sala, naga narina ne Nason;
33 Nason, naga narina ne Aminatap;
Aminatap, naga narina ne Atmin;
Atmin, naga narina ne Ani;
Ani, naga narina ne Ebron;
Ebron, naga narina ne Peres;
Peres, naga narina ne Suta;
34 Suta, naga narina ne Sekop;

Sekop, naga narina ne Aisak;
 Aisak, naga narina ne Epraam;
 Epraam, naga narina ne Tera;
 Tera, naga narina ne Nao;
³⁵ Nao, naga narina ne Seruk;
 Seruk, naga narina ne Reu;
 Reu, naga narina ne Pelek;
 Pelek, naga narina ne Eþa;
 Eþa, naga narina ne Sela;
³⁶ Sela, naga narina ne Kaenan;
 Kaenan, naga narina ne Aþaksati;
 Aþaksati, naga narina ne Sem;
 Sem, naga narina ne Noa;
 Noa, naga narina ne Lamek;
³⁷ Lamek, naga narina ne
 Metusela;
 Metusela, naga narina ne Inok;
 Inok, naga narina ne Saret;
 Saret, naga narina ne Malalil;
 Malalil, naga narina ne Kaenan;
³⁸ Kaenan, naga narina ne Enos;
 Enos, naga narina ne Set;
 Set, naga narina ne Atam; ana
 Atam, naga narina ne Ntewa.

4

*Parin suþe kiena ne yermare la naþa Yermare
 Lego, kilali Yesu*

Matiu 4:1-11; Mak 1:12-13

¹ Ana pogos naþa Yesu pimi si e lepas na wii
 nae Yortan naþa Yoane kee naga ea, naga pulen
 Ninuna Wa paþisi. Ana Ninuna þere Yesu pa ke

sina ga e yokorena, ² a naga sike e yo nene pa tol legiena lualima yam vari, naña ãarin suþe kiena ne yermare lala suña kilali naga. Ana e legiena la nene, pe kinan re poli, suña pano pano-o tol naña visokar na visokaria.

³ Ana Yermare Lego nene pimi pisa pania, pisape “Visae ko ope Narina ne Ntewa kemua lelaga, ovisali va kilavaru nene imi ve kilaparavi, vena okania.”

⁴ Ana Yesu pisataña, pisape “Peraga, komin Visena Wa pisape ‘Pe yar malin re ga kinanen poli.’ ”

⁵ Ana Yermare Lego sinenan sape kilali sina Yesu, ana ãere kiena sitomena pa metava e pupia kunus tai. Kipian naga e purvanua make ga na yomarava nini, ⁶ ana pisa pania, pisape “Navisuaren yo la nene, amio kala naurarena make ga, asike pa e lumãau rui. Inu noþar kian la, ana nekilia netañan va yar ai naña in na sineun nesape netañan vania. ⁷ Pogaga, visae ovatanon inu, olotun inu, vera na neligan make sur la nene se lumoña.”

⁸ Ana Yesu pisataña, pisape “Visena Wa pisape ‘Olotun ga Ntewa okila ga kiena yumãaena naga taaga, komin naga ga pe kioña Suþe.’ ”

⁹ Ana Yermare Lego sinenan sape kilali sina Yesu, ãere kiena sitomena pito garo Yerusalem, mligan naga e yo tai naña pa manene metava, e wos nen yumã mñana Ntewa, ana pisa pania, pisape “Visae ko ope Narina ne Ntewa, oula oto tano. Okilia okila woga ga ne, ¹⁰ komin naña Visena Wa pisayu Ntewa, pisape

*'Naga yoko ligan kiena navisi lala, vena aim
asumã amio ko, avisuar ko m̃aga.*

11 *Yoko ayukop yaun ko ga vena ve otan re lañã
e kilavaru.' "* *Yauena 91:11,12*

12 *Ana Yesu pisatam̃e ke sina ga, pisape "Peraga
rui, komin Visena Wa pisa m̃ena ga pisape
'Ve om̃areran re okilali kiom̃a Supe Ntewa vena
kila kiom̃a sur tai.' "*

13 *Ana pogos naña Yermare Lego kilali kiena
natañaliena la nene pa Yesu p̃isi, ana purmatania
pano, naga pa sum̃ate ke vena lual pogos tañena
naña sitom ke sape kilia taulu Yesu ea.*

*Yesu siar kiena yum̃aena gar Kalele
Matiu 4:1-11; Mak 1:12-13*

14 *Ana siraunia, Yesu mialoro e nam̃areraena
kiena Ninuna Wa, pimi tol yo Kalele, ana yar la
apisayu naga pano-o kalo make yo lepas nene.*

15 *Ana naga sum̃a pa ke e kiela yum̃a na leniena
lala, sum̃a pian la, ana asum̃a akekaran naga
pañisi, asum̃a apisirlua ke kiena kia.*

Le Nasaret la am̃enelua Yesu

16-17 *Ana Yesu pimi tol kiena yo naña Nasaret,
naña kapuru pimi keviu ea, ana e Legiena Wa,
sa naña kila m̃a silaga, naga pa amio la e kiela
yum̃a nalenena. Ana asape naga ulolua Visena
Wa Kiena ne Ntewa van la, ana akian tus naña
Aisea siriyu pania. Ana naga sum̃alu na pikeña
tus nañani, m̃al e naña sinenan sape ulolua van
la, ana puloia, naña pisa sanini, pisape*

18 *"Ninuna ne Ntewa sike e in rui, komin naña
Ntewa mligan inu vena in ke narui naña*

nelologon Nalologena Wo va la naña limala korena ga.

Naga mligan inu nepimin vena nevisawal va la naña asike e yuña naloge viowaena, nevisave nanagane, akilia amolue ga sa ga ne,

a vena nevisawal va kilamara ãala lala, nevisave nanagane, kilamarala la kilia imi wo sina.

A naga mligan inun sape yeririna la naña asike tano, naña yar taña la asuña akila kare la ke silaga, yoko in na neure plan la, aim asu si e yo wo tai.

19 Ana sanene, in na nekilia nekila merarava nevisave nanagane, Ntewa kila kiena pog viu nowo tai pimi ñalivin yar la nene rui.”
Ais 61:1,2

20 Ana pogos naña Yesu pulo nawuloena nene ãisi, naga pulonar si tus, kian si pa yaru na visuaren yuñaena, ana pa to meta e lelen nalologena, vena vis va yar lala. Ana la make ga naña asike loyuña asuña atamaria Yesu asape aña yoko aloge ya ne visa van la ne wa. ²¹ Ana pogos naña naga siar kiena visena, ana pisa sanini, sape “Nevisa van amiu, nevisave Visena Wa kiena ne Ntewa naña amloge ga na wa, kana visena la nene pimi pe lelaga nagane ga na wa, e maramiu.”

22 Ana pogos naña yar la amloge visena la naña kiena ne Yesu, amloge sane naga pis ruru po na po, pis malumu ga a pis tanea ãisa, ana la amilan pañisi, asuña apisavisa pan la sanini, asape “! Ana yar nene, naga narina ne Yosop ga nene! ? Naga ãar visena tanea la ne sanene pe ne?”

²³ Ana Yesu pisatam̃e la, pisape “Pona sine-miun asape avisa kieta visena marua nene van inu yo, naþa pisape ‘Tokta, okila ruru ko sumo wa, ana siraunia okilia oiila yar taþena.’ Nanene komin naþa amloge þisi rui naþa nesike gar Kapeneam, nekila ruru ke namaiena la moki, ana asitom asape komin ya ne pe nepim nekila re m̃ena sanene pan amiu e kieta yo nini poli.

²⁴ Ana lelaga nevisa van amiu, sane visae navi-sawalena tai, ana kiena yeririna lala nae kemua kiena yo naþa, la taþatete akekarania, taþatete alogearia. ²⁵⁻²⁶ Nanene na lelaga. Sineun ne-sape asitomyuli pogos kiena ne yermarua Elaisa nanua sumo. E pogos nene, yua pe powo re poli pa tol kas telu komsusa, a pupia viso tai kalo make yo Israel. ?Ana Ntewa mligan Elaisa pa miila ane e poglis nene? Apisu ke ne, pe mligan re naga panon iila letano nae Israel lala tai naþa amloge ke piowa poli, ana mligan naga pa miila letano nae pulkumali keviu nene Sareþat, nane lepas taþena naþa Saeton. ²⁷ Ana asitomyuli m̃ena ga pogos kiena ne yermarua Elisa. ?E pogos nene, yar la moki naþa aþar leperosi, ana Ntewa kila ruru ai? Naga pe kila ruru re le Israel lala tai naþa aþar maiena nene poli, ana kila ruru ga yere Seria nene naþa Neman. Lelaga-o, ita yeririna la naþa tepisa ke tesape ita nena naþa tepe yeririna lala kiena ne Ntewa, ana yar la naþa Ntewa mligan la apimin asape akila kieta yum̃aena, ana yepeta mavin la ke sina ga.”

²⁸ Ana pogos naþa la nene asike loyum̃a

nalenena amloge visena nene, kiela sitomena la pilon pa pe taþena narui, nagane la sinela kar Yesu narui. ²⁹ Ana la aplamoluen Yesu, aþurelua naga petan kiela pulkumali pa vanua, aþure pa e pupia yeparpas tai naþa kiela pulkumali mēke ea, la sinelan asape akuan Yesu vito tano e yo ne nanene narui. ³⁰ Ana Yesu kila naþa la taþatete si auarar naga, ana mial ga pa þaro likan la sanene pano, mligan la asike na.

*Yesu pa garu Kapeneam, pilelua yermare tai
Mak 1:21-28*

³¹ Ana Yesu mial pito tol pulkumali taþena nae Kalele, nane Kapeneam, ana e Legiena Wa naga pian la e kiela loyuma na leniena. ³² Ana la naþa amiyagogonia amilan paþisi, komin amloge kiena visena urmi paþisi, a namareraena kiena ne Ntewa sike ea. ³³ Ana pogos nene yar tai sike loyuma amio la, naþa ninuna ne yermare viowa tai suma kila kare naga, ana yar naþani pio manene kare Yesu paþisi, pisa pania, pisape ³⁴ “?Ei, Yesu nae Nasaret, kioþa ya na teke e imimi? !Pona ko opimin osape okila kare imimi yo, a! Komin naþa in na nekilia ko rui, sane ko ope Yar Wa nena napo tai kiena ne Ntewa.”

³⁵ Ana Yesu pis marera pa yermare viowa naþani, pialuþaria, pisape “!Ei, ve ovis re sina! Omolue ke vetan yar nene nagane.” Ana ninuna viowa naþani koven yar nene mloru pito tano likan la, ana molue petania pure pano, ana yar ne po sina ga sike na.

³⁶ Ana yar na yo la nene amilan pañisi, ana apisasayu Yesu, asape “?Ei, visen ya na sanene? Nanene yar m̄arera tai nene yo, kiena nam̄areraena keviu pañisi wa. Naga pis ga pa ninuna viowa lala, ana apureure ga sa nene.”

³⁷ Ana komin sur ne la nanene narui la akekara, a asuñña apisa ruru kia kiena ne Yesu mlewo pa e yo punu ga e lepas nene.

Yesu kila ruru auia simem kana Saemon Pita, amio m̄ena yar tañena la moki

Matiu 8:14-17; Mak 1:29-34

³⁸ Ana Yesu suññalu pa vanua e yuñña nalenena nene, ana pa uñña m̄ana Saemon, nanene gar ke Kapeneam na wa. Ana e uñña nene auia simem kana Saemon mloru m̄eke e togin namaiena, yepena pisusun, ana apisawal pa Yesu, apiun pania asape sanape e sira marua nene. ³⁹ Ana Yesu pimi suññalu se yepas nen sira nañani, ana pisaluñar maiena nena, ana yepen pimi manin sina, mloge nena po, ana suññalu pa miyuññaen kala kinanena.

⁴⁰ Ana pogos naña mrae pito tano, sane Legiena Wa nene ñisi narui, la naña kiela namaiena la asikena, añerela apim puna Yesu, ana Yesu ñuarar la, kila ruru la. ⁴¹ A la moki naña, yermare la amolue petan la, naña asuñña akiikii, asape “!Ei, ko kemua naña ope Narina ne Ntewa narui!” Ana Yesu pisaluñar yermare la nañani, pisape ve avisa re si suri tai, komin naña akilia rui asape naga Navisaarena kemua lelaga.

Yesu mlologo make ga e lepas lala nae Yutea
Mak 1:35-39

⁴² Ana kolulag kona, Yesu suñalu naga taaga molue pa vanua, pa e yo ñano tai naña pa ruru po na po pañisi. Ana siraunia, yar la apiminia, akale ña pano-o añal e yo ne nanene, a la sinelan asape naga suña amio la, akilali asape avisaluñaria vena ve ligan la re, ⁴³ ana pisa pan la, pisape “Toko, in na monar neva nelologon Nalologena Wo na suñenena kiena ne Ntewa va e pulkumali tañena la naña asike ga wa, komin naga mligan inu nepimin suri ne nanene.” ⁴⁴ Ana naga petan la, pano mlologo teliv make e yuña nalenena lala e pulkumali punu ga nae lepas naña Yutea.

5

La naña Yesu pio la ñesania, apa ataveve naga Matiu 4:18-22; Mak 1:16-20

¹ Pogos tai, Yesu sike e yepas nen pupia lapa naña lañas asape Lapa nae Kenasaret, a lañas asape Lapa nae Kalele. A e pogos nene, yaru la naña asuñalu amiyervivi Yesu la moki pañisi, sane yepa ve tokaki ga, komin naña sinelan asape aloge naga lologon visena kiena ne Ntewa van la. ² Ana Yesu pisu waa lua naña sike ga lavisinia, naña appure pimi sike ga e kukunone, a pisu kana yar ne la asuñalu asike e sive, asuña akevan ke kiela lilivi lala. ³ Ana Yesu mial pano pa miai e waa tai nene, naña kiena ne Saemon, ana pisa pania pisape suponlua va li laa sane. Ana Yesu teke e waa nañani, toña pian ke la naña asike ura.

⁴ Ana pogos naṣa naga pis pan la ṣisi, naga pisa pa Saemon, pisape “Ita, in na sineun nesape teva re laa e lowe memaena, vena toure re lilivi wa.”

⁵ Ana Saemon pisatamea, pisape “E yerka, imimi mekila sur nene rui pano-o yemlagi, ana pe metol re nena ika tai poli. Ana komin naṣa opisa sanene pan inu, poga, nekekaran naṣa tevali ga.” ⁶ Ana la apa akila sa naṣa Yesu pisa, ana la amilan pupia ṣegas nen ika tai pulen ga kiela lilivi naṣani, kila kiela lilivi nene siar pororovia, ⁷ ana la apio laṣas naṣa asike e waa taṣena, la akuṣin limalan la vena aim aiila la. Ana la naṣa apim, ana asuṣa aṣere lilivi naṣani amio kana ika ne lala apa metava e waa luwoka nene, pano-o waa luwoka ga naṣani pulemamaga ruru nena ga, lavis luoka ga talilu.

⁸ Ana Saemon pisu sur la nene, pisu kilale sane Yesu ga miyuṣaen e kiena pupia naṣareraena wa, ana kinai tano e mialana ne Yesu, pisape “Suṣe, in na nepe yar viowa ga tai. Popon oure matan inu, ve osu re si lavisin inu.” ⁹ A pe naga re ga taaga po, ana la ṣena naṣa asike amio e pogos nene, la punu ga amilan ṣan wa e pupia ṣegas nen ika naṣa la aṣar ne, ¹⁰ amio narina ne Sepeti lua nene, Semes lalua Yoane, naṣa asikol la amio Saemon amiyuṣae lele taaga, la ṣena luoka amilan paṣisi.

Ana Yesu pis pa Saemon, pisape “Ei, ve oma-raun re si sur nene. Siar nagane, yoko ve oure re si ika, ana yoko osuṣa oure yar la aimi ataveve

inu.” ¹¹ Ana aṗasuṗe la, aṗere si kiela waa la naṗani apa ura, ana pe akila re si sur taṗena poli, amligan kiela sur punu ga sumã sanene, ana ataveve Yesu apavini.

*Yesu kila ruru yaru tai naṗa ṗar leperosi
Matiu 8:1-4; Mak 1:44-45*

¹² Ana siraunia, e pogos tai, Yesu sike pulku-mali tai e yo nene, ana yar tai m̃alia pimi puna, naṗa yaru nena, maiena naṗa leperosi kilapel naga kila kare nena tasnena. Ana yaru naṗani pimi mloru e lana ne Yesu, tag pania, piun tania, pisape “Suṗe! In na nemlelaga nesape ko okilia okila ruru in si wo ga, ana visae okekarania, in na sineun nesape neviun tan ko vena okila inu neikiki sina ga.”

¹³ Ana Yesu pe maraun re tolen maiena kiena ne yar nene poli, ana puararia, pisa pania pisape “Ee, in na sineun nesape yepenã yania.” Ana veraga ga yepena miania, leperosi naṗani ṗisi e naga. ¹⁴ Ana Yesu pisa pania, pisape “Omloge ke ne, ovano ve ovisayu re sur nene va yar lala wa, ana nanagane ova nena okom puna ne yar wa vena naga visu ko lia, a kilia visawal visave tasneṃa mian rui. Siraunia, ana monar ova okila lotena va Ntewa a okila kuṗaṗaena na kioṃa yepe ikikena nene, sa naṗa Mosis pisape monar akila.” ¹⁵ Yesu pisape yar nene vano ve visayu re sur nene, ana peraga, pe piavi re poli asuṃa apisayu ṃa Yesu pano-o pa tol yo punu ga, kila sane pupia ṗina la apimin asape aloge kiena visena, ana la sinelan asape naga kila ruru kiela namaiena lala. ¹⁶ Ana e pogos la punu nene Yesu

suña petan m̃ena yeririna lala, pa ke e yokorena, mlen ke pa Ntewa.

*Yesu kilia viewo mlamulena viowa
Matiu 9:1-8; Mak 2:1-12*

¹⁷ Ana pogos sina tai, Yesu pian la m̃aga, a Varasi laṣasa amio navianena navisaluaena lala atom̃aga tano e nene, naṣa la na pulkumali taṣena lala e lepas lala nae Kalele amio Yutea, a laṣasia amolue Yerusalem apimi. Ana e pogos nene, nam̃areraena kiena ne Ntewa pimi keviu manene laa e Yesu narui, kila naga kila ruru namaiena lala. ¹⁸ Ana yar laṣasia akus namaiena tai pimi, naṣa yepena la punu ga marmare, naṣa akus pimi ana mlor ga m̃eke e m̃ana tog. La sinelan asape akus imi loyũna aligan mon lavisin Yesu, ¹⁹ ana apisu sane pupia ṣina m̃eke pa loyũna rui, ana yo ve tokak paṣisi, taṣatete akus kiela erau nene vano. Ana akus pa metava e wos nen yũna narui, akawepo lologia Yesu, ana amligan malumun yaru naṣa amio m̃ana tog pito tano e pulus naṣani, pito m̃eke likan yeririna lala, m̃eke nena ga vamon Yesu. ²⁰ A pogos naṣa Yesu pisu suri nene, naga kilia naṣa la amlalaga m̃arera e naga paṣisi, asape yoko naga iila namaiena nene, ana naga pisa pania, pisape “Mara, in na nepiewo kiom̃a mlamulena viowa rui.”

²¹ Ana pogos naṣa Varasi amio navianen navisaluaena lala amloge visena nene, asitom piowa e naga paṣisi, ana asum̃a apiuviunia, asape “?Ane ṣarnena kare ke kia wa kiena ne Ntewa sanene? Ntewa naga taaga kilia viewo

mlamulena viowa, pe yar tařena re si poli, ana yaru nene pis ke sa nařa naga sitom ke sape naga Ntewa nene narui.”

²² Ana Yesu mninu kilale rui sape asitom ke piowa sanene e naga, ana pisa pan la, pisape “?Komin ya ne sinemiu la pulen ke sitomena viowa la sanene? ²³ Visae nevisa ve sanini va namaiena nene, nevisave ‘In na nepiewo kiořa mlamulena piowa,’ pona nevisa vania nevisave ‘Osuřalu, oyali,’ ana visena lua nene, tai řareran navisaena, a tai meme ga. Na nařa sape ‘Osuřalu, oyali,’ naga řarera laa sane, komin nařa yoko okilia ovisu kilale sane kiau visena pe lelaga pona peraga, nařa yar nene suřalu pona tařatete suřalu. ²⁴ Ana nanagane řisi na nekila suri tai nařa asitom asape Ntewa ga naga taaga kilia kila, ana avisu kilale sane in na Narina ne Yeririna, nařareraena sike e inu. A nevisa van amiu, nesape nařareraena nene torokin nekilia neviewo řena mlamulena viowa e yomarava nini. Ayagogo ruruia.”

Ana Yesu pis pa namaiena nařani, pisape “Nevisa van ko, nesape osuřalu, ovilonar mořa tog, oyali ova uřa.”

²⁵ Ana sa nena nene, e marana ne la nařa apisu ke ne, yar nene suřalu, řar řana tog, mial pa vanua, naga pa uřa nařa suřa miyeluarlilien Ntewa sanene pano.

²⁶ A pogos na la nařani apisu suri nene, amilan kare nena lelaga, yepela řil pařisi, asuřa amiyeluar Ntewa, asape “E suwala, lelaga kemua-o, řane na ita tepisu sur tai nařa pe tařena pařisi!”

Yesu pio Matiu, naña apio mēna Livae, pimi tavevea

Matiu 9:9-13; Mak 2:13-17

²⁷ Ana siraunia, Yesu mialili ga pa laa sane, ana māl yar tai totano teke e kiena yuñāena e yuñā na warpoloen takis. Yaru nena, kiena kia Livae. Ana Yesu pio, sape “Oim otaveve inu.” ²⁸ Ana Livae suñalu nena ga, mligan kiena yuñāena, mligan kiena suri punu ga sike na, ana taveve Yesu. ²⁹ Siraunia, Livae nena kila pupia kinanena tai kana ne Yesu e mñana uña, a e pogos nene, yar na takis tañena la moki, amio mēna yar tañena la moki na sanene, la mēna apim ato lele taaga amio Yesu amio kiena nalogena lala e kinanena nañani. ³⁰ Ana Varasi lañasia, amio kiela navianen navisaluaena lañasia, apragogo pa nalogena lala, asape “?Komin ya ne akinan ke lele taaga sanene amio yaru viowa lala a ãarmārera la nene?”

³¹ Ana Yesu ke pisatañe la narui, pisape “La naña tasnela mārera ruru poga ga, la pe asitom re asape ava akom pun yar na kilaruruen maiena poli, ana la ga naña añar maiena, la sinelan pañisi. ³² In na pe nepimin re nevio yar la naña apisa ke asape la apo rui e marana ne Ntewa vena ataveve inu, ana in na nepimin ke yeririna viowa la ne sanene narui, vena avilopu la vetan kiela mlamulena viowa lala.”

Naviunena tai e lepas na monsilena

Matiu 9:14-17; Mak 2:18-22

³³ Ana la apiun naviunena tai pa Yesu, asape “Nalogena kiena ne Yoane Nakeena la asuñā

apuarar ruru ke ðelaga nene naña yam mokliu, asuñña amonsilu ga vena alen va Ntewa, a Varasi mña la akila sa ke ga. ?Ana komin ya ne kioñña nalogena la pe akila re poli, ana la asuñña akinana a asuñña amun ga sanene?”

³⁴ Ana Yesu pisatañe la, pisayu naga amio kiena nalogena lala, sane la akekara pañisi pogos naña naga sike amio la, ana yoko sinela viowa sirau e pogos naña naga ure matan la. Ana pisape “?Pogos naña yar natalopaena sike amio kiena erau lala wa, asitom asape yoko akilia aligan kinanena na ðaþagena nene sike na, ve akan re? Peraga. ³⁵ Ana yoko pogos tai imi, naña yoko aurelua yar natalopaena nene vetan kiena erau lala, a e pogos nene narui akilia amonsilu, komin naña sinela miye naga pañisi.”

Sur marua amio sur vii

³⁶ Pelaga na monsilena nene, naga ðelaga marua tai nalotena kiena ne le Yu lala, ana Yesu sinenan sape kila meraravan sane ðelaga marua na sanene, taþatete asikol amio suri vii la naña naga pian la ke ea, ana pisa þakaiwa tai e lepas nene pan la. Pisape “Taþatete ola kinakinas nen kulmrae vii tai, naña ovitolþa kinakinas tai, ana osuluar e kulmrae marua vena kilawo pulus naña teke ea. Visae sanene, yoko opitol þa kare kulmrae vii nene narui, ana kana kinakinas, yoko taþatete nena marana ve sa ke kulmrae marua nene, ana apisu piowa ga. ³⁷ A taþatete okokonia kuruta vii naña mñeke þeþela ke ga wa va e kulus nen nane tai naña pe urmarua, naña akon kuruta pa e yam moki li rui. Visae

okila sanene, yoko kuruta viu nene lapa, kila kulus nen nane nañani m̃apo, ana kuruta nene lau kare ga ne, ana kana pias m̃ena imi viowa nena ga. ³⁸ Ana kuruta viu, monar okokonia va e kulus nen nane naña naga m̃ena pe urviu, naga m̃arera ruru po, a okilia oligan ruru moña kuruta mon m̃a ea. ³⁹ A pogos m̃ena naña yar la amun kuruta naña amiyuñāen towe laa nanua rui, yoko ve sinelan re si munen kuruta viu, naña amiyuñāen mare ga na wa, ana yoko monar avisave kuruta marua naga kiki laa sane.”

6

Yesu pe suñen Legiena Wa Matiu 12:1-8; Mak 2:23-28

¹ Ana e sina ga e legiena tai, naña pe Legiena Wa, Yesu amio kiena nalogena lala amiyaloro apano, a kiela mrapa pa p̃aro e lokove na kona lala. La amiyal m̃a sanene, ana nalogena lala viso kar la ana akawe plan kona lañas nañani, apae vania, akania. ² La akila ke sanene, ana Varasi lañas asuñā e nañani, apisu ke Yesu lala, ana apisa pania, apisape “Ei, komin ya ne asuñā akila ke yuñāena nene e Legiena Wa sanene? Visae sanene, asuñā akilaro ke kieta navisaluaena ne.”

³ Ana Yesu pisatām̃e la, pisape “?Pona pe apuloli re Visena Wa pog tai poli yo wa, e sur la naña Parin Suñe Tepet nanua naga kila? !Kam na akilia pa rui! Naga amio kiena yeririna lala la viso kar la manenea, ⁴ ana naga pa loyuñā e yuñā wa m̃ana Ntewa, a naga mla kilaparavi

wa naŕa Navisaluaena sape yar wa ga la akilia akania, ana Tepet amio kiena yeririna la akania.”

⁵ Ana Yesu pisa pan la, pisape “Inu Narina ne Yeririna, inu ke narui nepe suŕen Legiena Wa, ana inu ga nekilia nevisa ya naŕa popon akila e Legiena Wa, pona ya naŕa pe pon re akila poli.”

*Yesu kila ruru limaulu tai e Legiena Wa
Matiu 12:9-14; Mak 3:1-6*

⁶ A e si e Legiena Wa tai, Yesu pa si loyuŕa e yuŕa na leniena, pian la. Ana poglis nene yar ŕena tai sike loyuŕa naŕani, limana marua pulu. ⁷ Ana navianen navisaluaena lala, amio Varasi lala, naŕa la sinela kar Yesu rui, asike ga lavisinia e poglis nene, asuŕa apisuar ruruia pisa, vena asape alual li ŕelaga viowa laŕasa e naga, ana la sinelan asape avisu sane yoko Yesu kila ruru limaulu naŕani e kiela Legiena Wa nene pona yoko ve kila re.

⁸ Ana Yesu kilia ruru make ya naŕa sike e kiela sitomena, ana pis pa yar naŕani, sape “Osuŕalu, ovam osu metava e nini sumo wa,” ana naga suŕalu pavini. ⁹ Ana Yesu piun tan la naŕa asike e ne, pisape “?Kieta Navisaluaena sape tekilia tekila ya ne e Legiena Wa? ?Pisape popon tekila sur wo pona popon tekila sur viowa? ? Pona pisape popon tetamalia yaru, pona popon towemŕar yaru?” ¹⁰ Ana Yesu pisuveve la make ga, ana pis sina pa yaru naŕani, pisape “Lumuŕa visilia!” A e ga e pogos naŕa yar nene kila sanene, limana naŕani pimi po nenaga.

¹¹ Ana le Varasi lala sinela mimi, naña sane amloge mlae pañisi, ana apa vanua apisayu weleli sane yoko akila ve sanape na va Yesu.

Yesu mliganar kiena nalogena la lualima taaga pa lua

Matiu 10:1-4; Mak 3:13-19

¹² Ana siraunia, e sina e pogos tai, Yesu pa metava e pupia tavie tai vena naga se ea, len va Ntewa, ana sumã kila ke sanene e yo nañani pa tol yemlagi. ¹³ Ana kolulag na pitomi pio kiena nalogena lala apimi lele taaga puna, ana e la nene, naga pisawal la lualima taaga pa lua naña naga mliganar la pisape la narui, la ape nalologena.

¹⁴ Ana kia kiena ne la lualima taaga pa lua nanini:

Saemon, naña Yesu mligan kiena kia tañena, sape Pita,

a wenla naña Antru,

a Semes, a wenla naña Yoane,

a Pilip,

a Patalomiu,

¹⁵ a Matiu,

a Tomãas,

a Semes, naña narina ne Alpeas,

a Saemon, naña sape mñene plan le Rom lala,

a Sutas, naña narina ne Semes,

¹⁶ a Sutas nae Kariot, naña siraunia naga kom varaun Yesu.

*Yesu sumã mlologo a kila ruru namaiena lala
Matiu 5:1-12*

17 Ana Yesu ðere nalologena la nene apitom si tano, ana aal yotop tai, apa asike ea. A poglis nene, nalogena kiena ne Yesu taena lala apule ga asike ea, amio mena pupia ðina lala na pulkumali taena lala nae Yutea, a le Yerusalem mena lala, amio le Taea a le Saeton lala, naa amolue e kiela yo lala garo losi lavisin sive apami. 18 La nene apamin asape aloge visena lala kiena ne Yesu, a la sinelan asape kila ruru kiela maiena lala. Ana Yesu kila ma sanene pan la pano-o, naga kila ruru mena la naa yermare lala asuma akila kare la ke silaga.

19 Yaru la moki manene paisi, ana la punu ga sinelan asape atol ga Yesu, vena la aninuli ga pupia namareraena naa apisu sane suma malivi ke ea, naa suma kila ruru ke yar la moki rui.

Navianena lala kiena ne Yesu

20 Ana Yesu kira pisu kiena na-logena la nene, ana pian la, pisape:

“Kam naa apisu kilale sane limamiu koren ga, navisa ruruena sike e amiu, komin amiu ke narui naa Ntewa naga pe ðarin suen amiu, ana visuar amiu.

21 Kam naa viso kar amiu ke nagane, navisa ruruena sike e amiu, yoko aloge sane aim aulemaamaga nena ga e suri wo ne lala.

Kam naa atagi ke nagane, navisa ruruena sike e amiu, yoko akilia akekara.

22 Kam naa yar la pe akekaran amiu re poli, a naa asuma yepel mavin amiu, a naa

asumã apisa kare amiu, a asumã akoven plan ke kiamiu kia lala sane kam na ape yar viowa ga lala, nanene komin naþa kam na ape yar kiena ne inu Narina ne Yeririna, navisa ruruena sike e amiu.

23 E pogos la ne sanene, ve asitom manene re, aulaula ga warar pupia kekarena, komin naþa asumã akila kare amiu ke ga e þelaga m̃a nena naþa repila lala akila pa navisawalena la nanua sumo. Ana pogaga, yoko awar kiamiu pupia nalaena ma e peni.

24 Ana kam la naþa ape nasur moki manenea, yoko viowa manene laa van amiu, komin naþa aþar kiamiu nalogewoena a kiamiu nakekarena lala e kiamiu malena wo la na yomarava nini rui.

25 A kam la naþa m̃eþemiu pulemamaga ruru pa sike rui, yoko viowa van amiu vaþisi, komin naþa yoko viso kar amiu manene va laa sane.

A kam naþa apitale ke nanagane rui, yoko viowa van amiu vaþisi, komin þisi na aloge viowa, atagi.

26 “A monar avisuar ruru amiu pogos naþa yar la asumã amieluar ke kiamiu kia. Visae ve sanene, pe pon re amiu m̃ena asitom ke asape amiu na apo, komin naþa navisawalena navisokanena la nanua sumo, kieta yermarua la amiyeluar kiela kia la sanene, ana Ntewa pisu la sane la apiowa ga ana mla nakoena pan la.”

*Yesu pisayu sinesien manene nasinekar lala
Matiu 5:38-48, 7:1-5*

²⁷ Ana Yesu pisape “Kam la naþa amloge kilale ke kiau visena nene, in na nevisa van amiu, nevisave: Monar sineta si kieta nasinekar lala, a monar tekila wo van la naþa pe asitom ita re poli, ²⁸ a monar tevisa ruru la naþa apiuelin ita, a monar telenwo la naþa akila kare ita. ²⁹ Visae yar tai lipa pipimã lepas tai, ko monar ovilopu mēna pipimã lepas þasia vania vena lipa, a visae yar tai māreran van ko vena war moĩa kulsaket, yoko monar okekaran ga war mēna moĩa kulsota. ³⁰ Visae yar tai viun kioĩa sur tai, monar ola vania, a visae yar tai lalua kioĩa suri tai, yoko ve ova oviun re si tania vena lamaran si van ko. ³¹ Pelaga ya naþa sinoĩan vena yar la akila van ko, þelaga ne nanene yoko monar okila van la.

³² “Visae tesuĩa sineta si ga yaru la naþa asitom ita, nanene na pe sur re tai nene po laa wa, komin yar nakilaen mlamulena viowa lala asitom ke la naþa asitom la rui. ³³ Pona visae tekila ga wo van la naþa akila ke po pan ita rui, naga mēna pe sur re tai nene poli, komin yar nakilaen mlamulena lala, la mēna akila ke sanene rui. ³⁴ Pona visae tetaĩan ga kilavaru va la naþa akilia alamaran sina, naga mēna ga pe pe sur re tai nene po laa wa, komin yaru nakilaen mlamulena la akila ke yuĩaena nene silaga.

³⁵ “Ana in na nevisa van amiu, nevisave: Sinemã si kioĩa nasinekar, a okila wo vania, a otaĩan ga kioĩa kilavaru sa ga ne, naþa ve

ositom manene re van naŕa omla pania, ovisave pona kilia lamaran si pogos tai, pona taŕatete si lamarana. Visae osuŕa okila ke sanene, osuŕa okus ke ŕelaga kiena ne Arimata Yaru na Meta ne, a naga yoko la nalaena tai van ko ve keviu laa sane, komin naŕa naga yar sur naŕa sinen po pan la naŕa pe apisa re potena pan poli, pona la naŕa asitom la ke sina. ³⁶ Sanene, ko na monar sinena ye yar lala sa naŕa Arimata naga sinena miye la.”

Yesu pisayu naliŕereen yar taŕena

Matiu 7:1-5

³⁷ Ana Yesu pis ke pan la na wa, pisape “Yoko ve aliŕere manene re yar taŕena pona ala nakoena vania. Visae sanene, yoko Ntewa taŕatete liŕere manene amiu, taŕatete la nakoena van amiu. Visae aviewo yar taŕena, yoko Ntewa viewo amiu, ³⁸ a visae ala sur va yaru taŕena, yoko Ntewa la sur imi van amiu. A yoko Ntewa laa van amiu ve keviu la sane taulu naŕa amlavia, yoko naga war ve moki vaŕisi, sa naŕa akokonia karo, atanaria, yoko amiyalar ŕena ga, pano-o pulemamaga ruru nenaga, suri laŕas kekapil pito ke tano. Lelaga paŕisi, yokorena awar imi pun amiu maran ve taaga sa ke ga naŕa aŕarwar ke pan yar taŕena.”

Monar avisuar ruru kiamiu malena

³⁹ Ana Yesu pis ke pan la na wa, pisa ŕakaiwa tai pan la, pisape “?Sanape, visae kilamara ŕala tai suŕa ga, ana naga kilia sumon kilamara ŕala taŕena tai lalua ayalŕel woga ga? !Peraga,

yoko la ga luwoka aloru ato e ðiliðili tai ne!

⁴⁰ Nalogena naga pe pa manene re metavan yar naða pian ke naga poli, ana visae naga kilia ruru make sur la naða navianena piania, yoko naga imi maran ve taaga sa ke ga kiena navianena.

⁴¹ Pe pon re osuũa ovisavisa ke narin kororaki tai naða teke e kilamarana ne womla poli, ana pe opisu kilale re osape pupia purðes nen laki tai meke e kilamaraũa poli.

⁴² “?Sanape na osape ovisa va womla nene, ovisave ‘Wolai, yoko nowarlua kone kororaki na kilamaraũa wa’? Sanene ko na pe opisu kilale re kioũa mlamulena viowa poli, a osuũa omliðere ke ga mlamulena viowa kien yar taðena lala. Okiliaũa naða ko opiowa ga, ana osape okila sane yar la asape ko opo rui. Okus lua pupia miasin laki na meke e kilamaraũa sumo wa, ðisi na okilia ovisuveve narin kinakinas nen kororaki naða teke e kilamaran yar taðena nene.”

Purlaki amio mrasa

Matiu 7:16-20, 12:33-35

⁴³ Ana Yesu pisa mũana ga, pisape “Purlaki naða po taðatete war mras naða piowa, a purlaki naða piowa taðatete war mras naða po. ⁴⁴ Ee, sanene narui, naða tevisu kilale purlaki, tesape sanape e ga e mrasnela. Mralaki la naða mam ruru po, pe toðar re e viluũaini la naða pe nenos poli, peraga. ⁴⁵ Yaru naða po naga miyuwon ruru suri wo la sike e losinena, ana silaga kiena sitomena wo suũa ga naða kilia visaplania, ana

yaru viowa naga suña ãarpolo ke suri viowa e losinena, ana naga visa plan ga sitomena viowa lala. Suri ya naña pule sike e los nen yaru pona e kiena sitomena, sur ne na nene narui yoko suña molmolue luen ga e gona.”

Yumã lua

Matiu 7:24-27

⁴⁶ Ana Yesu pisape “?Komin ya ne apio in ke asape ‘Suñe o, Suñe o,’ ana siraunia pe asumã amlogear re ya naña nepisa pan amiu nesape akila poli? ⁴⁷ Yar naña pimi pun inu, mloge kiau visena, naga monar logearia a monar kila. Yar naña kila sanene naga sa naña suniena tai pisayuia, naña pisa sanini: ⁴⁸ Yar tai suña kila ke mña yumã, a yaru nene pe manmarua ruru po, kil ãiliãili la pito manene tano vena tol yo mñarera tano, ana maplar kemrañe lala e pulus la nañani. Ana pogos na pog mñarera, pupia womie lau, ana tañatete nena kila yumã nene kulul, komin naña yar na kila, kila ruru mñarera po. ⁴⁹ Ana yar naña mloge kiau visen lala, ana pe mlogear re poli, naga sane yar tañena tai. Yar nena, naga mña miyumaen mña yumã tai, ana naga pe wowe ga, miyumaen mña yumã suñal yau ga e porotano, kana kemrañe ne la pe pito manene re nena tano poli. Ana pogos naña pog mñarera, pupia womie mlau pitomi, kil lua yumã naña, kilalua mloru, ana yumã naña pororovia, piowa make nenaga.”

7

Yer kawa na mara nae Rom tai mlelaga mñarera

*e Yesu**Matiu 8:5-13*

¹ Ana pogos naña Yesu pisa plan kiena navianena la nañani ñisi, naga pa loyuma e pulkumali nae Kapeneam. ² Ana e yo nene, nasumonon li na mara nae Rom tai sike ea, ana naga kiena yar wo na yumaena tai naga mai pañisi, lavis ga kovio. ³ Ana pogos naña mloge yar la apisayu ke Yesu, asape pimi ke lavisin kiela yo rui, ana pio nasumonena kiena ne le Yu lala, pitetalia la apanon Yesu, vena aviun tania imi kila ruru namaiena nene.

⁴ Ana la nañani apim puna Yesu, apisayu namaiena naña pania, ana apiun manene tan sanini, asape “Nasumonon li na mara la nene, popon sa oimi oiila naga. ⁵ Lelaga naña sane naga pe ita re tai nene poli, naga pe yere Rom ga, ana naga pe yar tai naña sitom manene kieta ñegas nen yeririna la pañisi, ana naga mña miila imimi e yo nini keviu pañisi rui, naña miyumaen kiamimi yuma na leniena. Ana visae ko okekarania, oim ovisu kiena yaru nene naña mai pañisi.”

⁶ Ana Yesu tañania, ana pa amio la. La amial apano, ana pogos naña asike towe laa perinan yuma mña nasumonon li na mara nena wa, apisu yaru lañasa amiyal ke apimi. La nene, erau kiena ne nasumonena si lañasa, naña naga pitetalia la si apim puna Yesu, vena avisa kiena visena tai vania. Ana la apim apisawal pa Yesu, apisape “Yere Rom nañani mligan imimi mepim si puma, pisa sanini, pisape naga sumña kila kare ko pañisi. Naga pisape naga pisu sa naña naga

pe yaru tai naña pe torokin re oim m̃ana loyuma poli. ⁷ A sitomena nene kila naga pisu sane pe pon re m̃ena naga imi kate puña poli, komin naga pe pe yere Yu re sane ko poli, ana naga pisa ga pisape, visae ovisa ga visena tai, yoko kiena yaru nene loge wo woga ne. ⁸ Naga kilia sape monar ve sanene komin naga kilia sape kioma visena naga namareraena sike ea. Naga sape suri nene naga sane li na mara la naña asike vatanonia, naña la monar alogear kiena visena. Visae visa van tai, visave 'Ovano,' naga monar vano, pona visae visave 'Oimi,' naga monar imi, pona visae visave 'Okila sanene,' yoko naga monar kila. A naga m̃ena sape monar kila ya naña pupia yerkawa nasumonen li na mara la pisa pania. Naga sape naga sitom sanene narui, visae ovisa ga sur tai, ana monar ve sanene."

⁹ Pogos naña Yesu mloge visena nene, naga milan sitomen kiena ne nasumonen li na mara la nene pañisi, a kekaran pañisi, ana pis pa p̃ina la naña asike amio e poglis nene, sape "Nevisa van amiu, nevisave pe noñal re nena yere Yu tai naña sumal m̃arera se e in sane yar nene poli."

¹⁰ Ana siraunia, la nene añasuñela si apa m̃ana nasumonen li na mara la nañani, ana la amilan naña apisu namaiena nene pimi po si rui.

Yesu kila si m̃ee kiena letano tai mal si petan marena

¹¹ Ana siraunia, pe yam piavi re poli, Yesu mial pa tol pulkumali tañena tai, kiena kia Naeni, a sa naña silaga, kiena nalogena lala amio yaru tañena la moki asuma ataveve ke naga. ¹² Ana

pogos naña Yesu lala apim ke lavisin pupia mralaea na pulkumali nene, apisu sane yar la amiyalvai apim, asumña akus ke yar mare tai pano vena ava asinia. Naga naña mare ne, naga m̄ee tai naña anena pe letano. Letano nene, naga pe p̄ar re si narina tai poli, naga p̄ar nena taaga ne nane mare narui. ¹³ Ana Yesu la asumña apisu ke la naña amial apim, ana pogos naña kieta Supe pisu letano nene, naga sinen mie pano-o p̄isa. Ana pa lavisinia, pisa pania, sape “E, tagen toko.” ¹⁴ Ana Yesu pimi lavisin marena nene, mligan limana tea, a la naña akus pa ke ne asumñalar la asu, pe amiyal re si poli. Ana naga pis pa yar mare nañani, pisape “E, nevisa van ko, osuñalu si na wa.”

¹⁵ Ana m̄ee nene suñalu, suña pivis pan la, apikevike van sina, ana Yesu sumon naga pano, mligan si pa anena. ¹⁶ Ana pogos naña yar la apisu sur nene, sinela kurkur pañisi, a asumña amieluar Ntewa, asape “!Ake, suwala! Pupia navisawalena kiena ne Ntewa suñalu nena sike likan ita rui.” A lañas apisa m̄ena, asape “!Lelaga p̄a! Ntewa pimi katen kiena yeririna la rui.” ¹⁷ A suniena na suri nene, asumña apisalelein pano, pano-o tol lepas naña Yutea, amio yo tañena la naña asike lavisinia.

Yoane Nakeena pitetalia kiena nalogena lala apim pu Yesu

Matiu 11:2-19

¹⁸ Ana e pogos nene, Yoane Nakeena sike e yuñña nakoena rui, ana kiena nalogena la apim apisayu pania e sur la punu ga naña Yesu suña

kila. ¹⁹ Ana Yoane pis ga pan lala lua, pitetalia la apa puna kieta Suþe, vena ava aviun ruru tania, avisave naga Navisaarena naþa asumãate ke ne, pona pe naga re poli. ²⁰ Ana la amial apim apisu Yesu, apiun sanini pania, asape “? Kiamimi yerkawa naþa Yoane sinenan sape kilia sanape? ?Ko na yar sur naþa apisa nanua sumo asape yoko yerkawa tai imi ve kieta nasumon itaena, pona pe ko re na nene poli wa, a monar mesumãate ke yar nene yoko imi na wa?”

²¹ Ana e nena e pogos naþa apim apiun naviunena nene, Yesu sumãa kila ruru ke maiena lala a sumãa pile plan ke yermare petan yeririna lala, a sumãa kila ke kilamara þala lala, kilamarala la pimi po sina, ana nalogena kiena ne Yoane la apisu sur la nene. ²² Ana Yesu pisatamãe la, pisape “Awasuþe amiu si ava puna Yoane, ana avisawal sur ya naþa apisuia pona amloge e nini. Suri la nene asa ga naþa navisawalena Aisea pisa pan amiu rui, naþa sape:

‘Kilamaraþala lala, nanagane apisu si suri rui,
a laulu lala nanagane amial ruru si rui,
a yaru la naþa aþar leperosi, nanagane tasnela
la mekik ruru si rui,
a kiligapoþe lala, nanagane amloge si suri narui,
a yar mare lala, nanagane amal si rui,
a la naþa limala korena, nepisawal Lologena Wo
pan la rui.’

²³ Ana ava avisawal m̃ena va Yoane, avisave ‘Yaru naþa pe sinen peve lua re e inu pog tai poli, navisa ruruena sike e naga.’ ”

Yesu pisayu Yoane Nakeena

²⁴ Ana pogos naña nalogena kiena Yoane la amolue sina vena awasuþe avano, Yesu pisayu Yoane nene pa yeririna la naña asike ne, sape “? Pogos naña apa þesan e yokorena nene, apanon asape avisu ya ne? !In na pe nesitom re nesape apanon ga avisu kana kiai ne la poli, naña sisilin kare ke ga sanene. ²⁵ A in na pe nesitom re mña nesape apa apisu yerkawa tai naña miyen mña kulsota nowo la poli, po sike e malena naapo, komin yaru sur la ne sanene, la pe asusu re e yo viowa la ne sane yomema nene poli, ana la asike ga e yumña naapo mña þarin suþe keviu lala. ²⁶ Peraga, ana in na nesitom nesape apanon apisu navisawalena tai, ne? Nanene naapo ne, ana nevisa van amiu, Yoane naña apanon apisuia, naga pa laa sane, naga taulu navisawalena nasumo lala, ²⁷ komin naña Ntewa pisayu naga e kiena visena wa rui, sape

‘In na nemligan þesan kiau yaru na waren visena nene pitomi pun ko, vena kila ruru kioña mrapa.’ *Mal 3:1*

²⁸ “Lelaga nevisa van amiu, sane e yomarava nini Yoane Nakeena nene naga mon metavan make yar la punu ga. Ana la punu naña yoko aim e nasuþenena kiena ne Ntewa, vito tol kiela yar maro naña sike laa tano, la punu nene la asike metavan Yoane, naña yoko la awar navisa ruruena kiena ne Ntewa va laa sane taulu naga.”

²⁹ Ana pogos naña apa amiyagogon Yoane Nakeena mlologo, naga pisawal mrapa kiena ne Ntewa vena la akilia avilopu la. Ana yar viowa

la moki, pa tol m̃ena yaru na takis lala, apisu sane mrapa nene pe lelaga, ana apilon la, ana Yoane kee la e wii. ³⁰ Ana yar taṣena lala, sa naṣa Varasi lala amio navianen navisaluaena lala, la apilopu m̃asila e mrapa naṣa Ntewa kila vena akilia avilon la ea, ana Yoane pe kee la re poli.

Yesu pis m̃arera pa yeririna la e kiena pogosia

³¹ Ana Yesu pis m̃arera pa yar na vilaveena lala e poglis nene, pisape “?Yoko nevisa visena ya naṣa kilia tol ṣelaga ken la na nagane, sane la ape yar ya? ³²⁻³⁴ E lepas punu ga naṣa Ntewa kila vena kilali wo van amiu, ana yepemiu mavin ga, apisa kare ga naga vanonia. Komin poglis naṣa Yoane pimi, naga suṃa monsilun kinanena vena len, a naga mlon kuruta namunena, ana yaru la apisu sanene, asuṃa apisayuia, asape ‘Yaru nene, yermare sike e naga.’

“Ana pogos naṣa inu Narina ne Yeririna nepim nesike na, nekinan ruru ga a nomun ruru ga, ana apisayu si inu ṣisa, apisape ‘Apisu ke ne, yaru nene naga kinan merorol paṣisi wa, naga pe yar na mun maneneen m̃ena kuruta, a naga kiena erau lala, yar na warpoloen ga takis, a yar viowa ga lala.’

“Komin sur ne nanene nepisu yeririna na nagane lala asa ga ninis la naṣa visae asuṃa akila kokan ke e yepesinas na kumali, yoko la aviovio kiela narin erau lala, avisave ‘!Ei, kam na apilon manene visena na! Visae mowe ke plaṣe, ana pe sinemiun re wolen amio imimi poli, pona visae meyaun ke yauena na marena, ana pe sinemiun re atagipae amio imimi poli.’

³⁵ “Sur ne na nene, yeririna la yepela mavin mrapa lala kiena ne Ntewa, ana mras wo naña molue e malena kiena yaru naña taveve ke mrapa kiena ne Ntewa, kilologia sane mrapa ne nanene narui, naga pe mrapa na manmaruaena naña lelaga.”

Sira tai mloge kemua piowa lelaga e kiena mlamulena viowa lala

³⁶ Ana Varasi tai, kiena kia Saemon, naga sape sinenan kila kinanena tai ve kana Yesu, ana Yesu pa m̃ana, pa totano vena akinana. ³⁷ Ana e pulkumali nena, sira tai sike ea, naña naga kila p̃elaga viowa la moki pañisi, ana naga mloge naña Yesu pa kinan ke m̃ana Varasi naña Saemon ne. Ana sira naña pisu kiena mlamulena viowa, mloge piowa manene laa, ana mloge sane monar imi visu Yesu, ana kus kiena piawi tanea tai na ponotaninu, kus pimi e yuñã nañani. ³⁸ Ana Yesu pelein ke sape kinana, ana sira nene pimi suñal su varaun lana, naña wamarana mlau, kekapil pito ke e lana ne Yesu. Wamarana kee ke lana sanene, ana tar viluna la naña piayavi ne, suñã miyumuvan ke lana Yesu, a naga pelan pipina komp̃asa te lana ne Yesu, a yokorena taron ponotaninu nañani ea.

³⁹ Ana Varasi naña p̃ere Yesu pimi m̃ana, naga pisu ke sur nene, ana sitom piowa towe ga ea. Naga sitom ke sanini, sape “Visae Yesu nene naga pe navisawalena tai naña lelaga, pona vera na kilia ruru yo rui sane sira nene naga pe sira na mlamulena viowa na sanene, ana yoko ve tañan

re tol lana wa nene. Ana naga tañan kila sanene, in na nemninue kare narui.”

⁴⁰ Ana Yesu na kilia ña kiena sitomena nene, ana pisatañea, sape “Saemon, in na nesape nevisa visena tai van ko sumo wa.”

Ana tañania sape “Pogaga, Navianena. Okilia ovisa.”

⁴¹ Ana Yesu pisatañe sanini pania, sape “Yerkawa tai, ana yar lua akila lapui pania. Lallua nene, tai na kiena lapui keviu, komþasa naga kiena lapui keviu manene laa pañisi. ⁴² Ana pogos na ulmaranen lapui la nene, la ga luwoka apulmaran ðele ga, ana yerkawa nañani sinen mie la, ana piwo make kiela lapui la nene pan la. ?Ana komin sur ne nanene, lallua nene ane sitom manene yerkawa nene?”

⁴³ Ana Saemon pisatañe Yesu, pisape “Nemninue ga, pona naña kiena lapui keviu manenea naga monar sitom va laa sane yo.”

⁴⁴ Ana Yesu pisape “Ee, sa ke nene narui.” Ana Yesu þarpuia kilologia sira nañani pa Saemon, sape “Saemon, pogos naña nepim moña, pe nomal re yar tai þar wii pimi pan inu poli vena nekevan kororak na mrapplepa e lau, sane e kieta þelaga na, monar okila. Ana opisu ke sira nini, naga ke naña kevan lau e wamarana narui, a miyumuvan si mema e viluna. ⁴⁵ In na nepim moña loyuña, ko na pe otalopan ruru in re poli, sane nepe kiomña erau wo tai, ana siar e pogos naña nepim loyuña, naga mligan pipina lepas þasia te lau silaga. ⁴⁶ Ko na pe oþar re ponotaninu pimi otaron pito e þaruu po, ana naga kila e lau rui. ⁴⁷ Ana nevisa ruru van

ko, nevisave sira nene, kiena mlamulena viowa moki pañisi, ana nepiewo make ga rui, kila narui naga sinena sii inu keviu pañisi. Ana nepisu yaru naña kiena mlamulena viowa pe keviu re poli, nepiewoia, ana naga pe sinen sii manene inu re poli.”

⁴⁸ Ana Yesu pisa ruru mēna pa sira nañani, pisa pania, sape “Kiomā mlamulena viowa la naña ositom pēle ke ne, nepiewo make rui.”

⁴⁹ Ana pogos naña Yesu sumā pisa ke visena nene, yaru tañena la naña akinan ke amio la e pogos nene pe akekara re nena poli, asumā apragogo pan la, apisa ke asape “?Ana yaru nene sinenan sape naga ve ai, naña naga pisa ke sape naga p̄ar plan ke mlamulena viowa kien yar la sanene?”

⁵⁰ Ana Yesu pisa si pa sira nene yam tai, pisape “Kiomā naviawaena kila otol natamaliaena rui. Ve ologe re si viowa, okilia ova narui, a sumāre kiena ne Ntewa sike amio ko.”

8

Sira la moki naña ataveve Yesu

¹ Ana pe yam piavi re poli, Yesu mial sina pano, pa kome pulkumali lala, la naña ve torokak amio la naña kerkeviu, a e yo punu ga naga sumā mlologo, a sumā mla lologena wo nasuñenena kiena ne Ntewa pimi pa yeririna lala. Ana sane silaga, kiena nalualima taaga pa lua la mēna asike amio e pogos nene, ² a sira la moki li m̄a naña la asumā atavevela. E sira la nene, lañasia

naña Yesu taña ruru la petan ninuna viowa lala a e inanena viowa la naña se e la, sa naña Maria nae Maktala, naña sumo yermare la olua ase e naga, ³ amio Soana, naña naga wona ne yar naña Kusa, naña naga pe yerkaawa na kilaen yuñena kiena ne Parin Suñe Erot, a amio mña Susana nene. A la moki manene ke sina ga, naña la asuña amiila Yesu lala keviu pañisi, a la asuña apisuar la e nalaena la naña asuña añar ke pan la.

Pakaiwa na kurus nen viluñini naña kekapil e porotano na pe taña vari

Matiu 13:1-9; Mak 4:1-9

⁴ Ana e pogos tai, pupia ñina na yeririna lala la moki amolue e kiela pulkumali la peve taaga, ana la apimi amiervivi Yesu piora, ana naga pis pan la, kuan ñakaiwa tai pan la.

⁵ Naga pisa sanini, sape “Yar tai sape va veven kurusia e kana lokove. Pogos naña peven kurusia, suña sisilinia, ana kurus lañasia amloloru e mrapplepa, a siraunia, yar la apim amiyaloro ea, apie kare ga, a manu mña lala apimi ate plan make ga. ⁶ A kurus lañasia amloloru e yo naña kilavaru sike ea, pitotovi pavini, ana yoko miaiai ga, komin naña pe wii re e yo nene poli. ⁷ A kurus lañasia mloloru e yo naña sumo na pe ate plan ruru re kilika viowa e poli, ana yoko siraunia kilika viowa nene kapur ke sina ga pimi keviu, kewo make kurus la naña pitotovi ne-e amarmare. ⁸ A kurus taña ne lañasia amloloru e porotano naapo tai, ana la apitotovi akapur

m̃a pano-o, la aṗar mrasnela la moki, tol ponotia taaga.”

Ana pogos naṗa Yesu pisa visena la nene ṗisi, naga pion manene pan la, sape “Yar naṗa kiligana teke ea, monar yagogon ruru visena nene.”

?Komin ya ne Yesu pis e ṗakaiwa lala?

Matiu 13:10-23; Mak 4:10-20

⁹ Ana siraunia, nalogena lala apim puna Yesu apiun kinas nen ṗakaiwa nene tania. ¹⁰ Ana naga pisataṃe la, pisape “Ntewa kila sanene sape vena akilia alual nakilia wanena na kiena nasuṗenena.

‘Ana e yar taṗena lala, nakilia wanena la nene la atapolou asike e ṗakaiwa na wa, ana la asuṃa apisu pano-o, pe apisu kilale re poli, a la asuṃa amiyagogo pano-o, pe amloge kilale re nena poli.’ ”

Ais 6:9

Yesu pisavan kinas nen ṗakaiwa na kurus nen vilum̃ini

¹¹ Ana Yesu pisavan ruru ga ṗakaiwa nene pan la na wa. Naga pisapenua “Pogaga, kinas nen ṗakaiwa nene naga sanini. Sur nasumo, naga kurusa, a naga na sane visena kiena ne Ntewa.

¹² A kurus la naṗa akekapil mrapplepa, naga na sa naṗa yar la ne amloge visena nene, ana kurus nowo lala mloloru pitomi e kiela sitomena lala. Ana Ṕarin Yermare nene pimi ṗar plan ke sina ga visena la nene petan sinela lala, vena kila sane ve alelaga re sina, ve atol re si natamaliaena.

¹³ “Taṗena, naga kurus la naṗa asike e yo naṗa pe kilavaru, a na nene sane yar la naṗa

amloge lologena wo nene, amlavia, akekarania, ana sa naña p̃eligas nela pe po re poli. La asumña amlelaga yam plas ga, a visae atol pog m̃arera, pona nakilaliena imi, yokorena la aloloru ke sina ga.

¹⁴ “Taņena m̃ena ga, naga na kurus la naña asike e lelen kilika viowa lala, a na nene sa naña yar la amloge, ana pogos naña la amial ke apa sane, ana asitom manene laa kiela malena lala, a sinelan manene m̃ena kilavaru, a akekaran manene m̃ena kekarena na yomarava la nini paņisi. Pelaga la nene apimi sane kilika viowa tai naña piwo la, ana taņatete nena kiela malena war mras naña marua ruruia.

¹⁵ “Ana na maro, naga kurus la naña sike e porotano naapo, nanene naga sa naña yar la amiyagogo ruru e Lologena Wo nene, ana amligan ruru sike e losinela lala, atarar ruru m̃arera, naña ape lelaga kemua. Yeririna wo la ne sanene, la akila kiela sitomena la viayavi, ayum̃ae ruru m̃a vano-o awar mras nen Lologena Wo nene e kiela malena lala.”

Pakaiwa na kapi vivaga

Mak 4:21-25

¹⁶ A Yesu pisa m̃ena ga, pisapenua “Ita yeririna lala, visae towar kap vivaga imi, yokorena ve yar tai warwan re m̃eke vatanon karo tai pona sur tai sanene. Peraga, tetelan ga m̃eke metava vena kila yar la naña aim loyum̃a la avisu naña yo merarava ruru nena ga. ¹⁷ Pogaga, ana nasuņenena kiena ne Ntewa naga sane kap

vivaga nene, naña nanagane suña mǎlmǎlivilin ita vena tegoli make suri punu ga. Suri punu ga naña tapolou sike ga wa, a nakilia wanena punu ga, yokorena la monar amolue e yepesinasa vena yar la akilia avisu kilalea. ¹⁸ Kam na monar ayagogon ruru kiau visena lala, a akilali naña asitom ruru la. Yar naña kiena suri moki rui, yokorena naga war va ve mok manene vañisi. Ana yar naña limana plasan suri lala, yokorena naga kilalu kiena narin sur nene naña naga sitom ke sape pe kiena pa rui.”

Anenane Yesu amio wenla lala, apim asape aurelua naga

Matiu 12:46-50; Mak 3:31-35

¹⁹ Ana anenane Yesu amio wenla lala apim aporun naga e pogos nene, ana la akila ãele yon naña ava atol naga loyuña, komin naña ãina la moki, kila yo ve tokak ga. ²⁰ Ana yar la amla lelein ga visena pimi tol Yesu, asape “!Ei, anoña amio womla lala asuñalu asike vanua, sinelan asape avisu ko sumo wa!”

²¹ Ana Yesu pisatañea, sape “Naga naña pe aneu, pona pe wolai, nanene na la ga naña amloge visena wa kiena ne Ntewa, a la asuña akila ke sa naña visena nene pisa.”

Pupia lagi naña Yesu pisaluñaria

Matiu 8:23-27; Mak 4:35-41

²² Ana e legiena tai, Yesu ãere nalogena lala, la apa amiyai e waa tai, ana Yesu pisa pan la, sape “Ita, yoko teva e lepas nen lapa nene lepas

ṗasia.” Ana la amligan yo, asuṃña apano, ²³ ana pogos naṗa waa kiriri ke pa narui, Yesu maran kawa pano-o momalio. Ana siraunia, pupia lagi tai miyui, miyu lapa naṗani, ana pupia sive lala akilapela pano-o sive pule e pulu waa, apisu sane piowa ga narui. ²⁴ Ana apito apioṗege Yesu, apisa pania, asape “!Suṗe, Suṗe, lavis ke tetalilu narui!”

Ana Yesu suṃṃalu, pisaluṗar lagi amio sive ṃarera la nene, ana sur la nene apito tano, yo ṃano ruru nenaga. ²⁵ Ana Yesu pisa pan la, sape “?Awa kiamiu naviawaena?”

Ana amarau pano-o, amilan manene paṗisi, ana asuṃña apiuviun ke sina tan la, asape “?Aulai, yaru ya nene? Naga pis ga sanene ana lagi amio sive, lalua amlogearia. !Suwala!”

Yesu pile plan yermare moki petan yere Karasa tai

Matiu 8:28-34; Mak 5:1-20

²⁶ Ana Yesu la apa atol lepas ṗasa, e naṗa Kalele kira ke pa ea, nanene mesmesun e yo naṗa Karasa. ²⁷ Ana pogos naṗa Yesu pa ura e yo nene, yar nae e yo nene tai pitomi pitawea, naṗa yar nene yermare la asike ea. Nakonua rui, yar nene pesinas ga, pe miyen re sur tai poli, a naga pe mon re e yuṃña poli, naga kekarana ga naṗa monmon ga e lotap lala, e puluve la naṗa amligan ke kiela tas nen yar mare la aṃemeke ea. ²⁸⁻²⁹ Ana yermare la nene akila kare yar nene yam moki rui, kila sane yar la akirakiravanli naga silaga, a apiar e kilipan, a apiar lana amio limana e kilika panon laki, ana naga suṃña

kilaroro ga, a yermare la nene am̃enelua naga pa m̃eke e yokorena nene.

Ana Yesu pisuia, pis pa ninuna viowa, pilelua sape ligam̃ yaru nene. Ana yar nene pisu Yesu, pio naga, a mloru e lana, ana ninuna naña sike ea pis m̃arera, sape “?Ana Yesu, ko narina ne Ntewa na Mava, kioṃa ya na teke e inu? !Nepiun m̃areran pan ko, nesape ve ola re nakoena van inu!”

³⁰ Ana Yesu piun tania, sape “?Ana kioṃa kia ai?”

Ana ninuna viowa nene pisatam̃ea, sape “Kiau kia ‘Yermare lala na kilaen mara.’ ” Naga pisa sanene komin naña yermare la naña apa e losinena la mok liu. ³¹ A ninuna viowa la nene asum̃a apiuviun m̃areran ke sina ga pa Yesu vena naga ve vile plan la re, naga ve kila la re ava aloru ato tano e pupia pulukapi.

³² Ana yepas nen kunus na yo nene, pupia p̃egas nen nompui lala asum̃a akolkol ke porotano, ana yermare la nene atagi pa Yesu, apiun m̃areran tania asape naga ligam̃ la ga ava e nompui la nene. Ana Yesu tam̃an pan la, ³³ ana la amolue petan yar nene, apa e los nen nompui lala. Ana nompui la nene aplamolue yam veraga akiriri apito e yeparpas tai, ana apiovion la apito e pupia lapa nene, atalil make e sive.

³⁴ Ana yar na visuaren nompui lala apisu sur nene, la aṃure apa um̃a, apisawal sur nene, ana apisa make m̃ena ga e yo la punu ga, ³⁵ kila sane yar la moki sinelan asape aimi avisuia. A pogos naña la apimi, apisu Yesu sum̃a ga, a yar naña ninuna viowa la aṃure petan rui naga totano

teke e lana ne Yesu. Nanagane, naga miyen ruru m̃ana kulmrae wo la rui, a pimi mom̃au ruru nenaga, pe sirag re si poli. Pogos naña la apisu yaru nene pimi po si sanene narui, ana amarau. ³⁶ A la naña asuñesania apisu suri punu ga, asunyu pa la naña apim mare ga na wa, apisa meraravan pan la sanape naña yaru nene naña yermare la asuñesan ea, ana Yesu kila naga pimi po si rui. ³⁷ Ana yeririna lala na lepas nae Karasa, la apisu sane piowa ga, ana la asum̃a am̃areran pa Yesu asape la sinelan naga molue si vetan la, komin naña sur nene kila amarau pañisi. Ana Yesu la apitovin si vena aiai e kiela waa, vena awasuñela sina.

³⁸ Ana pogos naña la asum̃a apito ke narui, yar nañani pitomi piun m̃areran tan Yesu sape naga sinenan sape va su lue amio naga, ana Yesu pialuñaria, pisa pania, sape ³⁹ “Peraga, komin naña popon manene ko owasuñe ko ga ova si um̃a, a ova osunyu van yar lala, ovisa van la sanape naña Ntewa kila po naña po manene pan ko sanene.”

Ana yar nene ãasuñe sina, a naga sum̃a pa miyervivi yo punu ga nae lepas na kiena pupia pulkumali, a pisawal yum̃aena wo naña Yesu kila pania.

Nin sira kiena Saeras, amio sira naña tol kulsota m̃ana Yesu

Matiu 9:18-26; Mak 5:21-43

⁴⁰ Ana Yesu lala akusro lapa nene apa ke sina lepas ãasia, a pupia ãina na yeririna lala asum̃ate ke naga, ana la akekaran naña apisu

pa m̃alivin la sina. ⁴¹ Ana yerkawa na kiela yum̃a na lotena nae e yo nene, kiena kia Saeras, naga pimi lavisin Yesu. Ana kinai tanonia, tag pania, piun tania sape imi m̃ana, ⁴² vena visu nin narina naṗa sira, naga minana paṗisi. Nin sira nene, naṗa yerkawa nene naga narina taaga nena nene, a kiena kas pe sur sane lualima taaga pa lua ga [12], ana kiena inanena pimi keviu manene laa narui, kila narui apisu sane lavis ke mare ne. Ana Yesu sum̃alu, amio yar nene apano.

Ana pogos naṗa naga pa ke sanene narui, pulen yeririna na pupia ṗina la nene asum̃a atavevea, asum̃a amiigin la piora e Yesu. ⁴³ Ana lala tai, naga sira tai, naṗa maiena kien sira lala teke e naga e legiena punu ga, tol kas lualima taaga pa lua [12] rui, ana pe yar re nena tai naṗa kilia kila ruru kiena maiena nene poli. ⁴⁴ Ana sira nene, naga mialvan ga yaru la lika, pimi pimi lavisin m̃asina ne Yesu, kian limana sane, tol ga m̃ana isinen kulkota. Tol ga kulkota m̃ana Yesu sane, ana e ke e pogos ga nene, kiena maiena naṗani ṗisi nena ga.

⁴⁵ Ana Yesu piun ke ga, pisape “?Ane tolmare in ga na wa?”

Ana la apisapenua “Pe yar tai tol ko re poli,” ana Pita m̃ena ga pisa pania, sape “?Ana Suṗe, sanape? Yaru la apule manene laa asum̃a amiigin la kar ga miyervivi ko pivi, asum̃a apavan e ko.”

⁴⁶ Ana Yesu pisa pania, sape “Peraga, yaru tai tol inu nena naṗa, komin naṗa in na nemninuk-

ilale sane kiau nam̃areraena kom̃pas pa vanua e inu pa e yaru nene p̃isi rui.”

⁴⁷ Ana sira nene p̃isu sane naga taṗatete si tapolou narui, ana pimi puna ne Yesu, marau paṗisi, sinen kurkur m̃ena ga. Naga pimi mloru e lana Yesu, ana e marana ne yeririna la naṗa asike ne, naga pisawal make sur la e naga pania, sa naṗa komin ya ne naga pimi tolia, a sanape naṗa pimi po si rui e pogos nene.

⁴⁸ Ana Yesu p̃isa pania, sape “Auya, kioña naviawaena e inu kila ko opo si rui. Sum̃are kiena ne Ntewa sike amio ko, owasuṗe ko sina ova uña.”

⁴⁹ Ana pogos naṗa Yesu sum̃a pivis ke amio sira nene wa, visena pimi pa yerkawa nene, sape “Nin naruña nene kovio rui. Popon ve oure re si pupia navianena nene imi, vena ve okila kare korenan re naga.”

⁵⁰ Ana Yesu m̃ena mloge m̃a visena nene, ana p̃isa pa Saeras, pisape “Ve ositom re suria, owa-sine ga Ntewa m̃arera, a yokorena nin naruña sira nene imi wo si ne.” ⁵¹ Ana Yesu pa amio yar nene apa m̃ana, a pogos naṗa apim atol yo nene, naga pisaluṗar laṗasa sape yoko ve ava re loyuña amio naga, ana naga p̃ere ga Pita, amio Yoane, a Semes, a arimanane nin sira nene amio anena, ana apa loyuña. ⁵² Pogos naṗa apa loyuña ap̃isu naṗa yar la asuña sinela miye ke nin sira naṗa rui, asuña ataginia, ana Yesu p̃isa pan la, sape “Ve atagin re nin sira nene sanene. Naga pe mare re nene poli, naga momalio ke ga ne.” ⁵³ Ana la apitalia kare ga naga, komin naṗa la akilia asape nin sira nene marṗantop nena rui.

⁵⁴ Ana Yesu pa tarar limana ne nin sira nañani, pisa pania, sape “Nin naruu, osuñal li sumo wa.”

⁵⁵ Ana e ke ga e pogos nene, apisu naña nin sira nene, kiena malena ãasuñe sina pimi e naga, ana suñalu, suña miyaloro, ana Yesu pisape popon ala narin kinanen tai vania. ⁵⁶ Ana arimana amio anena, amilan pañisi naña kiela sitomena la kovio nena ga, ana Yesu pisa pan la sape yoko ve avisawal re sur nene va yar tañena lala.

9

Yesu pitetalia kiena nalogena la peve lua

Matiu 10:5-15; Mak 6:7-13

¹ Ana Yesu pio viraviran kiena lualima taaga pa lua [12], ana pis ruru pan la, naga mla ñareraena pan la, tañan la vena akilia ataulu yermare lala, a vena akilia akila ruru maiena lala. ² Naga kila sanene vena vitetalia la avanon alogon navesuñenena kiena ne Ntewa, a vena akila ruru namaiena lala. ³ A visen wo lañas naña pisa pan la sumon naña apano, sanini, naña sape “E lepas na kiamiu mrapa, yokorena ve awarar re sur tai. Ve awar re kiamiu plasgai, pona kiamiu karo, pona kinanena, pona kilavaru, a ve awar re ñamiu kulsota ve lua, yokorena ayen ga ñamiu kulsota ve taaga ga naña amiyenar ke ne.

⁴ “A uña ya naña visae aure amiu ava ase ea, ñisi na monar akekaran naña asu amio mratava na uña nene, yokorena aligan ga uña nene pogos naña amolue si vetan pulkumali nene. ⁵ A

e pulkumali ya naña visae la yepel mavin were amiuena ava e m̃ala yuñã lala, p̃isi na aligan ga kiela yo nene, a pogos naña amolue vetania, monar atan plan puluyavi na mrapa na yo nene vetan lamiu, sane kile tai pona kiamiu visena m̃arera tai van la, sape yoko awar nakoarena tai naña torokin ga kiela p̃elaga viowa nene.”

⁶ Ana nalogena lala amolue apa narui, a asumã aņaro ke e pulkumali lala, asumã amlologon ke lologena wo, a asumã akila ruru ke maiena lala.

Parin Suņe Erot Antipas pisayu Yesu

Matiu 14:1-2; Mak 6:14-16

⁷ Ana e pogos nene, Parin Suņe Erot m̃ena ga mloge towe m̃a ya naña Yesu la asumã akila ke ne, ana naga sitom manene paņisi, komin naña yar laņas asumã apisayu Yesu, asape naga Yoane Nakeena, naga mali si petan marena, ⁸ ana taņena laņas asape naga yermarua Elaisa nanua, nane m̃alivi si ne, a taņena laņas asape naga pe navisawalena la tai nanua sumo sumo manene laa, naña sum̃alu si petan marena. ⁹ Ana Parin Suņe Erot pisape “Pe Yoane Nakeena re nene poli, komin nesilua p̃arina rui, ana yar na apisayu ke ne, naga a si nene?” Ana sitomena nene kila naga sinenan visuen Yesu paņisi.

Nalologena la apa amlologo, ana aņasuņe la sina

Matiu 14:13-21; Mak 6:30-44; Yoane 6:1-15

¹⁰ Ana nalologena la naña Yesu pitetalia la sape ava alologo, aņasuņe sina, ana apisawal sur

punu ga naña amiyumñaenia pa Yesu. Ana Yesu ñere la amolue petan yar lala, amiyepe la ve tokak ga apa e pulkumali tai, kiena kia Petsaeta. ¹¹ Ana siraunia, yar la amloge asape apa ke e yo nene, ana la mña ga asirau apano, apa mña e yo nene. Ana Yesu kekara ga, naga sun towe amio la, a siraunia pian la e lepas navesuñenena kiena ne Ntewa, a kila ruru yar la naña sinelan ke asape popon yar tai iila la.

Yesu pagan yeririna la manu lima [5000]

¹² Ana Yesu sumña amio la pano pano-o, apisu naña mrae pito ke tano narui, ana kiena lualima taaga pa lua nene apim puna, apisape “Ei, Suñe, popon oligan ñina la nene awasuñela ava mñala umña lala pona avakar ga e pulkumali la ne sike ne, vena akilia aul kala kinanena lañasia, a vena akilia alual mñala lele na monoena, komin e yo na tesike e ne pe pon re yemalo wo ita e poli.”

¹³ Ana Yesu pisa pan la, pisape “E, peraga. Popon kam ga awar kinanen lañas van la.”

Ana la apisatamña, apisape “!Kei! Imimi memla ke ga narin kilaparavi lima, amio narin ika lua. ?Ana visae peraga, pona ko sinoñan ke osape yoko imimi ke narui meva moul kinanena torokin pupia ñina la nene?” ¹⁴ La apisa sanene komin yeririna la naña asike ne la moki manene laa, ana yermene ga lala pa tol sur sane manu lima [5000].

Ana Yesu pisa pan la, sape “Ava avisa va yeririna lala avisave atotano ke ne wa, atotano e ñegas lala, naña yar la lualima ve lima [50] e

ṗegas tai.” ¹⁵ Ana apa akila sa naṗa naga pisa, a yeririna lala atotano e ṗegas lala.

¹⁶ Ana Yesu mla kilaparavi lima nene amio narin ika lua naṗani, kirava pa ma e peni, pisa potenania ana kawewowa, kian pa nalologena lala vena alalein akian va ṗegas la nene. ¹⁷ Ana akan panpano-o mēṗela kawa ruru nena ga, a kororos nen kinanena naṗa akanligania, akon pa e karo popos lala tol lualima taaga pa lua [12].

Pita pisawal pisape Yesu naga Navisaarena kemua lelaga

Matiu 16:13-28; Mak 8:27-31

¹⁸ Ana pogos tai, Yesu sumña mlen ke naga taaga, a kiena nalogena lala asuñña ga lavisinia, ana naga piun tan la, sape “?Asumña amloge yar la apisavisa inu asape in na ai?”

¹⁹ Ana apisa pania, asape “Laṗas asape ko Yoane Nakeena, a laṗas asape ko Navisawalena Elaisa, a laṗas asape ko navisawalena taṗena lala tai nanua sumo sumo nane naga mali si petan marena ne.”

²⁰ Ana naga piun tan la, pisape “?A sanapen amiu, kam asape in na ai?”

Ana Pita pisatañña, pisape “Ko Navisaarena kiena ne Ntewa nene.”

Yesu pisawal kiena marena

²¹ Ana Yesu pis mārera, pisaar nena pan la, pisape yokorena ve avisawal re sur nene va yar lala, ²² ana pisa ruru pan la pisape yoko ve sanapen naga. Naga pisape “Inu na nepe

Narina ne Yeririna, a yoko nasumonena kiena ne le Israel lala, amio yerkawa kiena ne yar wa lala, amio navianen navisaluaen lala, yoko akoven lua inu, p̄isi na monar akila sur ve moki na kila kare inuena. Yoko monar awem̄ar inu nemare, ana e kana legiena na telu, yoko Ntewa visirlua inu nemal sina.”

Nalogenā kiena Yesu naga monar sitom korenan ga kiena nasinenanena lala

²³ Ana e pogos nene, Yesu pis pan la, pisape “Yar naṗa sinenan sape taveve inu, naga monar sitom korenan ga kiena nasinenanena lala, naga monar kus kiena laki torovia e legien punu ga, sa naṗa yoko inu nekus kiau, ana taveve inu luen ga. ²⁴ Nepisa sanene komin yar naṗa sinenan sape ve puluvisin kiena malena, yoko kilalu kiena malena. Ana yar naṗa taṃan kiena malena vanon inu, yoko naga taulu si kiena malena. ²⁵ Visae yar tai tol make sur wo na yomarava nini lala, ana kila pal mrapa a kilalu kiena malena, naga pe taulu re nena sur wo tai poli. ²⁶ Yar naṗa mawa e marana yar taṗena lala vanon inu pona vanon kiau visena, yoko inu Narin Yeririna ṃena nemawan yar nene e marana Ntewa e pogos naṗa nowasuṗe sina, naṗa yoko nevitom nemio pupia naurarena naṗa pe kiau, a pe kiena ne Ata, a naṗa pe kiena ne ṃena navisi wa lala. ²⁷ Lelaga nevisa van amiū, yar laṗas asuṃal asike e nini, naṗa

taṭatete amare na wa, vano-o tol pogos naṭa avisu Navesuṭenena kiena ne Ntewa imi m̃alivi.”

Tasnena ne Yesu pimi pe taṭena
Matiu 17:1-8; Mak 9:2-8

²⁸ Siraun pogos naṭa Yesu pisa visena la nene, pe sur sane legiena olua ṭaro ga na wa, ana naga ṭere Pita, amio Yoane, a Semes, la vari apa metava e ravie tai, komin sape len. ²⁹ Ana apam atol yo nene, a pogos naṭa suṃa mlen, nalogena la telu nene apisu naṭa marana pimi pe taṭena, a apisu naṭa m̃ana kulsota pilavila paṭisi, a miyuwowo naṭa miyuwowo manene laa. ³⁰⁻³¹ Ana siraunia, yermarua lalua nene Elaisa amio Mosis, lalua aṃalivi amio pupia naurarena nae ma e peni, ana lalua asun ke amio naga, naṭa asuṃa apisayu ke sanape naṭa yoko naga monar va garu Yerusalem, a monar mare vetan yomarava nini, sa naṭa Ntewa pisaaria ṭa rui.

³² Ana sumo, la telu Pita, Yoane a Semes nene asuṃa amloge marala kawa paṭisi pano-o amomalio, ana pogos naṭa atavilo sina, la amilan sur la naṭani, naṭa apisu pupia naurarena kiena ne Yesu, a apisu lalua naṭa asuṃal asike amio naga. ³³ Ana apisu naṭa lalua nene asape aligan si yo vena awasuṭela, ana Pita sinenan sape visi, ana naga mninue m̃a visa ya ne, ana naga pisalawe ga visen kar tai pa Yesu, pisape “Suṭe, popon naṭa ita tesuṃa e nini. Popon teyuṃaen silparpara ve telu e yo nini, moṃa tai, m̃ana Mosis tai, a m̃ana Elaisa tai.”

³⁴ Ana pogos naña naga sumña pisa ke visena nene, lul tai pitomi kalo la, ana pogos naña la apisu sane apa ke loyumña e lul nene narui, amarau pañisi. ³⁵ Ana amloge visena tai molue e lul nañani, pisape “Nanene na naruu ne, naña nepisirlua naga rui. Naga ke narui monar alogear ruru naga.”

³⁶ Ana pogos naña visena nene ñisi, lul nene kovio sina, apisu naña Yesu naga taaga sike si amio la. Ana siraun nene, nalogena la nene apa ruru la, asumña ga sa ga ne, pe apa apisayu re sur nene pa yar tañena la poli.

*Yesu pilelua yermare petan ñee tai
Matiu 17:14-21; Mak 9:14-29*

³⁷ Ana e kana legiena na siraunia, Yesu amio la telu nañani añasuñela si apitom tano, ana pupia ñina na yeririna la asumñate ke naga, sinelan asape avisuia. ³⁸ Ana pogos naña apim añalivin la, lala yaru tai pion manene pa Yesu, pisape “Navianena, nepisa awis pan ko, ovisuli naruu na yermene nini, komin naña naruu wawa taaga nena nini. ³⁹ Ninuna viowa tai ne sumña pimi ke e naga sanene, kila naga mlokai manene pañisi, ana miokamarmare tasnena ñarera pano-o wasirina la mlalau. Sur nene sumña kila ke naga pa piowa laa, kila kare naga pañisi, a sumña kila luen ga, pe mliganli re naga pa ruru pogos tai poli. ⁴⁰ In na nopure naga pa puna ne kioña nalogena lala, nepisa awis pan

la vena am̃enelua ninuna viowa nene, ana la akilalia, amiyum̃aen pano-o, akila p̃ele yonia.”

⁴¹ Ana Yesu pisatam̃ea, pisa pan la, pisape “? Kam la nene, sanape na sanene? Pe asum̃al re nena ase Ntewa poli. ?Monar nesum̃a nemio kam wowe lala tol pogwai? In na sineu maren amiu rui. Ko, pogaga, oure narum̃a nene imi.”

⁴² Ana apa aṗure pimi, a pogos naṗa apim ga sane, ninuna viowa naṗani kilapel ke sina ninis naṗani, kila tasnena miyuyuwawa a m̃arera. Ana Yesu pis kapuru pisaluṗar ninuna viowa naṗani, a kila ruru m̃ee nene, ana mligan si pa arimana. ⁴³ A la naṗa apisu sur nene, amilan manene nam̃areraena nowo kiena ne Ntewa nene paṗisi, naṗa kila po sanene paṗisi pan m̃ee naṗani.

Yesu pisawal sina ga kiena marena

Ana siar e pogos naṗa yar taṗena la asum̃a apisasayu ke sur wo naṗa Yesu kila, ana Yesu pisa kiena visena tai pa kiena nalogena lala. ⁴⁴ Naga pisa pan la, pisape “Ayagogon ruru kiau visena nini, aligan ruru te kiamiu sitomena lala, vena ve sinemiu ṗesan re sina. Ee, nepisa ruru van amiu, nesape Ntewa mligan inu sane Narin Yeririna, ana lavis ke naṗa aligan inu neva e limana ne yaru la naṗa yoko aweṃar inu nemare narui.”

⁴⁵ Ana nalogena lala pe amloge kilale re ya naṗa Yesu sum̃a pisayu ke pan la poli wa, sa naṗa kana kinas tapolou ke ga wa, kila pe apisu kilale re poli, a amaraun m̃ena naṗa aviun ruru va Yesu e lepas na visena nene.

“?Ane to laa metavan yaru taņena lala?”

Matiu 18:1-5; Mak 9:33-40

⁴⁶ Ana siraunia, veveyuena tai mālivi likan nalogena lala, naņa apisape ane to laa metavan lala taņena laņasa. ⁴⁷ Ana Yesu kilia mña kiela sitomena la nene, ana pio ninis tai naņa pimi ke puna, ana mligan ninis naņani suņalu se yepasa, ⁴⁸ ana pisa pan la, sape “Yar naņa kiena sitomena patanon inu, ana naga kekaran wereruruen ninis nini, nanene sa ga naņa kekaran were ruru inuen ga narui. A yar naņa kekaran inu, naga sane kekaran ke ga naga naņa mligan inu nepim. Nanene komin naņa amiu ai naņa kiena sitomena su tano vaņisi, naga ke narui naņa naga to metavan amiu make ga.”

“Yaru naņa pe pisalupar ita re poli, naga suņa miila ita ke ne”

⁴⁹ Ana Yoane pisa pa Yesu, sape “Suņe, mepisu yar tai, naņa suņa pile plan ke yermare lala, naga mņene plan la e kiomņa kia. Ana yaru nene, memninue ga, naga pe ita re tai poli, ana mepisaluparia.”

⁵⁰ Ana Yesu pisa pania, pisape “Toko, visaluparen toko, komin yar naņa pe pisalupar ita re poli, naga miila ita ke ne.”

Yesu sitomāl sape lavis ke monar va ma meta Yerusalem narui

⁵¹ Ana Yesu pisu kilale sape nanagane, lavis ke Ntewa were si naga va meta ma e peni narui,

ana kila ruru kiena sitomena, sape kiena mrapa monar va ma meta Yerusalem narui.

⁵² Ana la amial apano, ana Yesu mligan kiena yar na waren visena lala la asumo apa e pulkumali tai kiena ne le Samaria lala, vena akila ruru make suria, naga sirau imi. ⁵³ Ana la ne e yo nene, la pe sinelan re Yesu la aim e kiela yo poli, komin la pe sinelan re iilaen le Yu la naña akom ke kiela yo poli vena ava meta Yerusalem.

⁵⁴ Ana pogos naña nalogena lalua nene Semes lalua Yoane apisu naña apisalup̄ar la sa nene, lalua apiun tan Yesu, asape “Suḡe, ko sinoḡan osape melen mevio kapi tai ligan ma e peni vitom tano kekan la nenaga?”

⁵⁵ Ana Yesu ḡarpuia pis ḡarera pan lalua, pisalup̄ar la. ⁵⁶ Ana pe apa re si e nene poli, la apa e pulkumali taḡena.

*Yaru naña taveve Yesu ve kiraḡatau re sina
Matiu 8:19-22*

⁵⁷ Ana pogos naña amial ke e mrapa narui, yaru tai pimi pu Yesu, pisaar pania, pisape “Yoko netaveve ko e nape naña visae ova ea.”

⁵⁸ Ana Yesu pisataḡea, pisape “Lokul tetan lala la ḡala pulus la suḡa ga, a manu lala ḡala ponovi la suḡa ga. Ana inu Narina ne Yeririna, naña nokom ma e peni nepitom, in na pe ḡau yo re poli, naña neva nomonea. Visae ko okekaran ḡena malena na sanene, ko okilia oimi.”

⁵⁹ E ke e pogos nene, yaru taḡena tai, Yesu pisa ḡena pania pisape imi tavevea, ana naga pisataḡea, pisape “Suḡe, otaḡan neva nevisuar

ke ne kiau yermarua sumo wa, a visae marþan pae, ana yoko neim netaveve ko ga na wa.”

⁶⁰ Ana Yesu pisa pania, pisape “Oligan yaru la naþa pe atol re malena poli wa ava asin kiela yar mare lala. Ana ko, oim ga teva telologon navesuþenena kiena ne Ntewa.”

⁶¹ A yar taþena si tai kila sa ke ga, kila sa naþa pisasa ga, pisa pa Yesu, sape “Suþe, yoko in na netaveve ko lue narui, ana sur taaga ga, nesape otañan neva nevisa ke ne pokolemalo va la ne uña mñau wa.”

⁶² Ana Yesu pisa visen tai sanini pania, pisape “Yar naþa suña sitom manene la mñana uña þarar kiena suri make ga, naga sane yaru naþa tarar ke þeligas nen waa, a silaga, suña kira þatau lue ga. Yar na sanene pe torokin re imi ve yar na navesuþenena kiena ne Ntewa poli.”

10

Yesu pitetalia yar la moki naþa la peve lua ava alogo

Matiu 9:37-38, 10:7-16, 11:20-24

¹ Ana e pogos nene, kieta Suþe pisir plan si kiena nalologena laþasa. La punu ga tol lualima yam olua pa lua [72], a naga sitom ke sape ligan la nene ava sumo, la veve lua ava e pulkumali lala a e yo la naþa yoko naga sirau va ñalivi ea. ² Ana naga pian la sanini, pisape “Lelaga, kinanena moki liu naþa marua sike lokove, ana yar la lua la ga naþa asuña aþar ke pitomi uña. Monar aviun manene tan yerkaawa na

lokove nene, vena naga ligan plan re si yar laḡasia la avanon awar kana kinanena la nene imi. ³ Sanene, monar ala kiamiu mrapa avano. Ana popon avisu kilale sane in na nemligan plan amiu apano, sa ga naḡa narin sipsip, naḡa apanon ke vena avitawe pupia lokul tetan lala. ⁴ A pogos naḡa avano, ana ve awar re kiamiu taga na varu, a ve awar re kiamiu karo, a ve awar re si kiamiu kulus nen lamiu taḡena. Ava ga sa ga ne, ve asunlilue re mrapplepa va yar lala. ⁵ A pogos naḡa ava aḡaliv e yuḡa ya, sur naḡa yoko avisa ḡesania, yoko avisa sanini, avisave ‘Suḡare sike e uḡa nini.’ ⁶ Ana viḡae yaru naḡa sike e uḡa nene naga sinenan suḡare, yoko suḡare naḡa avisa kilia sike amio naga, ana viḡae pe yar re tai ne sanene poli, yokorena suḡare wasuḡe si imi van amiu. ⁷ A ve ava aulaula kare e yuḡa taḡena lala, ana asuḡa ga e yuḡa nene, a akekaran ala kinanena ya pona namunena ya naḡa ala imi van amiu. Ve amawan re ala sur wo ya naḡa akila van amiu, komin naḡa yar na yuḡaena naga mesmesun la kiena narin nalaena tai.

⁸ “Sanene na, viḡae kumali ya naḡa ava aworu ea, viḡae akekaran naḡa avisuar amiu, yoko monar akekaran ga kinanena ya naḡa sinelan asape ala van amiu, ⁹ a monar akila ruru namaiena la e yo nene, a monar avisa van la, avisave ‘Nanagane, nasuḡenena kiena ne Ntewa pimi ke lavisin amiu, nanagane Ntewa pimi pe kiamiu Suḡe narui.’

¹⁰ “A pogos laṣasia, yoko aworworu e pulkumali tai, ana yoko ve akekaran re naṣa aure amiu ava asike amio la. Visae sanene, amiu ataveve pupia mrapa nene ava e yepesinas na pulkumali nena, a avisawal va kana yar lala, avisave ¹¹ ‘Puluyavi na mrapplepa na kiamiu yo nini, imimi metan plan petan lamimi lala, sane kiamiu kile nasitoṃalen tai. Monar ve sinemiu ṣesan re, sane lavis ga navesuṣenena kiena ne Ntewa imi pun amiu narui, ana pe sinemiun re poli, ana akilalu narui.’

¹² “Nevisa lelaga van amiu, e legiena na liṣereena, yokorena la ne sanene la ava e nakoena tai naṣa ṃarera manene laa taulu nena naṣa la nae pulkumali naṣa Sotom nanua yoko awaria.”

*Yesu pisayu la naṣa pe amlelaga re e naga poli
Matiu 11:20-24*

¹³ Ana Yesu pis ṃarera pa yeririna na kumali taṣena laṣasa, pisape “!Le Korasin, amio le Petsaeta, akila kare manene amiu paṣisi wa! Visae le Taea amio le Saeton lala avisuli ga kile la naṣa kam na apisu ṣisi rui, vera na avilopu la nanua rui. La pe ape le Yu re poli, ana vera na la ayen ṣilili karo a akuan yavi e ṣarila rui, pona atotano ṃa sanene ana yaru la avisu sane sinela piowagan kemua kiela mlamulena viowa la lelaga. ¹⁴ Nevisa van amiu, e pogos naliṣereena, yokorena kiamiu nakoena naga taulu nena naṣa kiena ne la nene.

10:10 Yum̃aena 13:51 **10:11** Mat 10:7-14; Mak 6:8-11; Luk 9:3-5 **10:12** Mat 11:24, Mat 10:15

15 “!A amiu le Kapeneam la naþa aþarwar amiu paþisi, naþa sinemiun asape avisir plan amiu asu manene metava, avisuar amiu! Yoko Ntewa koven amiu ato laa tano rui e pulus nen kapi.”

16 A Yesu pisa mēna pan la, pisape “Yar naþa visae yoko logear amiu, naga suṃa mlogear in ke ne, a visae yar naþa yepen mavin amiu, naga suṃa yepen mavin in ke ne, a yaru naþa visae yepen mavin in ke sanene, naga suṃa yepen mavin ke yerkawa naþa naga mligan inu nepim.”

Ana e visena la nene, Yesu mligan yar nalologena lala apanon akila yuṃaena.

Yar nalologena la aþasuþe la si narui

17 Ana yar nalologena la nene apa akila yuṃaena wo la moki, ana siraunia aþasuþe la si apim puna Yesu, naþa apulen manene kekarena e sur punu ga naþa akila rui. Aþasuþe la, apisa pa Yesu, asape “!Suþe, memiyuṃaen sur la e kioṃa kia pa tol naþa yermare mēna la asu vatanon imimi!”

18 Ana Yesu pisataṃe la, pisape “Ee, kieta yuṃaena sanene narui. A in mēna ga, noṃal Yermare molue ma e peni, akoven lua naga pitomi tano sane yekarpla tai. 19 Nanagane, in na netamān pan amiu rui, nesape akilia avieyar loṃara amio logovi, a māreraena kiena ne kieta nasinekar sike mēna vatanon lamiu, ana taþatete sur tai kila kare amiu. 20 Ana ve awarwar amiun re ya naþa in na netamān pan amiu, naþa ninuna viowa la asike vatanon amiu, ana

sur taaga ga naŕa akilia aulen manene kekarena vanonia, na naŕa kiamiu kia lala asiri plan sike loyuma e tus namalena rui.”

Yesu pisa potena pa Arimana

Matiu 11:25-27, 13:16-17

²¹ Ana e pogos nene Ninuna Wa kila sinena ne Yesu kekara paŕisi, ana Yesu mlen, pisape “!Ata o, ko ope Suŕe nae ma e peni a Suŕe nae yomarava nini! Nevisa potena van ko, Ata, vanon sur la naŕa e lepas na pun inu, okila meraravan pan la naŕa kiela sitomena sa ga nin sisi lala, ana yaru la naŕa asitom asape ape manmarua a la naŕa asape akilia ruru suria, ko okilawan sur la nene van la. Lelaga ŕa Ata, nanene na sa ga naŕa ko sinomania.”

²² A Yesu pisa mēna pan la, pisape “Ata mligan suri punu sike e luŕau rui. A Ata naga taaga naŕa kilia inu sape in na ai, a inu naŕa nepe narina, in ga taaga naŕa nekilia ruru naga, ne-sape naga ai. Inu nemio la naŕa ne nemliganar la vena nekipian la e Ata vena awasine naga, imimi la nene narui naŕa mekilia ruru naga naŕa pe Arimamimi.”

²³ Ana Yesu pilon pa puna ne kiena nalogena lala, pragogo ga pan la, la ga amloge, pisape “Ntewa kila po pan amiu paŕisi, naŕa akilia avisu suri la nene. ²⁴ Navisawalena la mok liu amio ŕarin suŕe la mok liu nanua sumo naŕa la sinelan manene paŕisi asape avisu sur la nene, ana pe apisuli re pogos tai poli, a aŕaryon asape

aloge m̃ena sur la nene, ana la pe amloge re nena poli.”

Pakaiwa naṓa yere Samaria sinen miye yere Yu tai

Matiu 22:34-40; Mak 12:28-31

²⁵ Ana pogos taṓena si tai, yar tai naga pe manmarua ruru e navisaluaena, naga pisape kilali Yesu e naviunen m̃arera tai ana naga suṃalu, piun tan Yesu, pisape “?Navianena, visae sineun nesape nekilali netol malena naṓa pe luas re poli, yoko monar nekila ve sanape?”

²⁶ Ana Yesu pisataṃea, pisape “Ana kieta Tus Wa pisa ya ne e lepas nene? ?Ko opuloia opisu pisa sanape?”

²⁷ Ana yar naṓani pisataṃea, pisape “Tus Wa pisa sanini, pisape: Ntewa na mava naṓa naga pe kioṃa Ntewa, ko monar sinem̃a si naga, oligan naga to sumo e losinem̃a wetelu, a e kioṃa malena wetelu, a e kioṃa m̃areraena wetelu, a e kioṃa sitomena wetelu, a ko na monar ositom nalavis puṃa lala, okila wo van la, sa naṓa ko ositom ko ke ga.”

²⁸ Ana Yesu pisa pania, pisape “Ee, opisa mesmesun nena narui. A visae okila ve sa nene, yoko otol malena nane opiun ke ne.”

²⁹ Ana yar nene kilia sape naga pe kila re mesmes sanene poli, ana naga kilali naṓa kila pisape mninue ga, piun tan Yesu, pisape “?Ana a la ne asike lavis pun inu naṓa monar nekila wo van la?”

³⁰ Ana Yesu pisatam̃e kiena naviunena nene e ãakaiwa tai, naãa pisape “E legiena tai, yar tai molue ma Yerusalem, sumã mialoro pito garo Seriko. Ana naga mialoro m̃a sanene pano tol yom̃arera tai, ana milan ãegas nen yar na vin-auen tai, naãa apulania, am̃e kare naga paãisi, aãar plan make kiena suria aãure, amligan naga marluia m̃eke kiena mrapa komsusa. ³¹ Ana kieta yar wa tai, naga m̃ena mialoro e mrapa nene naga siraun pimi, ana pogos naãa pimi lavisin yar nene, naga miyepe ga pa e isinen mrapplepa, mial ãaro pano. ³² Ana siraunia, yar taãena mial pimi. Naga pe Livae la tai, naãa asumã akila ke yumãena make ga e Yumã Wa m̃ana ne Ntewa, ana pogos naãa pimi tol yar naãani, naga m̃ena ga yepen mavin ilaena, miyepe ga pa e isinen mrapplepa mial ga ãaro pano. ³³ Ana siraun sina, yar taãena, naãa naga sumã mlilu kiena mrapa viavi tai pimi. Naga pe yere Samaria tai, ana sa naãa tekilia, yar la nene pe ape erau wo re amio ita le Yu la poli. Ana pogos naãa pimi tol e yo naãani, pisu yar nene marlu m̃eke e yo naãa am̃e ea, ana sinen miye paãisi. ³⁴ Ana naga pimi lavisinia, kevan lele la naãa la nene am̃ea, plan sirveve e magka la naãani, piar ruruia. Ana tarlua yar nena, mligan mon meta e kiena togki, ana mial m̃a amio pano-o tol yo tai naãa yumã na varuruen tai m̃eke ea. Ana ãere naga pa loyumã ea, miila naga po paãisi. ³⁵ Ana kolulagi, ãar kiena varu tai, kian pa ãar na yumã na varuruena naãani, pisape ‘In na monar neva si e kiau mrapa narui,

ana yar nene yoko sike e lumomña sumo wa. Ovisuar ruruia e sur punu ga, a visae varu nene ve torok re, yoko in na nevisuveve si e pogos naña nowasuþe si e kiau yalena nini.' ”

³⁶ Ana Yesu piun tan yar naña piun navi-unena nene pania, pisape “?Opisu suniena nene sanape? ?E yar la telu naña amiyal e mrapa naña yar nene mñeke ea, yar ai naña kila pania sa ga yar tai naña mñeke ga lavisinia?”

³⁷ Ana yar naña pisape “Nesitom nesape yar naña sinen miyea, a miila.”

A Yesu pisa si pania, pisape “Ore, naga ke narui, a ko mñena ga, ova otaveve kiena þelaga wo nene.”

Mareta amio Maria

³⁸ Ana e pogos nañani, Yesu amio kiena nalogena lala amiyaloro ke apa ma Yerusalem, ana apa amñalmñaliv e narin pulkumali naña Petani, ana sira naña Mareta þere Yesu pa mñala uña.

³⁹ Ana pogos naña Yesu pa sike amio la nene, luena ne Mareta nene tai, kiena kia Maria, naga totano ga teke lavisin lana ne Yesu, tomña miyagogon ruru ke kiena navianena lala. ⁴⁰ Ana e pogos nene, Mareta naga pe tomña miyagogo re poli, ana naga sumña mñareran ke sape kila ruru make sur punu ga sumñate Yesu, a naga sitom manene laa e yumñaena la nene. A siraunia, pimi pisu Maria to ga tano tomña ga, miyagogon mña Yesu, ana pisa pa Yesu, pisape “Suþe, luou namña to koren ga tomña sanene, ana in ga taaga nekila

make suria. Pona ko opisus kilale re poli yo, ana popon ovisa vana vena imi iila inu.”

⁴¹ Ana kieta Suḗ pisatamēa, pisape “Mareta, ko sireyar tai naḗa ositom manene sur paḗisi, a omloge piowagan manene sur moki laa na sanene wa. ⁴² Ana sur taaga ga toḗa ga naḗa yoko ko ositom manene urmi ea, nane suri ne nane Maria ḗal rui e kiena malena, ana yoko in na taḗatete si nelalua vetania.”

11

Leniena naḗa Suḗ pian ita ea

Matiu 6:9-13

¹ Pogos tai, Yesu pa mlen e yo tai, ḗisi ḗasuḗe pitomi, ana kiena nalogena tai piun tania, pisape “Suḗe, visae okilia ovian imimi lia vena imimi ḗena mekilia melen, sa ga naḗa sumo na Yoane pian kiena nalogena lala vena alen, vera na wo vaḗisi.”

² Ana Yesu tamān, pisape “Pogaga, visae sine-miun leniena, akilia avisa sanini, avisave:

‘Arimamimi, torokin kemua naḗa imimi mevatanon kioḗa kia wa.

Memlen mesape kioḗa navesuḗenena imi.

³ Mepiun tan ko, mesape ola kinanena van imimi ḗane a e legiena punu ga.

⁴ A oviewo kiamimi mlamulena viowa lala, komin imimi mepiewo ke la naḗa akila ke piowa pan imimi.

A ve oligan re suri la imi akilali manene imimi.’ ”

Pakaiwa na viunen suria

5-6 Ana Yesu pisape monar ve amaraun re viunen sur tan Ntewa, ana pisa ðakaiwa tai pan la, pisape “Visae kolemallo koe yepe lilika tai, oilan ga kioña erau tai yal imi tol yo puña. Ana pe koña kinanen re si poli, ana monar okirir ova pun yuña tai naña ñeke lavisin ko, monar oviun manene tania, ovisave ‘Wolai, kiau erau tai pimi porun in ga nagane na wa, ana in na luña plas nena ga. In na pe kau kinanena re si naña nekilia nela van kan poli. ?Ko na koña kinanen tai toña ga okilia otamñan van inu sumo wa?’ ”

7 “Ana sanape, tesitom tesape yoko yaru nene kilia visatamñe visave ‘Aa, ve okila re yuñaena ñarera sanene van inu. Opisu ke ne, mokotava rui, ana memio nin sisi la, moñeke e ñamimi tog rui, ana tañatete si nesumñal narui.’ Ana peraga, yaru nene tañatete visa sanene.”

8 Ana Yesu yakol si visena van la, sape “Pona pogos tai yaru tai kilia sitom korenan ko, yepen mavin iila koena vanon ga ko na osike lavisinia. Ana visae ve omawan re naña oviun kañaran ña sanene vano vano-o, yoko yar nene monar la ya naña opiun ke ne van ko.”

Yesu pisayu naviunen suri tan Ntewa

Matiu 7:7-11

9-10 Ana maran taaga e ðakaiwa kiena ne Yesu nene, naga pisa ke sina pan la, pisape “Yaru naña piun ke suria, naga tol silaga, a yaru naña kale ke suria, naga ñalia, a yaru naña sigariga ke mratava, pulutava pietava pan silaga. Visae sanene, yoko akilia awar ya naña apiun tan Ntewa, a alual ya naña akale ke puna, a

mratava naŕa asuŕa asigariga ke ne, vietava van amiu. ¹¹ Visae naruŕa tai viso karia, viun narin ika naŕa teke ne, taŕatete ola loŕara vania, ¹² pona visae naga viun kopululus nen lakaporo naŕa teke ne, taŕatete ola logovi tai van kania. ¹³ Lelaga naŕa kam na ape yar viowa ga lala, ana amiu yar tai taŕatete kila sanene, asuŕa akekaran ga naŕa ala suri wo la va narimiu la silaga. Sanene, pogos naŕa aviun tan Arimamiu nae ma e peni, naga kekara manene la a naŕa la Ninuna Wa van amiu naŕa ape narina lala.”

Apisape Yesu miyuŕae ke ga e naŕareraena kiena ne Yermare

Matiu 12:22-30; Mak 3:20-27

¹⁴ Ana siraunia, aŕure yaru tai naŕa yermare pa e naga pimi puna Yesu. Yermare nene kila yar nena pe pis re poli, ana Yesu pilelua yermare naŕani petania, ana naga pis ruru sina, kila yar la naŕa apisu sur nene amilan paŕisi. ¹⁵ Ana la ŕas apielue, ana apisalele kare Yesu ŕisa, apisape “Yar nene pile plan ke yermare lala e ga e naŕareraena naŕa suŕe kiena ne yermare lala, naŕa kiena kia Pielsipel, taŕan pania.” ¹⁶ Ana la si ŕasa, la ŕena asitom piowa e Yesu, ana asuŕa akilalia, sinelan asape aŕareraena vena kila kile tai nae ma e peni avisuia.

¹⁷ Ana Yesu mloge kilale kiela sitomena lala, ana pisape “Visae suŕe tai, kiena yeririna la aliŕere la, naŕa laŕasia akawe laŕasia, yoko yuŕaena kiena ne suŕe naŕani monar loru. A

visae umã tai, asumã aliþere la, naþa laþasa asape amene plan laþasa, yoko la nene taþatete asu ruru pog tai. ¹⁸ ?Sa mēna nini, visae yermare kiena ne Yermare Lego la asumã amlþere la ke rui, ana yoko nasuþenena kiena ne Yermare Lego sumãlu ve sanape ne? !Kam na apisa ke sur pa sanene narui, asape in na nesumã nomēne plan ke yermare lala e namareraena kiena ne pupia yermare naþa Pielsipel, ana taþatete nena ve sa nene þisa! ¹⁹ ?A visae ve sa kemua naþa apisa, ana komin ya naþa kam la þasa asumã amēne plan ke yermare? ?Ane tamian m̄areraena nene pan la, pona yermare m̄a nene yo? Popon sa kiamiu nalogena la naþa amēne plan ke yermare lala aloge kiamiu visena la nene. ²⁰ Ana peraga, apis pe po re nene poli. In na nesumã nepile plan ke yermare lala e ga e namareraena na limana Ntewa, a sur nene na kana kinasa sane navesuþenena kiena ne Ntewa sike likan amiu rui.

²¹ “!Apisu ke ne! Sa naþa visae pupia yar m̄arera tai, naga war kiena pupia suri na mara lala, naga sumã kirawo ruru ke m̄ana yumã. Ana sur kiena ne yar nene su ruru ga sumã e kiena kove. ²² Ana Yermare Lego kiena yumãena naga sa ga nene. Visae yar m̄arera taþena imi naþa m̄arera laa taulu naga sane, yoko lalua akila m̄a mara vano naga taulu Yermare Lego, ana yoko kilia war plan kiena sur na mara lala, naþa naga þasine þesania, a yoko naga kilia war make sur la naþa sike loyumã e kove nene ve kiena, ana liþere va kiena yeririna lala.

²³ “Yaru naŕa pe taveve in re poli, naga sane suwo in ke ne, a yar naŕa pe miyuñae re amio in poli, vena moure kiau yeririna la aim lele taaga, naga sumã mñene tetain la ke ne.”

Ninuna viowa kilia wasuŕe sina imi

Matiu 12:43-45

²⁴ Ana Yesu pisa mñena ga, pisapenua “Pogos tai, pog naŕa amñenelua yermare e yar tai, yermare nena kilia va yomãrua vena kaleli yo tai naŕa va se ea ve mñana uñã. Ana visae ve lual re, yoko naga visavenua ‘Aa, yoko neto li si e mñau uñã marua na sumo.’ ²⁵ Ana pogos naŕa pitomi, yoko naga lual sane akilavan ruru ga mñeke na, akila ruru make sur la e yuñã naŕa p̄isi rui. ²⁶ Ana yoko naga va were si yermare taŕena la ve olua naŕa apiowa manene laa taulu naga sane atom amio, ana yoko ava si asike los nen yar nene. Ana yar nene nanua sumo kiena malena piowa, ana siraunia kiena malena piowa manene laa sane.”

Mrapa na tolen kekarena naŕa lelaga

²⁷ Ana e pogos nene, sira tai sike amio la naŕa apisu ke sur la nene, a naŕa amloge ke visena kiena ne Yesu lala, ana sira naŕani kekaran paŕisi. Ana pion manenea, pisape “!A kee, anomã naŕa p̄ar ko, a mla yu pan ko, navisa ruruena kiena ne Ntewa keviu paŕisi pania, naŕa naga p̄ar sisi tai sane ko.” ²⁸ Ana Yesu pisatañea, pisape “Ee, nanene na lelaga, ana nevisa van ko, nesape navisa ruruena kiena ne Ntewa va ve keviu manene laa sanene sike e yar ai naŕa

logear visena lala kiena ne Ntewa, a naña kila ya naña naga sinenania.”

Yar la naña sinelan visuen kile

Matiu 12:38-42; Mak 8:11-12

²⁹ Ana e pogos nene, p̃ina la naña amiagogon ke Yesu asuṃa apim la mok manene laa narui, ana Yesu kilia ṃa naña sane la moki naña apimin ga avisu kiena kile lala, ana pis pan la, pisape “In na nepisu sane lus na yeririna nanagane lala la apiowa laa. La sinelan asape avisu ga kile lala, ana peraga, Ntewa taṓtatete nena la kile tai van la vena avisuia. Ana kile kiena ne navisawalena Sona nanua sumo, naga ga nene akilia avisuia.

³⁰ Ntewa mligan Sona, naga sane kile tai kiena ne la nae Ninive nanua sumo, ana naga mligan ṃena inu Narina ne Yeririna nepimi sane kiamiu kile na nagane tai.

³¹⁻³² “Ana le Ninive la nanua sumo amloge visena kiena ne Sona, la apilopu la e pogos nene, a yoko la nene asuṃalu ase e legiena na liṓpereena, la avisa lologia kiamiu naviowaena, komin yar tai naña naga to laa metavan Sona naga sike amio amiu, ana pe apilopu amiu re neṃa ga.

“A nanua ṃena sumo naña sira kawa tai pe ṓarin suṓe tai naña molue e kiena purvanua naña sike koperin paṓisi, pitomi tano vena loge visena na manmaruaena lala kiena ne yermarua Parin Suṓe Solomon. Ana sira kawa ṃena naṓani yoko naga suṃalu se e legiena na liṓpereena nene ana visawal ruru nena kiamiu

naviowaena lala, komin naña yar tai naga to laa metavan Solomon naga sike amio amiu, ana pe sinemiun re nena naga poli.”

Pakaiwa lua e lepas na kapi vivaga

Matiu 5:15, 6:22-23; Mak 4:21; Luk 8:16

³³ Ana Yesu pisa mēna, pisape “Pogos naña tesilan kapi vivaga, ve tesilan re ga p̄isi na teva towarwan mēke e p̄iliṗili tai e porotano, pona takalo si e piaki tai, ana tesilania vena tetelan to metava, vena visae yar imi loyuña ana lual naña kapi vivaga nene tegoli make nena yo.”

³⁴ Ana Yesu pisa mēna, pisape “Kilamaran yar naga sane yo taaga ga naña yomerava pimi ke loyuña e tasnena. Sanene, visae kilamaramña merarava ruru wo, visu ruru nena sur lala, yoko ve sa naña tasneña pulemamaga nena e yomerarava. Ana visae kilamaramña viowa, pinaia sur la punu ga naña suña pisuia, yoko ve sa naña losineña pulen nena yemalolo. ³⁵ Visae sanene monar avisuar ruru amiu, vena kapi vivaga naña teke e losinemiu ve imi re si ve sa yemalolo. ³⁶ A visae losinemiu la ulen ruru luen ga kapi vivaga silaga, naña ve narin malo re nena tai teke ea, yoko kiamiu malena tego ruru nenaga, tegoli make yo punu ga.”

Yesu pis m̄arera pa li nasumonen nalotena lala

Matiu 23:1-36; Mak 12:38-40; Luk 20:45-47

³⁷ Yesu pis m̄a pa p̄ina la pa sanene, ana Varasi tai naña toña miyagogonia pisa pania pisape yoko were va m̄ana, kila kinanen tai vania. Ana

amio Yesu apano, ana pog naŭa kinanena su ruru pa sike na, ana Yesu pa totano e lelen kinanena. ³⁸ Ana e pogos nene, Varasi lala la sane monar atarar m̄arera navisaluaena tai naŭa sane yar monar taveve mrapa laŭasa nakevanen limana, ŭisi na kilia kinana. A Varasi naŭani sitom pisape Yesu naga pe yaru wa tai, naga monar kila ve sa naŭa kiela ŭelaga m̄arera nene pisa, ana pogos naŭa pisu sane Yesu pe sitom manene re kilaen poli, naga milan manene paŭisi. ³⁹ Ana Suŭe pis pa yar naŭani, pisape “In na nekilia make kiamiu ŭelaga le Varasi la rui. Amiu na sinemiun manene asape akevan ruru m̄amiu piala amio kamiu pialora la silaga, ana apilaven paŭisi, asitom ke asape kam na amekik paŭisi ne, a ape yar wa. Ana pupia kororaki sike e amiu na wa, komin losinemiun lala pulen kilakotaliaen yaru, a nakila kareen yaru, a ŭelaga viowa la ne sanene. ⁴⁰ !E, ve ave wowe re sanene! ?Pe apisu kilale re naŭa asape Ntewa nene naŭa si make sur na vanua e sur punu ga, naga si m̄ena loyuma na sur make ga, ana po paŭisi naŭa visae akila yepas nemiun la punu ga ikik ruru nena wo lelaga, vanua amio loyuma. ⁴¹ Sur nowo la naŭa asum̄a akokonia manene ke e kamiu pialora amio m̄amiu piala lala, visae aliŭere re ga laŭas va yar la naŭa limala plasia, vera na wo na wo. Visae ve sanene, pona yoko aŭisu kiamiu sur la imi ikik ruru yo rui, ana ve aŭareran re si kilaen kiamiu ŭelaga taŭena laŭasia.”

⁴² Ana Yesu pisayu ŭelaga navisokanena kiena ne li na sumonen na lotena lala pa laa sane,

pisape “!Amiu le Varasi lala, o! Akila kare amiu pañisi wa, yoko viowa manene laa van amiu. In na nekilia ña naña apisuar ruru ke silaga, asape visae awar kamiu kinanena ve lualima, yoko monar tai va e yuñã ñana Ntewa, sa naña navisaluaena suñã pisa, a asuñã akila ke sanene e kamiu sur punu ga, pano-o tol ñena narin ñas nen kapis lala a sur ñena la naña sane mrasil. Ana sur kerkeviu la naña navisaluaena pisa, kam na pe asitom re nena poli, sa naña pisape monar amesmes ruru wo, a monar sinemiun si Ntewa a yar tañena lala. Visae sinemiun uararen narin sur la nene ñarera, naga pogaga, ana pupia sur kerkeviu la nene popon visae asuñã akila ga rui, ana pe akilali re nenaga.

⁴³ “!Amiu le Varasi lala, o! Akila kare amiu pañisi wa, yoko viowa van amiu vañisi. Loyuñã e yuñã na leniena lala, sinemiun asape ato luen ga tano e lelen yerkawa lala, a visae ayaloro e marana yeririna lala, sinemiun asape monar avatanon amiu, avio ruru amiu, avisave ‘A ke, navianena wo, pokolulagi!’ ⁴⁴ Yoko viowa manene van amiu vañisi, komin naña kam na sane suri korena ga, kam na sane lotap marua la naña yaru la sinela ñesan rui, ana amialor ke ga meta ea, pe apisu kilia re asape suri kona tai menunu ñeke tano e poli.”

⁴⁵ Ana e poglis nene, yar tai naña pe manmarua ruru e navisaluaena, naga ñena suñã miyagogonia, ana mloge sane visena kiena ne Yesu tol ruru naga amio ñena la naña amiyuñae ke sane naga, ana pisape “!Navianena, nemloge

sane sinonñan osape ovisa kare imimi towe mñena ga!”

⁴⁶ Ana Yesu pisatañea, pisape “!Ee, yoko viowa mñena van amiu li navisaluaen lala! Asumña apisir plan ke sina narin navisaluaena lala e lepas nen nalotena silaga, sane sur urmi la naña asuñña akuanpolo sike e mñasin yar lala asape monar awaria, ana amiu, asuñña ga sanene, pe akululun re nena mrasilmamiu tai vena akilali naña aiila la. ⁴⁷ Yoko viowa nena van amiu, komin naña kam na asuñña amiyowauia ruru ke tampona kiena navisawalena la kiena ne Ntewa, ana amiu na maran taaga ga sa ke repimiu marua la nanua sumo, naña la ke narui naña añe moñar navisawalena la nene. ⁴⁸ Kam na amio la nene maran taaga, komin nanua sumo, yermarua la nene la añe moñar navisawalena lala, ana nanagane kam na akekaran ke yuññaena ken la nene, kam na asikol ke si ne naña asuñña amioa ke kiela tampona lala.

⁴⁹ “Kam na sane na visena na manmaruaena kiena ne Ntewa naña pisa nanua sumo, naña pisape ‘Yoko neligan kiau navisawalena lala a kiau li nalologena lala imi van la, ana yoko akila kare la, pona yoko awe moñar la.’ ⁵⁰ Visena nini, kana kinasa sane yoko kam ke narui naña akus nakoena kiena ne nawemñaren navisawalen la punu ga naña repimiu na sumo lala añe moñar la, siar e nasiaren purpes nen yomarava nini. ⁵¹ Naga nene siar e Epela nene, pimi tol Sakaraea naña repimiu la nene añemñaria likan wonta amio yo wa loyuñña e yuñña wa mñana ne Ntewa. Lelaga nane nevisa van amiu ne, sane nakoena

na kuruta kana navisawalena lala kiena ne Ntewa sike e kam nanagane.

⁵² “Ee, piowa pan amiu yaru na kilia ruruen navisaluaena lala, komin kam ke naña amlawan ki na pulutava na kiliaena, ana kam na pe apa re si loyũa e poli, a asumũa asuwo ke mrapa pan yar taņena la naña sinelan asape ava loyũa.”

⁵³ Ana Yesu pisa pa visena la nene, molue petan yumũa nene pano, ana navianen navisaluaena lala amio Varasi lala sinela mlæan naga paņisi, naña sinela mimi kar paņisi. Ana la apanon Yesu silaga, asumũa akuan ke visen m̃arera a naviunen m̃arera la pania vena ayurli naga, ana akilali m̃ena naña asape naga visa visena laņasa naña ve memes re. ⁵⁴ La apanon Yesu sa naña naga pe sur tetan tai, komin naña sinelan asape alual kiena visena laņas naña torokin aliņere naga vanonia.

12

Navisawanena lala naña tapolou yoko aim akate e yometava

Matiu 10:26-27

¹ Ana ãina la apim ke puna Yesu na wa, la ataulu manu mok liu, a poglis naña apim ke lele taaga sanene, yo ve tokaki ga, a asumũa apieyepal kare ke ga lala lala. Ana pogos naña Yesu pe pis re pan la poli wa, pis ãesan pa kiena nalogena lala, pisape “Kam na avisuar ruru amiu e ãelaga viowa kiena ne Varasi lala, komin naña la asumũa apivis ke ga e gola, la asumũa apis vilave

ke sanene, ana apisokan ga ne. Pelaga viowa kien la nene kilia va tolkare yar taþena lala, sa naþa is na kilaparavi naga ve tokak ga ana þarmake puluyavi na kilaparavi nene veraga. ² Sur viowa make ga naþa yar la ne sanene asuñã amiyuñãen vinaun ke na, pona naþa apisawan ke ga, yoko amolmolue e yo metava na wa, vena yar punu ga akilia. ³ Visena ya naþa yar pisa ke ga e yemalolo, yoko monar aloge siña ko legiena, a sur la naþa yar pisa mumun ke ga ñana loyuñã, yoko monar avion manene si va metava e maran yar make ga, vena yar make ga akilia aloge.”

Nalogenã kiena Yesu naga monar ve maraun re yaru

Matiu 10:28-31

⁴ Ana Yesu pisa ñena pa kiena nalogenã lala, pisape “Erau lala, nevisa van amiu sanini, nesape ve amaraun re la naþa akilia awemñar ga tasnemi mare, ana siraunia taþatete si akila sur tai va ninumi. ⁵ Ana in na sineun nesape nevis ruru van amiu nesape yoko amaraun yar ai? Yoko monar amaraun nena Ntewa, naþa naga kilia kilamñar þesan tasnemi sumo, a siraunia kilia kuan ninumi vito e lele na logeen viowa. Lelaga þa, yar ne nanene na monar amaraunia. ⁶ Ana visae amaraunia, yoko taþatete si amaraun sur tai, komin Ntewa na suñã pisuar ruru amiu ñaga, sitomñal amiu ñaga. Asitomli narin ninlaea la naþa la moki kar ga asike ne, sa ga kororaki, a yar la asuñã aþiliwilin ke la lima e

ga e narin varu tai, ana Ntewa naga sitoñal make la ga peve taaga silaga, pe sinen p̄esan la re nena poli. ⁷ A vilp̄arimiu m̄ena lala, moki pañisi, ana naga polo make vilp̄arimiu la peve taaga na sike ne. A Ntewa na pisu amiu na po pañisi, taulu ninlaea la nene, ana yoko visuar amiu e sur punu ga na kiamiu malena lala.”

Yar naña pisawal pisape naga pe kiena ne Yesu Matiu 10:32-33, 12:32, 10:19-20

⁸ Ana Yesu pisape “Yar a naña pisawal e maran yar lala pisape naga pe kiau tai, yoko inu Narina ne Yeririna inu m̄ena nevisawal e marana ne navisi lala nae ma e peni nevisave yar nene naga pe kiau. ⁹ Ana yar a naña pisawal e maran yar lala pisape pe pe kiau re poli, yoko inu Narina ne Yeririna inu m̄ena nevisawal e marana yar lala nevisave yaru nene na pe pe kiau re poli.

¹⁰ “Mlamulen viowa amio visen viowa lala, a visena naña kila kare inu Narina ne Yeririna, Ntewa kilia viewo ke yar vanon na wa. A yar naña kila kare sur wa kiena ne Ninuna Wa, pisayu yuñena kiena ne Ninuna Wa pisape Yermare Lego ga miyuñena, yar na sanene Ntewa tañatete viewo pogos tai.”

¹¹ “A visae pogos lañasia, yar la sinela kar amiu, yoko avis van amiu. Yoko akilia aure amiu ava asuñal ase maran yerkawa lala na yuñ na leniena, pona kumali, ana ve asitom manene re avisave yoko akilia avisatam̄e la ve sanape ne, pona yoko avisa visena ya na van la ne. ¹² E nena

e aora ga nene, yoko Ninuna Wa ga iila amiu, vian amiu e visena ya naña akilia avisa.”

Pakaiwa na yaru na sur moki naña pe sitom ruru re kiena malena poli

¹³ Ana yaru na p̃ina nene tai pion ke pa Yesu, pisape “Navianena, wolai sum̃a kila kare in ke ne, pe mliṗere ruru re lalimana arimamimi pan in poli. Popon ovisa vania monar kila mesmes ga van inu.”

¹⁴ Ana Yesu pisataṃea, pisape “Peraga yaru, sur nene ve in re na nekila. In na pe nepe yar na liṗereen re yar poli.” ¹⁵ Sanene, Yesu pe kila re sa naña yar nene pisa poli, ana mla visena tai pan la e lepas na sinesunen manenea. Naga pisape “Monar avisu ruruia, pe pon re avieluen manene yar taṗena la poli, sinemiun manene laa asape awar kiela sur lala. Kieta malena pe su re e sur moki la naña towar poli, ana kieta malena na sum̃al ga sike e sur taṗena.”

¹⁶ Ana e nene Yesu sikol kiena visena pa laa sane, naga pisa ṗakaiwa tai pan la, pisape “Yar na sur moki tai, kiena porotano keviu paṗisi, a po ṃena paṗisi, ana kana lokove la ṗar kinanen moki paṗisi. ¹⁷ Ana yar naña pisu kinanena la nene, sitom ṗele narui, pisape yoko naga kila ve sanape ne, yoko ligan ruru kana kinanena la nene su pe ne, komin kiena yuṃa na kinanena lala a kiena yo taṗena la puleule make rui. ¹⁸ Ana yar naṗani pisape ‘Yoko nowe plan ga kiau yuṃa na kinanena na urmarua la nene, ana nekila si urviu laṗasa, naña akerkeviu laa sane, atorokin kinanen make la nene amio kiau sur

moki taṭena la naṭa sike ne. ¹⁹ Pogos naṭa nekila pae, yoko nevisave in na sane in ke narui, in na nopo laa narui. !Lelaga ṭa, yoko neloge wo vaṭisi! Kiau sur moki la nene, yoko nakan la mā sanene vano-o, la avisuar ruru inu e kas ve moki. E pogos nene, in na taṭatete si neyuṃae narui, yoko in na nakan ga ya naṭa in na sineunia, yoko nomun korena ga suria, sane nesu luen ga e malena wo narui.'

²⁰ "Yar nene sitomiyu ke sanene pano, ana mninue ga, naga ke naṭa Ntewa kila ruru ke sape vis van narui, visave 'Peraga yaru, ko na ope wowe ga. Yemalo ga nini, nesape nelalua si kioṃa malena vetan ko. A kioṃa sur moki la naṭa om̄areran omiyuwon polo pe kioṃa sike ne, yoko a ne ve kiena si narui?' "

²¹ Ana Yesu pisa pan la, pisape "Yoko ve sa ke nene narui va la naṭa amiyuwon polo ke kiela sur lala, la ape yar na sur moki e yomarava nini, ana la pe ape yar na sur moki re nenaga e lepas kiena ne Ntewa."

Yesu pian la sanapen yar naṭa sitom manene kiena malena

Matiu 6:25-34

²² Ana Yesu pisa ṃena pan kiena yeririna lala, pisape "Visae sanene, in na nevisa van amiu, nevisave, pe pon re kiamiu sitomena la ulen manene kiamiu yuṃaena na visuar amiuen ga la poli, naṭa apiuviun ke asape '?Yoko telual kata kinanena pe ne?' pona '?Yoko tetol ṃata kulmrae na yenen sanape ne?' ²³ Sitomen la nene pe mesmes re poli, komin kiamiu malena naga to laa metavan kinanena, a yepemiu na

to laa metavan kulmrae. ²⁴ Asitomli sako la ne akaka kar ke la ne. La nene pe amapla re lokove po, la pe apanon re añar kinanena pimi po, a pe lelen kala kinanena re tai naña awarpolo se poli. Ana Ntewa pagan la ke ne, a e kiena navisuena, naga pisu amiu ato manene laa metavan manu la nañani, ana naga monar visuar amiu manene laa na wa taulu la. ²⁵ ?Asitom asape yar naña naga sitom manene laa kiena malena naga kilia kila kiena malena naña plas imi ve piavi li laa sane? ²⁶ Peraga, pe sa re nene po, komin naña kam na tařatete akila narin sur tai ne sanene, po pon kam na ve asitom manene re sur tařena lala e kiamiu malena.

²⁷ “Asitomli meme tanea la ne pitotovi kar ke ga la ne. La na pe amiyuñae re poli, a pe asuluwo re mñala kulmrae la poli. Ana nevisa van amiu, řarin suře Solomon nanua sumo, naga pe yar na sur moki a naga kiena sur make ga, ana mñana kulsota pe miyowau ruru re poli sane meme la nene. ²⁸ Meme la nene na legiena taaga ga, yoko peni ga na asikapi la, ana Ntewa sumā miyowauia ruru la pařisi. ?Ana asitom asape yoko tařatete Ntewa war kulsota van amiu? Peraga, kam na pe apiawa re nena mñarera e naga poli. ²⁹ Komin sur ne la na nene, pe pon re sinemiu ulen manene sitomena, naña asape ‘?Sanape na yoko tekinana, pona tomun suria, pona telual mñata kulsota?’ Pe pon re asitom manene sur la sanene poli. ³⁰ Ee lelaga řa, yar make ga lala na purvanua kerkeviu na yomarava nini la asumā asitom manene sur la ne sanene silaga, ana amiu na, Arimamiu kilia pa rui sape

yoko monar awar sur la nene. ³¹ Sur naþa asitom þesan ve keviu e kiamiu malena, naga navesuþenena kiena ne Ntewa. A visae akila sanene, yoko naga la mena sur taþena la nene van amiu. ³² Lelaga þa, kiau narin sipsip lala, Arimamiu sinenan manene paþisi sape taan amiu aimi avesuþen kiena yeririna lala, ana kam na taþatete sinemiu konan sur tai, yoko suri punu ga woga ga van amiu.”

Yar naþa naga pe yar na suri moki

Matiu 6:19-21

³³ Ana Yesu pisapenua “Po pon auliwilin plan kiamiu sur la nene, awar kana varu la va van la naþa limala korena vena aiila la. Visae akila sanene, sa naþa aþar ke kiamiu pupia karo tai naþa meke ma e peni, naþa taþatete viowa pogos tai, a akokonia ke kiamiu sur moki paþisi pito ke ea, naþa akilia awasinea, naþa yar navinauena taþatete si warlua vetan amiu, naþa kirara la taþatete si akila karea. ³⁴ Popon sane kam na kiamiu sur nowo la ve moki sanene su ma e peni, komin naþa yoko kiamiu sitomena lala sulue ga e yo nene naþa kiamiu sur nowo la sike ea.”

Nalogena la monar asu ruruian naþa Suþe wasuþe sina

Matiu 24:42-51; Mak 13:33-36

³⁵⁻³⁶ Ana Yesu pisa mena pan la, pisape “Monar asu ruru silaga vena kiamiu Suþe imi malivin amiu. Kam na monar ave sa yar na yuaena kiena ne yerkawa tai, naþa mligan la vena va e talopaena tai. A amiyowau ruruia, a asilan kiela kapi lala, asualu ga asua ga, ana pog ya naþa

kiela yerkawa imi m̃alivin la, sigariga mratava, ana la asu ruru asike rui, akilia avietavan veraga. ³⁷ Pupia navisa ruruena sike e yar la naṗa amiyum̃ae sanene, pogos naṗa kiela yerkawa pimi m̃alivin la, ana asum̃ate m̃a naga, atavilo ga asum̃a ga. Yokorena kiela yerkawa kekaran la vaṗisi, ana yoko naga va yowau, siraunia imi ana la aiilan ga naṗa vio la vena atotano e kana lelen kinanena, naga piovion kala kinanena tanea nene. ³⁸ Pe sur koren ga visae yemalo rui, pona pa ko yepelilika la ne, pona lavis lakaporo kokoreko, ana visae yerkawa naṗani imi lual kiena yeririna la atavilon ke sanene wa, ṗisi na naga kila wo manene laa van la sane wa.

³⁹ “Ana maran taaga sina ga, visae yar tai kilia ruru pogos naṗa yoko yar na vinauena tai imi m̃ana, yoko yar nene taṗatete ligan m̃ana yuṗa ana va koyo tai, ana naga monar su ruru ga sum̃ate m̃aga. ⁴⁰ Ana visae sanene, kam m̃ena monar asururuia, asum̃ate naṗa inu Narina ne Yeririna neim nom̃alivi, komin naṗa yoko neim nom̃alivin amiu sina e pogos tai naṗa pe yar tai kilia re poli, pona sitom ke sape yoko nowasuṗe inu ea.”

Pakaiwa na yar na yuṗaena naṗa kiena yerkawa ṗasuṗe si pimi

Matu 24:45-51

⁴¹ Ana Pita piun tan Yesu, pisape “? Suṗe, ṗakaiwa naṗa opisa ga na wa, opisa ga pan imimi imimi kiom̃a li nalologena lala, pona pe kien

yaru make ga?” ⁴² Ana Yesu pe pisatañe ruru re poli, ana pisatañea e ãakaiwa tai.

Ãakaiwa nena sanini “?Visae yar na yuñæna tai, naña naga pe manmarua ruru ea, a naga ãuarar ruru yuñæna nene, naga yuñæ sanape? Visae kiena yerkawa ligam yo vena va perina, ana yerkawa nañani ligam kiena yuñæna lala se e limana. Ana yar nene naga visuar ruru yar na yuñæna tañena lala, yoko uarar ruru yuñæna la nene. ⁴³ A pogos naña yerkawa wasuñe sina, yoko lual sane yar na kiena yuñæna nañani, suña ãuarar ruru ke yuñæna la naña na wa. Ana e pogos nene, yar na yuñæna nañani kilia loge wo vañisi, ⁴⁴ komin yoko yerkawa nañani ligam make kiena sur la e limana ne. Ee, a yoko Ntewa mña ga kila ve sa ke ga.

⁴⁵ “Ana visae yar na yuñæna nañani yuñæ viowa ga, ana pogos naña kiena yerkawa mligam yo pa sike perina, yoko naga sitom visave ‘E, yerkawa nene pa sike gare piavi laa narui, pona ve imi re si yo.’ Ana yoko naga suñalu kila viowa va kiena yar na yuñæna lala, pona sira na yuñæna lala, a yoko naga suña kinanan kilavaru kiena ne yerkawa nañani, a va mun luen ga wii e legiena punu ga. ⁴⁶ Ana yoko yerkawa nañani wasuñe sina e legiena tai naña yar na yuñæna nene ilan ga, e pogos tai naña yar nene pe sitom re pisape yoko imi e poli. Ana yoko yerkawa nañani la pupia nakoæna tai van yar nene, naña yoko kila naga va sike e yo kiena ne ãarmarera lala.

⁴⁷ “Yar na yuũaena naũa kilia ruru ya naũa kiena yerkawa sinenan pisape monar kila, ana siraunia naga pe kila re poli, yoko awe kare naga vaũisi. ⁴⁸ A yar na yuũaena naũa kila piowa sane popon awe kare naga, ana komin naga mninue ga, yoko taũatete awe manene naga.

“Yar naũa Ntewa mla keviu pania, Ntewa sinenan pisape visu yaru nene yuũae ve keviu mũena amio. A yar naũa visae yar la amligan sur la moki se limana, yoko aviun ke sina sur ve moki vania va laa sane na wa.”

Yesu pe purũes nen yar na kaween yaru

Matiu 10:34-36

⁴⁹ Ana Yesu pisape “In na nepimin nena nesape neligan kapi e yomarava nini, a popon manene visae kapi nene vivaga rui, ana pere wa. ⁵⁰ Ana pupia yuũaena tai sike vamon inu wa, vena in na monar neva nowarpoyo ea, a nanagane in na nakawean in manene ke vanon rui. Popon sur nene imi vilaga, vena nekilia nekila makea. ⁵¹ ? Kam na asitom ke asape in na nepimin nekila sa naũa pupia sumãare imi sike e yomarava? Peraga, in na pe nepimin re neligan sumãare e poli, ana in na nepimin nekila ãelaga na viaũaena imi ve keviu. ⁵² Siar nanagane, pona e uũa tai, yar la lima asike ea, ana yoko la ve telu aviaũa vetan la ve lua, pona la lua aviaũa vetan la ve telu. ⁵³ Yoko yar la asumã aviaviaũa, naũa yoko mũee lala akawe arimala lala, arimala lala akawe narila mũee lala, a anela lala akawe narila sira mũee lala, a sira mũee lala akawe anela lala, a

yoko anen simem lala yoko akawe sira la naña atalopa amio narila na yermene lala, a yoko sira la nañani akawe anela simem la nene.”

*Monar avisu kilale kile na pogos kiena ne Yesu
Matiu 16:2-3*

⁵⁴ Ana Yesu pis sina ga pa pına lala, pisape “Pogos naña ita tevisu pupia malo mēke e yo naña lagi molue ke kom ea, tekilia tesape pisi na yua wowo, a ve ve piavi re yoko yua nene imi.

⁵⁵ A pogos naña visae teloge kieta lagi ura yui, nanene na tekilia tesape yepisusun vañisi ne, a yokorena monar ve sa ga nene narui. ⁵⁶ ?Nanene narui, nane asumña apisu kilale ke kile lala na sinapane a na yomarava nini narui, avisave yoko pogos ve sanape pona ve sanape, ana sanapen naña pe apisu kilale re kiau kile la poli, na pupia pogos nanagane naña nesike nemio amiu ea? ? Pona kam na yepemiu mavin ga visu kilaleen yo? Aulai, kam na apilaven manene laa kiamiu visen koren la nene pañisi wa.

⁵⁷ “Popon kam akilali naña akilia towe laa narui sane mrapa ya naña mesmesun aliluia.

⁵⁸ Visae pogos tai oveveyun sur tai omio yar tai, ana naga sinenan pisape were ko ova osuñalu ose marana ne yar nalipereena, popon okilayonli naña vena ovis ruru omio naga sumo wa, pogos naña pe atol re kumali poli wa. Visae peraga, pona naga ligam ko e limana ne yerkaawa na lipereen yar yo, ana yerkaawa nañani pona naga ligam ko mēna ova e limana ne yar na taren yaru lala, a yaru na taren yar lala pona aligan ko e yuñna nakoarena yo. ⁵⁹ Lelaga, nevisa van

ko sanini, nesape visae sanene, yoko tařatete si omolue e yuńa nakoarena, vano-o oul plan make kiońa nakoarena sumo wa, řisi na okilia omolue sina.”

“Ana visena nini pe lelaga e kiamiu malena na yomarava nini, a pe lelaga ĩena e lepas na pun amiu amio Ntewa.”

13

Visae ve ovilopu ko re yoko omare

¹ Ana yeririna lařas nařa asike e pogos nene, la asunyu pa Yesu e lepas kiena ne le Kalele lařasia, nařa yerkawa nae Rom nařa Paelat kila řelaga piowa tai pan la. Apisape “La nene, asike e Yumńa Wa ĩana ne Ntewa, ana pogos nena nařa amlotun ke Ntewa akila kuřařaena pania, Paelat la apim amial momńar la. A la ařalelar kuruta kan la nene amio kuruta na kuřařaena nene nařa la asumńa akila ke ne.”

Ana pogos nařa apisa sur nene pa Yesu, la asitom pa rui asape sur viowa nene nařa pimi ĩalivin la nene, pona nakoarena kiena ne Ntewa tai nene yo komin kiela sur viowa lařas nařa akila. ² Ana Yesu pisatańe la, pisape “?Kam na apisu le Kalele la nařa kiela marena piowa sanene, asitom sanape? ?Pona kam na asitom ke asape la nene na ape yar viowa la lala, taulu le Kalele tařena lala, pona kiela nakoarena ga?

³ In na sineun nesape nevisa van amiu nevisave peraga, pe sa re nene poli. Ana kam na monar avisuar ruruia, komin visae ve avilopu amiu re, yoko kam ĩena amare e řelaga tai ve sa

ke nene. ⁴ A kam na asitomyuli mēna yuñā na kirakiravaena naña mēke e pulkumali naña Siloam. Naga mon manene metava pañisi, ana poglis nanua mloru ne, ana kowar yar lala, la lualima taaga pa orelu [18] amare. ?Sanapen la nene? ?Pona kam na asitom ke asape la mēna apiowa laa taulu le Yerusalem tañena lala, pona nanene na sane kiela nakoena ga ne? ⁵ Ana peraga, naga mēna pe sa re nene poli. Ana in na nevisa si van amiu, kam na monar avisuar ruru amiu, komin visae ve avilopu amiu re, yoko kam mēna amare ke ga e ãelaga tai ve sa nene.”

Pakaiwa na purpiliva naña pe ãar re mras poli

⁶ Ana Yesu pisa sina ãakaiwa tai, naña pisa sanini, pisape “Yar tai, kana purpiliva tai kapuru sike e kana lokove. Ana pogos tai yar nañani pimin purlaki nena, sinenan pisape visulia ãar ña mrasa pona peraga. Ana pimi pisulia, ñal purlaki naña pe ãar re nena mras poli. ⁷ Ana pis pa yar naña pisuar ke kana lokove, pisape ‘Nanagane tol kas telu narui naña nepimin nakale mras nen purpiliva nini, ana peraga. Sineu maren rui, naga mono korenan ke ga yo wo nene, yoko otelua ga vano.’

⁸ “Ana yar nene sinen miye purpiliva nañani, pisa pa kiena yerkawa, pisape ‘Visae sanene, yoko teliganli mon ña tol si kas ve taaga. Yoko nekilayonli naña nekila ruru sumo, yoko nekilvivi purpessa, a yoko nokoven sin puluk lañas va ea vena kila kapur wo. ⁹ Ana visae kapur wo, war towe ña mras lañas e kas na sirau, yoko kilia

sumña ga sanene, ana visae peraga, naga narui yoko otelua ga na wa.' ”

Ana ðakaiwa nene pisayu ke sape narin pulmas teke ga wa naþa yaru la akilia avilon la, visae peraga, yoko Ntewa la nakoarena van la.

Yesu kila ruru sira marua tai e Legiena Wa

¹⁰ Ana e Legiena Wa tai, Yesu sumña pian ke yeririna lala loyuma e kiela yuma na leniena.

¹¹ Ana e yo nene, sira marua tai sumña ea, naþa ninuna na maiena viowa sike ea. Ana ninuna nene kila naga pa tol kas lualima taaga pa orelu [18] rui, kila masina ne sira nene pulu nena paþisi, naga sumñalu mesmes þele sina. ¹² Ana pogos naþa Yesu pisuia, pio pimi, pisa pania, pisape “Sira marua, nevisa sanini, nevisave ko, inanena naþa piar ko ke ne, ligan ko ga nanagane.” ¹³ A Yesu mligan limana tea amio visena nene, ana masina pimi po ruru veraga e nena e pog naþani, ana sira naþani mloge po paþisi, mieluar Ntewa.

¹⁴ Ana nasumonen na yuma na leniena naþani sinen kar Yesu vanon naþa kila ruru sira naþa e Legiena Wa. Ana pis pa yeririna lala, pisape “Sa naþa tekilia rui, tekilia teyuma e legiena ve orai, a legiena ve taaga ve teyuma re. Visae sinemiun naþa akila plan maiena vetan amiu, popon aimi e legiena orai la nene, ana Legiena Wa na sa nini pe pe kana pogos re nene poli.”

¹⁵ Ana Suþe pisatamea, pisape “?Sanape? ?Pona akepu ke kiamiu puluk la e Legiena Wa yo, pona pe akila re poli? ?Pona apagan ke kiamiu sur mal lala, pona amla wii pan la e Legiena Wa yo,

pona pe akila re poli? ?Ana vanon ya ne kam na pe akekaran re naña nekila suri wo e sira marua nene? !Kam na ape yar navilavenen ga vis korenena nene! ¹⁶ Sira marua nini, naga vineta tai naña ita punu ga tomolue e lus kiena ne Epraam, ana Yermare Lego piar manene panon inanena nene m̃ene kas lualima taaga pa orelu rui. Ana in na nepisu sane Legiena Wa naga torokin ga naña tourelua naga e yo viowa naña naga sike ea.”

¹⁷ A pogos naña Yesu pisa visena nene, kila kiena nasinekar la nañani amloge amawa pañisi e marana ne yeririna lala. Ana yar tañena lala, la amloge akekara pañisi e yuñaena nam̃areraena wo la naña Yesu kila pan la.

Pakaiwa na kurus nen mrapa

Matiu 13:31-32; Mak 4:30-32

¹⁸ Ana Yesu pisa ke sina ga, pisape “?Yoko nevisa visena ya ne van amiu vena kila na akilia sane nasuñenena kiena ne Ntewa naga sanape? Yoko nevisave nasuñenena nene naga sane sur ya? ¹⁹ Yoko nekilali naña nekila merarava van amiu e ãakaiwa nini, naña pisape: Nasuñenena nene, naga sane kurus nen mrapa naña mloru pito pelan te laki tai. Kurus nene na ve tokak pañisi, ana pogos naña kapuru, pimi pe purlaki tai naña keviu manene laa, ana manu la akila m̃ala ponovi lala e kana korowas lala.”

Pakaiwa na is

Matiu 13:33

²⁰ Ana Yesu pisa sina ãakaiwa tañena pan la, pisape “?Pona nevisave nasuñenena kiena ne

Ntewa sa si ya narui? ²¹ Nasuḻenena nene, naga sane sira tai ḻalelar is amio yavi na kilaparavi pa e pupia pialora tai, ana narin is naḻani kila kilaparavi la punu nene mlapa.”

Mrapa lua ga

Matiu 7:13-14,21-23

²² Ana Yesu mla si kiena mrapa, sinenan pisape va ma Yerusalem. Ana pogos naḻa pa sane, pa kome pulkumali lala, suḻa pian ke yeririna lala. ²³ Ana yar tai piun tania, pisape “?Suḻe, la naḻa yoko atol malena la moki, pona pe la moki manene re poli?”

²⁴ Ana Yesu pisataḻe la, pisape “Monar akilay-onli naḻa ava loyumuḻa e pulutava taḻena nene, naḻa ve tokak la ga. Nepisa ke lelaga na pan amiu ne, nesape yoko yar la ve moki naḻa sinelan asape ava loyumuḻa, ana yoko taḻatete akila. ²⁵ Nanene komin naḻa siraunia, yoko yerkawa na yumuḻa, naga visu sane toroki rui, ana yoko naga suḻalu, kotava ruru sina. E pogos nene, yoko kam ve moki naḻa aim awon amiu ase mratava nene, asigar ga avio, avisave ‘Suḻe-o, awis ovietavan imimi!’ Ana yoko yerkawa naḻani visataḻe ga sanini visave ‘Peraga o, nemninue amiu nena ga! Kam na yer pe la nene?’ ²⁶ Ana yoko akilali naḻa avisa van e pogos nene, avisave ‘?Ana sanape, ko na pe ositoḻal re si naḻa osape ita ke narui nanua tesumuḻa tekinan ke lele taaga ne? Imimi ke narui naḻa opam opian imimi ke e yometava la nene e kiamimi pulkumali lala?’ ²⁷ Ana yoko naga visa van la, visave ‘In na nepisa pan amiu yam tai rui, nesape

nemninue amiu nena ga, nesape kam na yer pe la nene. Nekilia nesape kam la nene kam na yar na kilaen ga ðelaga viowa lala. !Pogaga, kam na aure matan inu nagane!’²⁸ E pogos nene, yoko kam na aloge viowa vaþisi, yoko atag vano-o þisa, asumã akar maluemi. Nanene komin naþa yoko kam na avisu yeririna wo lala kiena ne Ntewa, naþa sane Epraam, Aisak, Sekop, a navisawalen taþena m̃ena ga lala, la asu ruru ga asike loyumã e kiena nasuþenena ana kam na akoven amiu asumãlu asumã ga vanua sanene.

²⁹ “E pogos nene, yoko yeririna taþena la ve moki naþa amolue e mrapun yomarava varoka, aimi atotano vena akinana e pupia þaþagena loyumã e navesuþenena kiena ne Ntewa, ana kam na taþatete ava loyumã.”

³⁰ Ana Yesu pisa make kiena visena e pogos nene, pisape “Ana yar la naþa asirau, þisi na la asumo, a la naþa asumo, þisi na la asirau.”

Parin Suþe Erot sape weñar Yesu

Matiu 23:37-39

³¹ Ana e pogos nene naþa Yesu pa ke ma Yerusalem wa, Varasi laþas apim puna, apisawal pania, apisape “Pona ko pe okilia re poli yo, naþa Parin Suþe Erot, naga pisaar rui pisape yoko weñar ko. Popon oure ova gar Yutea sumo wa, komin naga pisuar ke lepas nini.”

³² Ana Yesu pisatañe la, pisape “In na pe nesitom re kawe nene nesape naga pe yar tai naþa kilia kila sur tai van inu poli. Yoko ava

avisawal e marana, avisave in na nekila ke ne kiau yuññaena sumo wa. Avisava vania avisave in na nomñene plan ke yermare lala, a nekila ruru ke namaiena lala, a yoko neyuññae ve sanene ãpane, amio peni, amio ññaena vewo, vano-o nevisu sane nekila make nenaga. ³³ Ana nekilia nevisa van amiu, sane ve asitom manene in re, komin naña e ke e legiena la nene narui, in na nomolue nepa ke sanene narui. Monar neva netol ke ne yo ma Yerusalem wa, komin naña nepisu sane siar nanua sumo yar la aña moñar kiena navisawalena lala e ke e yo nena nene narui.”

Yesu sinen miye Yerusalem

³⁴ Ana e pogos nene, Yesu sitom manene Yerusalem pano-o taginia, pisape “Yerusalem o! Komin ya ne omñe moñar ke navisawalena lala, a okove moñar ke yar la naña Ntewa mligan la pimi pan ko? Yam mok liu naña sineun nesape neligan lumñau yervivi kioña yeririna lala, sa naña lakaporo mligan narina lala apim atapolou vatanon kupena, ana kioña yeririna lala pe akekaran re poli. ³⁵ Ana opisu ke ne, Ntewa pilon ke mñasina pan ko narui, ana naga pitetalia inu nepim ães e nini, ana nevisa van ko, nesape yoko kioña yeririna lala taãatete si alual inu, vano-o tol pogos naña avisu kilale inu, avisayu inu, avisave

‘!Ntewa na mava, ovisa ruru naga naña pimi e kioña kia!’ ”

14

Yesu kila ruru namaiena tai

¹ Ana e Legiena Wa tai, nasumonena tai kiena ne Varasi lala ðere Yesu pa kinan m̃ana. Ana yar taþena m̃ena la þasia asike e pogos nene, naþa pe sinelan re Yesu poli, la asum̃a apisusu naga visae kila sur tai naþa ve mesmes re, la akilia akila sur tai vania. ² Ana yar namaiena tai sike loyumuãa amio la e pogos nene, naþa yar nena yepena la sirorop paþisi. Ana Yesu pisu yar nene, ³ ana pis pa navianena navisaluaena lala, piun tan la pisape “?Sanape e lepas na kieta navisaluaena? ?Pisape tekilia tekila ruru maiena e Legiena Wa, pona pisaluþar pisape ve tekila ruru re?”

⁴ Ana pogos naþa Yesu piun naviunena nene, apisu sane taþatete avisatam̃ea, atopur nenaga. Ana Yesu ðere yar naþani pimi lavis puna, kila ruru sina, ana pisape kilia wasuþe si va ga um̃a. ⁵ Ana naga pis pa la naþa asike ne, pisape “Kam na asitomyulia. Visae kam yar tai nene, e Legiena Wa tai, narina tai pona kiena sur mali tai va loru vito e þiliþili na wii tai, ana yoko okila ve sanape? ?Yoko ovitaþilin ne, naþa ova ga ourelua si ne, pona ovisave: Ke, piowa narui e, nagane na Legiena Wa nini narui, navisaluaena pisape ve neyumuãe re e Legiena Wa, ana pona naruu pona kiau sur mali nene mon m̃a e þiliþili wa, neva ga nourelua peni? Peraga, pona yoko ovitaþilin ga ourelua yo.”

⁶ Ana la amninue kare narui am̃a yoko avisa-tam̃e si naga e lepas nene ve sanape, la asupur ga asike na.

Pe pon re yar ga visirlua sina naga poli

⁷ Ana pogos naña apim asun ke naña atotano e kinanena nene, Yesu pisu kilale naña la taņena laņas naña þar na þaņagena pio la apimi, sinelan manene alual yo tai naña po, la apa atowo lelen yerkaŵa la metava. Ana Yesu pisu kiela þelaga navilaveena la nene, ana pisa pan la pisape ⁸ “Visae pogos tai avio kon ova e kinanena natalopaena tai, pona sur tai sane þaņagena, ana pe pon re ovitaņilin naña ova oto nena tano e lelen yerkaŵa la poli. Pona yo nene akila ruru monņate ke pupia yerkaŵa tai yo, ana pe okilia re poli, ⁹ ana yoko þar na þaņagena imi visa van ko, visave ‘Ake wolai, pe sineyeena paņisi, ana yoko otom ke ne tano wa, komin naña oteke e lelen kiau yerkaŵa naña.’ Ana yoko omawa ologe viowa vaņisi, ana yoko monar oto si tano, okilali naña olual narin pulmas tai tano vena okilia olawan maraņa ea.

¹⁰ “Ana þelaga wo na sanini, visae avio ko ova e kinanena tai, pogos naña omalivi ea, yoko ova oto ga tano omio yar kar ga lala. Ana visae þar na þaņagena vim visu ko, visave ‘E, yerkaŵa, nepisuar ruru lelemņa teke meta ma e ne rui. Yoko ita lua tevavini, neligan ruru ko otea.’ Ana e pogos nene, okilia ologe wo vaņisi, naña þar na þaņagena pisirlua ko sanene e maran yeririna taņena la naña akinan ke lele taaga. ¹¹ Naga sanene narui, sane yar naña naga ga pisirlua naga, yoko aligan naga mon tano, ana yaru naña mligan naga mon tano, yoko avisirlua naga.”

Popon ovio mēna yar naña limana korena ga

imi e kioma p̃ap̃agena

¹² Ana e pogos nene, Yesu pisa m̃ena visena tai pa yar naṗa pio naga pimi kinan m̃ana, pisa pania, pisape “Nagane, tepisu pogos naṗa visae yar la akila kinanena tai, la sinelan ga avio kiela erau wo lala, pona kiela wolai lala, pona kiela namratava taṗena lala, amio m̃ena pupia yerkawa la naṗa asike lavisin la. Akila ke sanene, komin akilia ke asape visae siraunia, visae la m̃ena akila kinanena pogos tai, yoko monar akila maran sina van la. ¹³ Ana p̃elaga wo na kilaen e p̃ap̃agena naga pe sa re nene poli. Popon manene ovio yar taṗena lala, sane la naṗa limala korena ga, a la naṗa tasnela la piyowa ga, pona laulu lala, pona kilamara p̃ala lala, yar la ne sanene, la aim akinana amio ko. ¹⁴ Yar sur la ne sanene la taṗatete akilamaran si van ko pogos tai, ana pogos naṗa Ntewa pisu naṗa okekaran opure la nene apim akinana moṃa, yoko naga kekara vaṗisi. Yoko naga visa ruru ko, a yoko owar kioma nalaena wo vanonia, nanene e pogos naṗa naga kila kiena yeririna mesmes lala amal si vetan marena.”

Pakaiwa na visawoena *Matiu 22:10*

¹⁵ Ana yar tai toṃa e kinanena nene, naga mloge m̃a naṗa Yesu pisayu ke pisape yoko Ntewa visir plan kiena yar mesmes lala e legiena maro, ana naga pisape “!Lelaga naṗane, yoko wo manene laa van ita e pogos nene, naṗa ita tesikol ita e pupia p̃ap̃agena nene loyuma e nasuṗenena kiena ne Ntewa!”

¹⁶ Yar nene pona naga sitom ke sape naga po narui, ana yar la na sanene la sinelan re vaen loyuma poli, ana Yesu pisa ðakaiwa tai e lepas nene, naða sanini “Yerkawa tai, naga sinenan pisape kila pupia kinanena tai, ana pio yar la moki naða aimi. ¹⁷ Ana pogos naða kila ruru make sur punu ga ðisi, naga pitetalia kiena yar tai vena vanon were la naða apio la ðisi rui aimi. ¹⁸ Ana pogos naða kana yar nena pimi málivin la, la make ga nene maran taaga asuma akila ke sina ga visena na visawoen suria. Tai pisa sanini, pisape ‘Pogaga, ana in na nopul ga kiau narin porotano tai na wa, ana nepavin ke nesape nevisulia ama porotano nena sanape wa. Yoko ovisa va yerkawa ovisave pe nasineyeena paðisi ana taðatete neimas nanagane.’ ¹⁹ A taðena, pisa sanini pisape ‘Pogaga, ana in na nopul ga kiau puluk laðas na wa, vena ureen kiau kat lala, ana nesape neva nevisu la lia ama anarera ruru maga. Yoko ovisa va yerkawa ovisave pe nasineyeena paðisi, ana in na taðatete neimas nanagane.’ ²⁰ A taðena mena ga, naga pisape ‘Pogaga, ana in na nekila ga paðagena na kiau talopaena nanua ga nagane, ana in na nepisu sane taðatete neimas yo, komin sur moki paðisi.’

²¹ “Ana yar naðani pimi pisawal visena la naðani pan kiena yerkawa, mloge, sinen kar la. Ana naga pitetalia sina kiena yar naðani, pisape ‘Pogaga, oyal kawa, ova e narin mrapa la ne lavis ga nama, ova olual la naða pe kiela sur re poli, amio la naða tasnela la piyowa ga, amio laulu lala, amio kilamara kata lala, ana owere la

nene aimi e kieta p̄aṗagena.’ ²² Ana naga pa kila, ana siraunia p̄asuṗe si pimi pun kiena yerkawa, pisape ‘Suṗe, sur naṗa opisa p̄a, nekila rui, a yaru moki apimi, ana yepa keviu ñeke ga wa.’ ²³ Ana pitetalia ke sina ga, pisape ‘Visae sanene, ova sina, ova kare ga yo uña la e pulkumali, a om̄areran kare ga va yar naṗa visae olualia, ovisave monar aimi, vena akokonia kiau kove, vena akila p̄aṗagena nini imi wo. ²⁴ Taṗena la naṗa akila ke navisawoen viowa lala, in na nepio ruru la nesape aim e p̄aṗagena nini p̄a rui, ana nanagane, yoko taṗatete nena lala yaru tai kan re narin kinakinas nen kinanena tai e p̄aṗagena nini p̄isa, peraga. !Nepisa ruru ga ne!’ ”

Yesu naga monar to sumo e malena kiena ne kiena nalogena lala

Matiu 10:37-38

²⁵ Ana Yesu mla sina kiena mrapa, pa ke meta ma Yerusalem na wa, a pupia p̄ina moki la ataveveia. Amiyal ña pano-o, pilopu naga kira pimi pula, pisa pan la pisape ²⁶ “Yar naṗa sitom sape taveve inu, naga monar ligam inu neto nena sumo e kiena malena, in na neto manene laa metavan arimana, pona anena, pona wona, pona narina, pona wenla, pona vinena. Yar naṗa pe p̄isu kilale re kiena malena sane naga pe pe sur re tai poli, naga pe torokin re nena naṗa imi sane kiau nalogena poli. ²⁷ Ana yar naṗa sinenan sape imi ve kiau nalogena, naga monar kila sanini. Monar kus kiena lak torovia, taveve inu lue ga,

sa naþa kilia tañan naga loge viowa vanon inu.
²⁸ Po pon asitom ruru ke ne sur nene sumo wa, þisi na avitaþilin visena, avisave sinemiun ataveve inu.

“Nanene naga sa ga naþa yaru tai, visae sitom ke sape kilia kila pupia yuñã tai, naga monar totano, visu ruru ke ne sumo wa, wolo ruru kiena kilavaru nakilaen yuñãena nene, naga monar visu kilale sane yoko naga torokin kilia kila make pupia yuñãena nene, pona pe torokin re poli.
²⁹ Visae peraga, yoko naga siaria, yuñãen ruru þeren yuñã nena, va laa sane, yoko ilan ga naþa limana ve plas ruru nena ga ana yoko yuñãena nene loru ñeke na. Ana pogos naþa yar taþena la aimi avisu yuñã naþa komþas ñeke na amio kana lepas ne lala, a pe ñaero pa re e poli wa, yoko avitalia kare yar nene narui, yoko avisave ³⁰ ‘Ke, yar nene, kiena sitomena po paþisi. Sinenan sape yuñãen ñana yuñã, ana pe maplar ruru re kiena yuñãena po, ana taþatete nena kila makea.’

³¹ “A yar naþa sinenan sape visaar naþa yoko imi kila yuñãena amio inu, naga monar kila sane þarin suþe tai, naþa yerka wa taþena suñalunia, þere kiena pupia þegas nen nakilaen mara tai aim akila mara vania. Li namara kiena ne þarin suþe nene pe la moki re poli sane yerka wa nene, ana þarin suþe nene monar visu ruru sumo, monar sitom ruruia, sane naga kilia taulu pupia þegas naþa pimi ke ne, pona taþatete tauluia. ³² Visae visu sane taþatete kilia kila, naga monar ligan visena vano va yerka wa, pogos naþa sike perina wa. Naga monar viun tania,

visave yoko ul ya naŕa yerkaŕa nene pisa, vena lalua asu sina e suŕare. Visae ve sanene, naga monar vatanon yerkaŕa, taŕan make nena naga vania. ³³ Ana kam naŕa sinemiun asape aim ataveve inu, monar avisu kilale sane kam ŕena monar akila ve sanene van inu. Yar naŕa pe taŕan re kiena malena poli, amio make kiena sur van inu, naga taŕatete kilia imi sane kiau nalogena.”

Pakaiwa na sive naŕa apeven e kinanena

Matiu 5:13; Mak 9:50

³⁴ Ana Yesu pisa sina ŕakaiwa taŕena pan la, pisape “Sive naga pe sur tai naŕa po paŕisi, ana visae pogos tai sive nene ve melkalka ruru re sina, taŕatete kila kiena yuŕaena naapo, a taŕatete si sur tai kilia kila imi melkalka ruru sina. ³⁵ A sive na sanene, taŕatete si kilia kila yuŕaena wo taŕena tai van ko moŕa uŕa, pona van ŕena koŕa lokove. Sur nene naga pe na kovenen ga va e kororak narui.

“Naga ke nene narui naga pe kiau totou na kiau nalogena naŕa kilalu kiena naŕareraena nakilaen kiau yuŕaena. Ana yar naŕa kiligana teke ea, popon naga loge kilale kiau visena nene.”

15

Yesu kila erau amio yar viowa lala

¹ Ana e pogos la ne sanene, apisu sane yar laŕas naŕa yar la pe asitom la re poli, sane yar na takis lala, amio yar taŕena la naŕa Varasi

la asape la apiowa ga, la mēna apim ke lavisin Yesu vena ayagogonia. ² Ana pogos naña Varasi lala amio navianen navisaluaena lala apisu naña Yesu sinenan pisape sun amio la nene, apisu sane piowa ga, ana asumā apisa ke apisape “Lelaga kemua nañane, yar nene naga sitom ga li namlamulen viowa la ne sanene, a silaga sinenan mēna sape va kinan lele taaga amio la. ?Pona naga pisu sane la ga kiela pēlaga po yo, a ita na kieta piowa ga?”

³ Ana la kiela sitomena sane kila Yesu sun pan la e pākaiwa la naña pisayu sanape naña naga pimi e yomarava nini vanon yar naña kilalu mrapa.

Pakaiwa na sipsip naña kovio

Matiu 18:12-14

⁴ Pakaiwa pēsa kiena ne Yesu e lepas nene naga sanini, naña pisa pan la, pisape “Yar tai, naga pe yar na vaganen sipsip, ana kiena sipsip lala tol ponotia taaga [100]. Kiena sipsip la moki sanene narui, ana visae pogos tai tai va kovio, yoko naga sitom korenan ga, pona naga sitom vañisi? Yoko naga monar ligān kiena sipsip tañena lala asumā ga sanene wa, ana naga vanon naña kovio, kale mā vano-o lualia. ⁵ A pogos naña lualia, kekaran vañisi, yoko kuslua sipsip nañani va e purkaunena, kus wasuñe imi. ⁶ Ana siraunia, pogos naña pāsūñe si pitomi tano umā, yoko vio namratava la puna pona kiena erau tañena lala vena aimi. Ana naga sunyu van la, visave ‘Aulai, sur tai nini naña ita tekilia teloge won vañisi. Kiau sipsip tai naña pa kovio na

kovio lue, ana yoko nepanonia, nepa nakale mña pano-o, nomñalia. !Pogos naña nomñalia, nekekara na nekekara!’ ”

⁷ Ana Yesu pisa meraravan pa Varasi lala, pisape “Ana yoko ve sa ke mñena nene ma e peni. Yar mok liu naña asike e yomarava nini naña sane amiu, la asitom ke asape la na apogaga narui, ana asape ma e peni amloge ke pon amiu la ne sanene yo? Ana pogos naña visae yar namlamulen viowa ve taaga ga, naga vilopu kiena malena, yoko pupia kekaren vařisi vania ma e peni, naña va ve keviu re laa sane na wa. Suri ne nanene kiļa narui inu na nekekaran sunen nemio yar la naña kam na pe akekaran la re poli.”

Pakaiwa na kururu varu naña kovio

⁸ Ana Yesu pisa si řakaiwa tai e lepas nene, pisape “Sira tai, naga kiena kururu varu lualima, naña mlawan ruru teke e mñana loyuña. Ana visae pogos tai, naga wasuře imi mñal tai naña mloru rui, teke ko yo, yoko naga kila ve sanape narui? Yoko war kapi vivaga, war plan make kiena suri lala, yevan ruru mñana loyuña vano vano lualia. ⁹ Ana pogos na lualia, yoko vio namratava la puna, pona kiena erau tařena lala, vena aimi. Ana yoko naga sunyu van la, visave ‘Aulai, sur tai nini naña tekilia teloge won vařisi. Kiau pupia kilavaru tai nekilalulia pa kovio nenaga, ana siraunia, nakale mña pano-o, nomñalia. Pogos naña nomñalia, nekekaran pano-o řisa!’ ”

¹⁰ Ana Yesu pisa meraravan pa Varasi lala, pisape “Ana yoko ve sa mēna nene ma e peni. Visae yar na mlamulen viowa ga tai, naga vilon kiena malena, yoko navisi kiena ne Ntewa lala avisu naŕa pupia kekarena paŕisi ma e peni.”

Pakaiwa na yaru mēe naŕa pa kovio

¹¹ Ana ŕakaiwa maro kiena ne Yesu e lepas nene sanini, naŕa pisape “Yaru tai, narina na yermēne lua, naŕa lalua amiyumāe ke amio naga e kiela porotano. ¹² Ana pogos tai, prasmaro na lalua nene sunālu, pisawal pa arimala, pisape ‘Ata, in na sineun nesape nowar kiau kilavaru komŕasa naŕa na lalumōna nagane ga ne.’

“Ana sur nene pe mesmesun re nena naŕa naga viun sanene poli, komin arimana mali sike ga wa, ana arimana pe pis re poli, mliŕere make kiena suria, tamān komŕas pa prasmaro nene, a komŕas pa mēaru. ¹³ A yokorena yar mēe naŕani sumā ŕiliwilin plan make sur la naŕa arimana ŕar pania, ana siraunia pe piavi re poli, aña ga naga kon make kiena sur lala, ŕar kiena kilavaru pion pano. Ana naga pa sike e purvanua taŕena tai koperin paŕisi, ana e yo naŕani, naga pa make nenaga e ŕelaga viowa lala, kan kilavaru naŕane pano-o, kila kare make punu nenaga.

¹⁴ “Ana naga kilia ruru sane limana plas ruru ga na wa, a e legiena nene, pupia viso pimi tol purvanua naŕa naga sike ea, mligan yar mēe naŕani sike e yo tai naŕa mārera paŕisi. ¹⁵ Ana pa kale yumāena tai naŕa pona naga kilia yumāen vena tamalia kiena malena, ana pa miyumāe kiena ne yerkawa tai e yo nene,

pagan kiena nompui lala. Yar m̃ee naṣani, naga pe mesmesun re kila yuṃaena nene poli, komin naga palia nompui sane ita le Yu la, ana yuṃaena taaga ga nene naṣa naga kilia m̃alia.

¹⁶ “Ana miyuṃae m̃a sanene pano-o, ana pe amla re kinanena pan poli, a pe m̃al re mrapa na lualen kinanen poli, kila naga visokar luen ga. Naga visokar m̃a sanene pano-o sinenan sape suan limana vito e karo na kinakinas nen kinanena ka nompui la naṣa komṣas pililua rui sike ea, amio purkavila na kona la naṣa kiena yerkawa ponpolo suṃa ga vena kiena nompui la akania. ¹⁷ Ana pogos naṣa naga sinenan ke sape kila sanene, naga ga pisu kilale si naga narui, pisu kilale naṣa kiena ṣarm̃arera ga kila kare manene si naga. Ana sitoṃal si arimana amio m̃ana uṃa, pisape ‘Lelaga kemua naṣane, in na nepe wowe paṣisi. Kiau ṣarm̃arera ga nane kila nesike viso karm̃arin ke e yo nini. Ositomyu la naṣa sane ape yar na yuṃaena kiena ne ata. Naga ṣar ke kinanena moki pan la e legiena punu ga, naṣa yoko akan make ṣele ga. ¹⁸ Sanene, popon nowasuṣeli in ga narui, neyuṃae re ve sa la nene. Yoko neva nevisu ata, nevisa sanini vania nevisave: O Ata, in na nekila pupia mlamulen piowa pa Ntewa, a pan ko m̃ena ga. ¹⁹ Nanagane, pe popon re si naṣa ovisu inu sane nepe narum̃a tai poli, ana nesape neviun tan ko vena sinem̃a ye inu, otam̃an inu neyuṃae re ga sane lala yar tai naṣa miyuṃae kiom̃a ke ne.’

²⁰ “Ana naga kila ruru kiena sitomena sanene, ana suṃalu, pimi lelei m̃a pimi ṣasuṣe si pu

arimana.

“Naga pe kilia re poli, ana arimana sitomañal luen ga naga silaga, sumña kirakira ke mrapa sape pona naga imi. Ana pogos naña sike perinan umña wa, ana arimana pisu kilalea, sinen miye pañisi, ana kiriri pa pitawea. Ana pogos naña pimi puna narina nañani, kutararia e limana luwoka yepen mavin liganen sina. ²¹ Ana yar mēe nene pisa pa arimana narui, pisape ‘O Ata, in na nekila pupia mlamulena piowa pañisi pa Ntewa, a pan ko mēna ga. Nanagane, pe mesmesun re si ovisu inu sane narumña tai poli.’

²² “Ana arimana pialuñaria, pio kiena yaru na yumñaena lala, pisape ‘E, ava vilaga, ava awar kulgota tai naña po, amio kana kulus nen lana, a kana rig nena, sur la ne sanene, awar imi ayen ea. ²³ A narin puluk naña apagan mlapa po ne, ava awemñaria, tekila kinanena tai takania vena tekekara temio prasmaro nini. ²⁴ Komin naruu nini naga mare rui, ana nagane mali sina, naga kovio, nanagane toñal sina.’ Ana pe yam piavi re poli, la asumña akila ke pañagena na yar mēe nene narui.

²⁵ “Ana e pogos nene, narina na mēaru naga mialoro pa miyumñae ke kana lokove rui, ana siraunia pitomi si umña. Ana pogos naña pitomi ke lavisin umña, mloge yauena a mloge mēna mñaagena na wolena kapur pa mēke na. ²⁶ Ana naga pisu yar na yumñaena la tai, piun tania, pisape ‘?Ei, ya ne akila ke garo umña sanene?’ ²⁷ Ana yaru naña pisa pania pisape ‘!E, womla nañani, naga pañupe si rui, mal ga! Ana arimomña sinenan sape kila kana kinanena tai. Amēmar

narin puluk na ða rui!’ ²⁸ Ana pogos naða mearu mloge, sinena mimi paðisi, pe pa re loyuma amio la poli.

“Ana arimana pimi pis amio, vena were va loyuma, ana naga yepen mavin ga vaena. ²⁹ Pisa ga pa arimana pisape ‘?Ata, kas via rui naða nesuma nemiyuma ke nemio ko e nini? In na nemlogear ruru ko e suri punu ga, ana pe okila re sur tai sanene pan inu poli. In na pe nomal re naða omemar narin nane tai pan inu pogos tai poli, vena nekila kinanena tai nemio kiau erau lala. ³⁰ Ana pogos naða omal naruma tapena nene pasupe sina, ana osumalu omemar kieta narin puluk naða tesuma tepagan ruruia. ?Ana yar nene kila ya ne po pan ko? Naga þar plan pupia kioma kilavaru komþasia, pa kan kilavaru nene na nameneen ga sira, pano-o kila makea. ?Pona þelaga ne nanene na ko sinomania ana okila kana kinanena nena?’

³¹ “Ana arimana sinena miye mena kiena mearu naðani, ana pisa pania pisape ‘Ei, naruu, in na pe nesitom re sanene poli. Ko okila inu nekekara manene laa rui, naða osuma omio inu silaga, a kiau sur la punu naða sike ne, in na netaman punu pan ko rui. ³² Lelaga naða kiau prasmaro nene kilalu kiena mrapa na malena, ana pogos naða pilopuia pasupe si pimi pun inu, sineu miyea, a in na nepisu sane popon kemua tekekarania, a tekila kinanena tai temio. Womla nene naga mare rui, ana naga mali sina, naga kovio, ana tomal sina!’ ”

Ana Yesu pisa pan le Varasi lala, pisape “Pogaga, þakaiwa nini þisi e nene narui. A sa

naña pisa ne, popon yar naña kilalu mrapa, naga monar vilopu sina, sa naña prasmaro nene. Ana monar avisuar ruru amiũ mēna ga ve akila re ve sa mēaru nene, naña kiena sitomena mārera pañisi, naga pieluen wenla naña pilopu kiena malena.”

16

Pakaiwa na ãelaga na yuũaen amio kilavaru

¹ Siraunia, Yesu pis pa kiena nalogena lala, pisa ãakaiwa tai pan la, ana pisayu yar na yuũaena tai. Yaru nene, naga pisu sane yoko kiena yerkawa kovenlua, ana suũaalu miyuũaen sur tai naña yoko siraunia kiena malena suũa woga ga. Pakaiwa nena sanini, sane: “Yerkawa tai, naga mligan lua kiena yar tai ve na visuaren kiena kilavaru. Ana pogos tai, visena pimi tolia sape kiena yar nene suũa kan ke ga kiena kilavaru, a kila kare ke kiena sur lala. ² Ana naga pio yar nene pimi puna, pis pania, pisape ‘Ei, yar la apisawal ko pan inu rui. In na nepisu sane popon nekoenlua ko si vetan yuũaena nene, yoko oñis nenaga. Ana sumon naña yoko ovano, sineun nesape oligan ruru sur lala wa vena nekilia nevisu lapui la naña yar la akila pan inu.’

³ “Ana yar na yuũaena nañani mloge piowa, pisape ‘Lelaga o, piowa narui, yerkawa nene lalua yuũaena wo nene vetan inu, nemninue sane yoko aũa nekinana ve sanape narui. In na netotano e yuũaena nini nakonua rui, ana in na pe puriuu pe māreran re si yuũaenen lokove poli, a pe sineun re mēna neva nesuũa

neviuviun kinanena vetan yar la poli. ⁴ Pogaga, kiau mrapa ve sa nini. Yoko nete plan si lapui kiena ne yaru lala vito laa tano, ana yoko la akekaran inu vano vano-o yoko la monar avisuar inu e pogos naña yerkawa kovenlua inu vetan yumãena nene.'

⁵ "Ana naga pa pio la naña kiela lapui sike e yerkawa, la peve taaga apim puna. Ana tai pimi puna narui, piun tania, pisape '¿Ana ko okila lapui e sur ya, a tol kilavaru via?' ⁶ Pisatamãea, pisape 'Pias nen wel na kanena tol ponotia taaga [100].' Ana yar naña pisa pania pisape 'Pogaga, yoko italua tetelua si vito laa tano. Nane kioãa lapui ne nanini, ototano, oyumu plan ke ne vilaga wa, osiri lualima yam lima ga [50].'

⁷ "Ana naga pano, yar tañena pimi, piun tania, pisape '¿A ko, kioãa lapui na ya?' Ana naga pisatamãea, pisape 'Karo na wit manu taaga [1000].' Ana naga pisa pania, pisape 'Pogaga, yoko italua tetelua si vito laa tano. Nane kioãa lapui ne nanini, ototano, oyumu plan ke ne vilaga wa, osiri ga ponotia ve orelu [800].' Ana naga kila ña sanene pano-o kila makea.

⁸ "Ana siraunia, yerkawa nañani pisu kilale sur nene, ana naga pisa ke pa kiena yar nañane naña naga kan kiena kilavaru sumo, pisape 'Lelaga ne, opinaun ruru inu nenaga, ana nepisu sane kioãa manmaruaena po, ko ãarumãa po pañisi nañane.' "

Ana Yesu pisape "Kam na apisu ke ne, yaru na yomarava nini lala, pogos naña amiyumãe amio kilavaru, ana akila masisuania ãisa, akilia ãelaga

na kilaen erau wo amio yaru lala, vena yaru la nene akila wo van la sirau. Ana nepisu naña naruu na yomerarava lala, yam mokliu naña pe amanmarua ruru re poli naña ayuñae amio kilavaru naña Ntewa mla pan la.”

⁹ Nepisa ruru pan amiu, nesape “Kilavaru naga pe na yomarava ga nini, ana visae kilia iila ko vena ove erau ruru omio Ntewa, popon oyuñae ea. Visae oyuñae ruru wo amio kilavaru kome mrapa naapo, siraunia yoko Ntewa kekaran vena were ko ova e naña pe kilavaru re e poli, nane ma e momña uña ma metava.

¹⁰ “Yar naña þar yepemñen narin yuñæna tai, tekilia towasinea sane yoko naga war mñena yepemñen pupia yuñæna woga. Ana yar naña miyuñæen narin suri tai pe mesmas re poli, yoko naga yuñæe viowa laa na wa e pupia suria.

¹¹ Visae kam na ve awar re yepemñen yuñæna na kilavaru e yomarava nini, yoko ane ligan sina sur nowo lala kiena ne Ntewa e limamiu vena ave kiamiu? ¹² A visae kam na taþatete ayuñæe ruru amio sur la naña Ntewa tañan pan amiu naña ve plas ga e yomarava nini, a ne yoko tañan si nalaena nowo naña asike ma metava e peni ave kiamiu lue?”

Yar taþatete yuñæen yuñæna kiena ne suþe ve lua veraga

¹³ A Yesu pisa mñena ga, pisape “Naga sina nini, visae yar na yuñæna tai, naga taþatete yuñæen pran yuñæna kiena ne suþe ve lua veraga. Visae sanene, yoko naga kekaran tai, ana

yepen mavin tai, pona logear tai, ana ligan tai. Tařatete akila nařa ave yar na yumnaena kiena ne Ntewa, a ave yar na kilavaru mna veraga.”

Varasi lala la pe akekaran re visen kiena ne Yesu nene poli

¹⁴ Ana e poglis nene, Varasi mna lala asike ga wa, asuma amiyagogon ke visena la nene. Ana lala, la ape yar la nařa asitom manene kilavaru silaga, ana apitalia kare ga mrapa wo na yumnaen amio kilavaru nařa Yesu pisayu ke pa kiena nalogena lala. ¹⁵ Ana Yesu pis pan la, pisape “Kam na sinemiun asape akila sa nařa yar la avisu amiu sane yar memes lala, ana Ntewa naga pisu ke ya nařa sike e losinemi. Sur mok liu nařa yar la amieluaria, asape po, ana e visuena kiena ne Ntewa, pisu sane sur viowa ga lala.”

*Nasuřenena kiena ne Ntewa pimi narui
Matiu 11:12-13, 5:18; Mak 10:11-12*

¹⁶ Visena tařena nařa Yesu pisa sanini, pisape “Nanua sumo, Tus Marua moňa ga, nařa tus lala kiena ne Mosis amio tus la nařa kiena ne navisaluaena lala asike ea, pimi ma pano-o tol pogos kiena ne Yoane Nakeena. Yoane miyuma e pano-o řisi, a nanagane Lologena Wo na suřenena kiena ne Ntewa pimi, ana asuma amlologon kare ga, a yar la nařa sinelan asape ava loyuma ea asuma ařar ke yon pařisi vena atolia. ¹⁷ Ana nanene pe kila re sane Navisaluaena kiena ne Ntewa nařa sike e Tus Marua

naga piowa poli. Pona ma e peni amio yomarava nini ava akovio yo, ana tařatete narin mras nen visena na Navisaluaena nařani kilia kovio pogos tai.”

Pe pon re teligan lua wota la poli

Matiu 5:31-32, 19:9; Mak 10:11-12

¹⁸ Visena tařena si tai nařa Yesu pisa, sanini, pisape “Visae yar tai ligan lua wona, ana va were si sira tařena, Ntewa pisu yar nene kila ke kolau amio sira tařena ne. Maran taaga mēna ga visae yar tai talopa amio sira tai nařa wona na sumo ligan lua rui, yar mēna nene kila ke kolau.”

Pakaiwa na yar na sur moki amio Lasaros

¹⁹ Yesu pisa mēna řakaiwa nene, nařa pisa sanini, pisape “Yar tai, naga limana pulen sur wo la moki pařisi, naga sumā miyowau ruru lue ga silaga, a legiena punu ga amiyuñāen kana pupia kinanena wo lala. ²⁰ Yar tařena mēna tai toñā ga, nařa silaga ařere naga pimi amligan teke vanua e kove na pupia yuñā mēna yar na suri moki nařani. Yar nene, naga pe yar tai nařa pe kiena suri re poli, naga pe yaru na loginen ga kinanena, tas nen wetelu pulen ga magka, kiena kia Lasaros. ²¹ Amligan naga teke e yo nene pona visae yoko kilia tol re kororos nen kinanen lařas nařa yerkawa nene kanligan yo, ana peraga. Naga mlogin korenan ke ga sanene, ana lokul la apim asuñā amunvan ke kiena magka lala.

²² “Pano-o yar nařani mare, ana navisi lala apim akuslua pa amligan mēke e yepas nen

Epraam, ma e peni. A pe piavi re poli, yerkawa mēna mare, asinia. ²³ Ana akoven naga pa e kapi, naña mloge piowa na mloge piowa pañisi, ana siraunia, kira pa metava, kira pa perina pañisi, pisu Epraam sike na, a pisu naña Lasaros sike amio, lalua asumña akinana ke na. ²⁴ Ana pio laa, pisape ‘Oe, Ata Epraam, awis sinemña ye inu, oligan Lasaros vitom suan luas nen mrasilmana vito e narin wii tai, vena ligan te purmeneu. Nanagane kapi kekan inu nemloge piowa pano-o ãisa.’

²⁵ “Ana Epraam pisatamēa, pisape ‘Naruu, nagane ositomāl si malena wo naña ose sumo. E pogos nene, ko otol make kioñña suri la naña ko sinoñña po pan ko pañisi, ana Lasaros na ositom korenan ga vanon piowa ga. E kiena malena nanua, suri punu ga piowa ga, ana nanagane, naga mloge si po e nini narui, a ko omloge ke piowa manene laa pañisi e namña. ²⁶ Ana suri ga tai, tañatete imñasu iila ko, komin Ntewa mligan pupia pulus tai mēke likan ita lua, vena kila sane yar tañatete molue e yo nini vena imñasu puñña, a tañatete molue e na osike e ne vena imi e yo nini.’

²⁷ “Ana yar nene piun ke si na ga, pisape ‘Ata, visae sanene, neviun māraran tan ko vena ovite-talia Lasaros wasuñe si vito tano garo uñña mñana kau ata, ²⁸ komin naña wolai lima asike ga wa. Popon Lasaros vito visawal van la, visae peraga, sa ãisi la mēna aimlae e yo naloge viowaena nini.’ ²⁹ Ana Epraam pisatamēa, pisape ‘?Ana komin ya ne monar Lasaros vitove? La añar ke

Tus Wa rui, naña nasiriena wa kiena Mosis amio navisawalena la sike e rui. Popon la auloia, yoko alual suri punu sike ea.' ³⁰ Ana naga m̃areran m̃aga, pisape '¿Ata Epraam, pona tañatete akila yo? Ana visae yar tai wasuñe si imi e marena, visawal make sur la nene van la, yoko monar avilon la ga narui.' ³¹ Ana Epraam pisatañea, pisape 'Visae la nene yepel mavin logeen ya naña Tus Wa pisa, pe sur re si tai naña kilia kila na alelaga poli. Pona yar tai wasuñe si imi e marena, visa sur punu van la, pona ya sina, ana yoko la yepel mavin ga lelagaena.' "

17

*Pelaga na kilaen nakilaliēna van yar tañena
Matiu 18:6-7,21-22; Mak 9:42*

¹ Ana Yesu pisa pan kiena nalogena lala, pisape "Yoko nakilaliēna lala akilia aim lue silaga ne, ana yar naña kila sur lañasa naña were nakilaliēna imi lavisi, yoko viowa van vañisi.
² Visae añatear kilavaru tai m̃ene kolmekina a akoan talilu vito e lowe memaena, nanene na nakoena tai naña melala ga ne. Ana yar naña kila naruu tai ligan inu, ve viawa re si m̃arera e inu, loru e mlamulena viowa, yoko yar nene naga war nakoena tai naña m̃arera manene laa sane taulu naga nene. ³ Sanene, kam na monar avisu ruru kiamiu malena la silaga, vena ve okila re nakilaliēna viowa lala aim añalivin kionña erau."

Pelaga naña oviewo womla

A Yesu pisape “Visae ovisu naña womla mloru ke pito tano e mlamulen piowa tai, monar ovis omio vena okila ruruia, a visae naga vilonia, monar oviewoia. ⁴ Visae naga kila viowa van ko yam ve olua e legiena ve taaga, a pogos punu ga, naga kila viowa, a siraunia naga pisa ga pan ko na wa pisape ‘Ake wolai, nekila kare ko pañisi. Awis, oviewo inu,’ yoko okilakania? Pisi na monar oviewo naga e pogos make la olua nene.”

Nam̄areraena na viawaena

⁵ Ana nalologena la apiun tan Yesu, apisape “Suñe, sinemimin mesape okila kiamimi naviawaena imi m̄arera la sane wa.”

⁶ Ana naga pisatamea pisape “Visae aviawa ve tokak ga e inu, sane kurus nen purpa, ana visae kiamiu naviawaena nene ve lelaga ruru naapo, ana p̄isi na akilia avisa va purlu na m̄eke gare avisave ‘Omolue e yo nene, omio p̄eligas nem̄a lala, ova okapur ke gare likan lowe memaena ne, ana yoko naga logear amiu woga.’ ”

Yar na kilaen yum̄aen kien yerkaawa naga monar kekaran ga kila

⁷ A Yesu pisape “Visae kam yar tai ve yerkaawa, a kiena yar tai sum̄a kila yum̄aena la pania. Pona pa miyum̄ae lokove yo, pona pisuar kiena sur mali lala, pona ya sina, ana visae yepekilavi, pogos naña p̄asuñe e yum̄aena pitomi, yoko yerkaawa visa ya ne vania? Tañatete visa vania visave ‘Ko, oimi oto omio inu, italua tekinana,’ komin naga pe kiena yar na yum̄aena ga. ⁸ Yoko yerkaawa monar visa ga vania, visave ‘Pogaga,

yoko ova oviran kapi sumo wa. Visae kinanena manoa, ova oyowau ruru ke ne wa, p̃isi na owar kau imi nakania, nomunia, p̃isi, okilia ola koña.’⁹ A pogos naña yar nayuññaena kila sur punu ga naña yerkawa pisa pania, yoko yerkawa taṭatete visa pupia potena vania, vanon naga kiena yuññaena ga.¹⁰ Ana kam m̃ena ga monar ave sanene. Visae akila ruru make yuññaena naña Ntewa pisa pan amiu, vano-o p̃isi, yoko avisa ga sanene, avisave ‘Ee, nanene na pe sur re tai nene poli. Tekila ga ya naña torokin tekila sa ke ga yar na yuññaena kiena ne Ntewa lala.’ ”

Yesu kila ruru yar na leperosi la lualima, ana taaga ga pisa potena

¹¹ Ana e pogos nene, Yesu la asuñña amial ke apa ma Yerusalem na wa, ana kiela mrapa pa likan lepas lua nene, Samaria amio Kalele.¹² Ana amial m̃a pano-o, lavis ga aṃalivi e pulkumali tai, apitawe p̃egas nen yar tai na leperosi lala, la lualima, naña la asuñña e yepas nen mrapa.¹³ Ana pogos naña apisu Yesu, apion manene pania, asape “Yesu, Suṇe, awis sinem̃a ye imimi.”

¹⁴ Ana pogos naña Yesu mloge, pisa pan la, sape “Ava akom p̃esan pun yaru wa lala vena la avisu ruru nena tasnemi lala vena avisave kam na yepemiu mian rui.”

Ana la apano, a pogos naña la asuñña amial apano, amilan ga naña yepela la pimi mian ke narui.¹⁵ A lala tai, pogos naña pisu naga po sanene narui, naga pilonia p̃asuṇe si pimi, miyeluar Ntewa paṇisi,¹⁶ pimi mloru e lana Yesu, pisa potena pania. Yar nene, naga pe pe yere Yu

re naapo poli, ana naga pe Yu la komþas tai nae Samaria. Ana taþena lala, la ape yere Yu nena naapo, ana la pe aþasuþe re si apim poli.

¹⁷ Ana Yesu pisa sanini, sape “La naþa yepela mian rui, la lualima, ana awa la ovari? ¹⁸ Naþa þasuþe pimi, naga yar nae ga lele taþena, ana komin ya ne naga taaga þasuþe pimi mieluar Ntewa, laþas pe apim re poli?”

¹⁹ Ana Yesu pisa pania, pisape “Erau, osuñalu oyali ova uña. Kioña naviawaena tamalia ko rui.”

Nasuþenena kiena ne Ntewa imi ve sanape?

Matiu 24:23-28,37-41

²⁰ Ana siraunia, Varasi la apim apiun tan Yesu, asape “?Nasuþenena kiena ne Ntewa naþa opisayu ke silaga, yoko mevisu pogwai?”

Ana Yesu pisatamea pisape “Nasuþenena kiena ne Ntewa pe pimi re sane sur tai naþa yar kilia visu e kilamarana poli. ²¹ Naga pe sur re tai naþa yoko avisave ‘Ke, na naña narui, nane pimi ke naña,’ pona avisave ‘Nane, sike gare rui.’ Kam na pe apisu kilale re poli, ana nasuþenena kiena ne Ntewa sike pa likan amiu rui.”

²² Ana Yesu pisa pan kiena nalogeno lala, sunyu pan la sape yoko ve sanape e legiena maro la ne pimi ke ne. Naga pisape “Siraunia, yoko kam na sinemiun manene vaþisi navisuen pog naþa yoko inu Narina ne Yeririna neim noñalivin yomarava, ana nanene na pe pon re kam na avisu poli. ²³ Yoko yar la avisasa sanini avisave ‘!Naga nane gare!’ pona ‘!Naga nane garo ne!’ ana kam na ve ava re amio la, komin

pe inu re nene po laa wa. ²⁴ Ana pogos naña inu Narina ne Yeririna nowasuñea ve lelaga e kana legiena nena, yoko yar make ga avisu kilalea, yoko neimi sane yekarpla tai naña kila sinapane vivaga e lepas tai va tol lepas komþasa. ²⁵ Ana sur nene na pe kana pogos re poli wa, komin sumon nene, yoko inu Narina ne Yeririna, yar nanagane lala akila viowa van inu e sur viowa la ve moki, yoko monar akovenlua inu.

²⁶ “Vano-o tol pogos naña inu Narina ne Yeririna nowasuñea, yoko yar la ve akila ruru la re na wa, maran ve taaga ga sa ke pogos kiena ne yermarua Noa nanua sumo. ²⁷ E pogos nene, yar la asuñã akinana, amun suri lala, asuñã akila ke talopaena sanene, pimi tol pogos naña Noa pa loyuñã e kiena pupia waa naña naga miyuñãenia. Ana pupia womie pitomi kus plan make kiela malena la punu ga. ²⁸ A e pogos kiena ne Lot sa ñã nenaga nene. Yar la asuñã akinana, amun suri lala, asuñã apa ke e lele na wilwilena po amiyuñãen ke kilavaru, asuñã amiyuñãen ke lokove, amiyuñãen ke yuñã, la akila ke ga sanene pa ke na, pe asitoñal re sur tai poli. ²⁹ Ana e nena e legiena naña Lot molue petan kiela yo, kapi amio pan na kapiapo mloloru pitomi ma e sinapane, kekan la akokovio make nenaga. ³⁰ Ana nevisa van amiu, e pogos naña yoko inu Narina Yeririna neimi, yar la taþatete asitoñal sur tai, asitoñal la ga, ana yoko ailan pupia sur kerkeviu la ne sanene imi ñalivin la.

³¹ “E pogos nene, visae yar tai suñã yuñãe ke

meta e m̃ana wos nen yuṃa, ana visu sur nene imi, ana vito tano pe pon re kilali sape va war suri laṃas e m̃ana loyumuṃa poli, naga monar va ga narui. Yaru naṃa miyuṃae ke lokove, naga m̃ena taṃatete si vito uṃa, yoko monar va ga narui. ³² Kam na ve sinemiu ṃesan re wona Lot, naṃa kiraṃatau, ana pimi pe kilavaru. ³³ Yar naṃa kilali sape visuar ruru ga kiena malena, yoko kovio, ana yar naṃa taṃan kiena malena kovio, yoko naga ga tamalia sina naga. ³⁴ Nevisa van amiu nevisave e pogos nene, pona kolemalo naṃa yar ṃeke amio wona yo e m̃ala tog, ana yoko aim awerelua ve taaga ga, aligan tai ṃeke na. ³⁵ Ana pona yoko sira la ve lua asike avili ke kala kinanena lele taaga yo, ana ve taaga vano tai sike na. ³⁶ Ana pona yar lalua ayuṃaevain ke lokove tai yo, yoko tai ure matania, ve taaga suṃal wowe ga sike na.”

³⁷ Ana nalogena la apiun tania, asape “?Ana Suṃe, suri la nene yoko ṃalivi e nape?”

Ana naga pisataṃe la, sape “E pogos nene, yoko ve sa naṃa visae sur mare tai ṃeke koyo tai. E yo nene narui yoko manu la naṃa akakan ke sur mare, yoko aiminia, monar la ve moki ase yo nene. E nape naṃa mlamulena viowa sike ea, yo ke ga nanene narui yoko naliṃereena se ea.”

18

Pakaiwa na sira naṃa tagi ṃa pa kiena suṃe na pulkumali pano-o, suṃe miyagonia

¹ Ana Yesu pisa sina ðakaiwa taþena tai pan la, vena iilaar la ve asitom þele re si kiela leniena lala, vena asumal m̄arera asulue ga ea, alen m̄a vano-o atol kana navisatameena. ² Kiena ðakaiwa nena pa sanini, sape: "Pulkumali tai, naþa kana suþe nena naga pe yar m̄arera tai, naga pe yar tai naþa pe patanon re Ntewa poli, pe maraun re nenaga, a naga sitom þele m̄ena yar la. ³ Ana letano m̄ena tai sike e yo nene, naþa yar tai sum̄a kila kare ke kiena sur la silaga. Ana letano naþani pa sum̄a tagi ke pan kiena suþe, naga sum̄a pisawal ke yar naþani, sape 'Awis, monar okila sur tai va yar nene, naga kila kare in paþisi wa.' ⁴ Ana suþe naþani pe sinen miye re sira nene poli, a pe yowenan visen va yar naþani, ana kila luen ga sanene pa ke na, sira m̄ena naþani pa tagi luen ga pan silaga.

"Ana siraunia naga pisape 'In na nepe yar tai naþa pe nesitom re nesape nekila ya naþa Ntewa pona yar taþena pisa pan inu sape popon nekila. ⁵ Ana sira pimi tagin ke pan inu, ana in na pe sineun re nesape nekila ya naþa pisa ke poli. Ana naga pimi piun luen ga sanene, naga kila kare inu paþisi wa, ana pona nekila ga ya naþa naga piun ke yo. Visae peraga, yoko neloge kiena tagena vano-o sineu marena.' "

⁶ Ana Suþe Yesu pis pa la naþa amiyagogon ke ðakaiwa nene, pisape "?Kam na ayagogon ruru visena naþa suþe yowena nene pisa ne? Komin sira nene tagi yam moki pania, ana yoko monar sitomli sur na sira nene piun ke ne. ⁷ ? Ana sanapen Ntewa nae ma e peni? ?Pogos

naña mloge kiena yeririna la naña mligan plan la, atagi ke pania lemalo a legiena, naga kilia su kañar sanene ve kila re sur tai van la? ⁸ Peraga, ana nevisa van amiu sanini, visae loge naña alen mārera vania silaga, yoko naga suñalu vilaga e pogos make ga kilia iila amiu. ?Ana nesape neviun mēna van amiu, sane visae pogos naña inu Narina ne Yeririna nowasupe si neim e yomarava nini, yoko nelual naña yar la asuñalu mārera asike e inu sanene, pona peraga?”

Pakaiwa kiena yar naña p̄arwar e kiena p̄elaga naña mesmesu

⁹ Ana pogos naña Yesu sike amio yeririna lala, naga pisu kilale naña laḡasa aḡarwar la paḡisi, asitom ke asape la kiela malena mesmes ruru po narui, a la apisu yar taḡena la apiowa ga, apisu sane la apiowa manene laa pe sa re la poli. Ana pisayu yar la sanini, pisa p̄akaiwa tai, sape ¹⁰ “Yar lalua apa ma e Yum̄a Wa m̄ana Ntewa e pogos na leniena. Lala yar tai, naga pe yere Varasi, a taḡena, naga kila yum̄aena tai naña yaru la pe sinelan re naga vanon poli, naga pe yar na takis. ¹¹ Ana pogos naña yere Varasi naga suñalu mlen, pisa sanini, sape ‘Ake Ntewa nepisa pupia potena pan ko paḡisi, naña kiau malena naga po laa sane taulu kiena ne yar taḡena lala. Nemieluar ko, naña in na pe sa re yar navinauen la poli, pona yar na kilakeuiaen yar lala, a yar na kilaen kolau lala, pona yar na takis lala sane yar na suñalu sike ne. ¹² Peraga, in na nesum̄a nekila ke po silaga, komin naña in na nomonsilun kilaen leniena van ko e legiena

lua e wik taaga, a e sur make ga naña nemla e lumãu, visae netol ve lualima, monar nela ve taaga van ko silaga. Sur ne la na nene narui naña in na nesuũa nekila, ana kila inu nopo pañisi e maramã.’

¹³ “Ana yar na takis, naga suũa mloge ke piowa vanon kiena mlamulena viowa naña kila, ana mninu sane Ntewa pisu kiena malena pe po re nena poli. Ana naga yepen mavin va maneneen lavisi, suũalu ga suũa perina, a naga yepen mavin kiraen va metava ma e peni, a naga ãarin tau ga toũa ga, mlipalipa ke yerena, tagi, pisape ‘!Ake Ntewa, ove lemam van inu, sinemã ye inu, yar na kilaen mlamulena piowa!’

¹⁴ Ana kam na asitomyulia leniena kiena lalua nene, ana yoko Ntewa kekaran kiena ai? Lelaga, yar naña pisu kilale kiena mlamulena viowa, a mloge piowagania, Ntewa ãar plan kiena mlamulena viowa. Ana yar tañena nañani, naga ãasuñe si pa uũa naña kiena malena maran taaga ga sa ke naña pimi. Yar naña suũa pisirlua naga, yoko Ntewa ligan naga mñeke tano, ana yar naña mligan naga sike tano, yoko Ntewa visirlua naga.”

Yesu pisa ruru sisi kokan lala

Matiu 19:13-15; Mak 10:13-16

¹⁵ Ana e poglis nene, auia lañas añar narila sisi tomtom lala apim puna Yesu, sinelan asape kus la, visa ruru la. Ana pogos naña nalogena la apisuia, apisalupar la, asape avava sina. ¹⁶ Ana Yesu pio sira la nañani, sape aim mñaga, ana pisa

pan nalologena lala sanini, sape “Kam na ve avisaluþar re sisi la naña, atañan la aim pun inu, komin naþa sisi la naña, yeririna la naþa asa ke ga la nene, la ke ga nene narui naþa asuña apa loyumuña e nasuþenena kiena ne Ntewa. ¹⁷ In na nepisa ke lelaga na pan amiu ne, visae yar naþa sinenan nasuþenena kiena ne Ntewa, naga monar kila naga imi ve sa sisi la nini, visae peraga, naga taþatete va loyumuña.”

Yerkawa kiena ne le Yu lala tai sinenan sape tol malena

Matiu 19:16-30; Mak 10:17-31

¹⁸ Ana siraunia, suþe tai pimi piun tan Yesu, sape “Navianena wo, awis, popon ovisawal van inu sane in na monar nekila ya naþa visae nekila yoko nekilia netol malena naþa ve uro re.” ¹⁹ Ana Yesu pisatamea, sape “!Ei! Ko na okilia ya ne, osape in na nopo? Pe yaru tai po ruru re naapo poli, ana Ntewa ga naga taaga. ²⁰ Ana ko opiun osape sanape naþa yar tai sane ko naga kilia imi wo e marana Ntewa woga. Pona okilia ruru kiena Navisaluaena yo rui, naþa pisape ko ve okila re lau, ve owemañar re yaru, a ve ovinau re, ve ovisokan re, ovatanon arimoña amio anoña.”

²¹ Ana yar naþani pisatamea, pisape “Lelaga, in na nekilia kemua Navisaluaena la ne opisa ke ne, a nekilia nevisa van ko sanini, in na nopuar ruru la siar e pogos naþa nepe yar viu ke ga wa. Pimi tol nanagane, pe nekilalu re tai poli.”

²² Ana pogos naþa Yesu mloge pisa sanene, pisape “Pogaga, ana e lepas naþa puña, sur tai

sike ga wa. Monar ova owilwilin plan make kioṃa sur moki la nene, ana owar kana kilavaru, ova okiakian kare ga va yar la naṓa limala plasa. Visae okila sanene, yoko kioṃa sur wo la ve moki ma e peni. Ko, ova okila, ṓisi na oim otaveve inu.” ²³ Ana pogos naṓa yar nene mloge visena nene, sinen piowa paṓisi, kiena sitomena pimi urmi na urmi, komin naga pe yar na sur moki, limana pule paṓisi.

Yaru naṓa kiena sur moki, naga ṃarera li ṃaga vena vaen loyuma e nasuṓenena kiena ne Ntewa

²⁴ Ana Yesu pisu manene yerkawa nene pano-o ṓisa, siraunia pisape “Visae yar tai naṓa kiena sur moki, naga sinenan sape va loyuma e Nasuṓenena kiena ne Ntewa, sur nene naga ṃarera towe ṃa naṓa. ²⁵ Ee, nevisa van amiu, visae kamel tai va warpo yo kome pulus nen nitil, nanene na ṃarera paṓisi, ana visae yar tai naṓa kiena sur moki sinenan sape va loyuma e Nasuṓenena kiena ne Ntewa naga ṃarera laa na wa.”

²⁶ Ana la naṓa amloge visena nene amilan pano-o paṓisi, asape “!Aulai! Visae sanene, ane yoko tol malena?”

²⁷ Ana Yesu pisataṃea, pisape “Lelaga, yar taṓatete kila naga tol malena, ana ya naṓa yar taṓatete kila, Ntewa naga kilia kila woga.”

²⁸ Ana Pita piunia, pisape “?A yoko ve sanapen imimi? Memligan ṃamimi uma la rui, ana metaveve ko ke narui.”

²⁹ Ana Yesu pisa pa kiena nalogena lala, sape “Kam na ve asitom manene re e lepas nene. Yar

a naña visae ligan mña uña, pona wona, pona wenla, pona arimana amio anena, pona narina lala, a visae ligan sur la nene vanon yuñaena na Nasuþenena kiena ne Ntewa, ³⁰ yoko naga tol maran si kiena sur la nene va ve moki manene laa va laa sane na wa. Naga nene e pogos nanagane, a sirau mña ga e pogos na pimi ke ne, yoko naga tol malena naña ve uro re.”

*Yesu pisawal kiena marena yam telun nene
Matiu 20:17-19; Mak 10:32-34*

³¹ Ana poglis naña amiyaloro ke apano, Yesu pio kiena lualima taaga pa lua apim puna, pisa pan la pisape “Ayagogo ruruia. Nanagane tepa ke ma Yerusalem narui, a pogos naña tetolia, sur make la naña navisawalena lala asiriyu nanua sumo rui e lepas nen Narina ne Yeririna, yoko avisuia aimi amlmalivi ve sa nena naña apisa. ³² Yoko avisu naña aligan naga va e limana ne le Rom lala, naña yoko akirakirai viowa vania, akila karea e þelaga viowa lala, avilasiria, ³³ alilia, akila mña sanene vano-o awemaria. Ana yoko kana legiena ve telu, naga sumalu mal sina.”

³⁴ Ana pe sur korena ga naña Yesu pisawal meraravan make sur punu pan la sanene, ana la pe amloge kilia ruru re nenaga. Naga sa naña visena la nene na atapolou ga e la, ana kila sane taþatete atol kana kinasa.

*Yesu kila ruru kilamara þala tai
Matiu 20:29-34; Mak 10:46-52*

³⁵ Ana Yesu la amiyaloro apa mña, apim lavisin pulkumali naña Seriko, ana kilamara

ṗala tai teke tano e is nen mrapa, toṃña mlogin ke kana kinanena tan yeririna la naṗa apa akomkom ke e nene.

³⁶ Ana kilamara ṗala naṗani mloge naṗa Yesu la apim ke na amio ṗina la naṗa asuṃña amialoro ke amio, ana naga piunia pisape “La nene na li pe la nene, akope ke ne?”

³⁷ Ana apisataṃe sanini, asape “!Ke, nanene na Yesu nae Nasaret naṗane, nane pimi ke ne imi kom pun ita ne!”

³⁸ Ana yar naṗa pio manenea, a tagi pa Yesu pisape “!Yesu, ko lus kiena ne Tepet, sineun naṗa sinema ye inu!”

³⁹ Ana la naṗa asumon ke Yesu, amloge pio sanene, ana apisalupaṗaria, apisape “Ova ruru ko ga.”

Ana yar naṗa yepen ma ga, pio ke sina ga, pa laa meta sane wa, pisape “!Yesu, ko na lus kiena Tepet, nemie awis pan ko, sinema ye inu!”

⁴⁰ Ana Yesu mial pano, pimi suṃal su puna e yo nene, pisape atar yar nene imi lavisinia. Ana atar pimi, Yesu piun tania, pisape ⁴¹ “?Ana ko sinoṃan osape nekila ya ne van ko?”

Ana naga piunia pisape “Suṗe, awis, sineun nesape kilamarau imi wo, nekilia nevisu suria.”

⁴² Ana Yesu pisape “Pogaga, nanagane nela kioṃña nakiravaena van ko sa naṗa opiunia. Kioṃña naviawaena kila ko opim opo sina.”

⁴³ Ana e nena e poglis nene, yar naṗani, kilamarana pimi po, ana mial ke amio Yesu, suṃña miyeluar ke Ntewa. A yeririna ṃena la naṗa

apisu sur nene, apisu po pañisi, asuñña amieluar ke kia kiena ne Ntewa vanonia.

19

Yesu pitawe Sakias

¹ Ana Yesu la apim loyuma Seriko, amialin ke naña ava awar ro ga ea. ² Ana e nañani yar tai sike ea kiena kia Sakias. Naga pe yerkawa kiena ne yar na warpoloen takis e pupia lepas nene, ana vanon naña naga miyuma piowa, kila kare ke yaru lala e kiela kilavaru na takis nena, kila naga liman pule pañisi, naga pe yar na sur moki. ³ Ana Sakias mēna pimi e poglis nene, sinenan sape visu Yesu naga pe yar na sanape, ana yeririna la mokliu naña asike lavisin Yesu, asuwo ga yo, sa naña yo kuskus ga rui, ana naga pe pisu ruru re poli, komin naga pe yar plas ga tai. ⁴ Ana Sakias pisu sane piowa narui, kiriri sumon Yesu lala, pa tol puryove tai piyu pa e korowas tai, sumate ke naña visae Yesu la ayal aimi, ana naga kilia visu ruruia.

⁵ Ana pogos naña Yesu pimi tol puryove nañani, Sakias milan ga naña Yesu kira pa pisuia, pis pania, pisape “Sakias, otapulu vilaga. In na nemninuluñar e inu sane pane neva nesu re nemio ko sumo wa gar moña.” ⁶ Sakias mloge narui, sumalu pula nena pitomi tano, ana pēre Yesu pa mana, amio pupia kekarena pañisi.

⁷ Ana pogos naña yeririna la apisu sur nene, la moki naña pe akekarān re poli, apismumu, apisape “Yar naña Sakias naga pe yar sur naña miyuma piowa ga, naga kila kareli yar lala wa,

ana vanon ya ne Yesu sinenan sape amio ava asu m̃ana?”

⁸ Ana pogos naṓa asike loyuṃa rui, Sakias mloge sane naga monar vilopuia, a monar keṓu kiena malena, ana suṃalu pisawal e marana ne Suṓe, pisape “Suṓe, nanagane in na netam̃an kiau sur la komṓas va yar la naṓa limala korena, pe kiela sur re poli. A suri ya naṓa nepisa kotalia yar la ea, nepinaun la, yoko nowar maran si van la tol yam ve vari.”

⁹ Ana Yesu mloge pon manene visena naṓa Sakias pisa, ana pisa pania pisape “Nepisu sane ṓane na, natamaliaena kiena ne Ntewa pimi nena tol mratava nini. Yar nene naga kilalu mrapa na kiena malena, ana naga m̃ena pe lus kiena ne Epraam kemua lelaga, naga pe yere Yu kemua tai, ¹⁰ ana inu Narina ne Yeririna nepim e yomarava nini vena nakale la naṓa amiyepe petan mrapa sane yaru nene, vena netamalia la.”

Pakaiwa na yar telu naṓa apisuar kilavaru kiena ne kiela yerkawa

Matiu 25:14-30

¹¹ Ana yeririna la asuṃa amiyagogon ke visena kiena Yesu la nene, ana pis m̃a pan la pano-o, pisa ṓakaiwa tai pan la. Naga pisu sane popon vian la e ṓakaiwa nena, komin naga kilia ke sape sane yeririna lala asitom ke asape pogos naṓa ava atol yo Yerusalem, yoko naga kila nasuṓenena kiena ne Ntewa imi warpo ke yo van la veraga. A nanagane apim ke lavisin Yerusalem rui, a Yesu sape vianin la sane naga monar ligan

la sumo wa, yoko imi si pula. ¹² Naga pisa pan la sanini, sape “Yerkawa tai, naga pa perina e naña pupia þarin suþe sike ea, vena avisirlua naga imi ve þarin suþe na kiena leþasa, yoko naga kilia wasuþe sina visuar kiena yo. ¹³ Ana sumon naña pe pa re poli wa, naga pio kiena yar lala, la lualima, a la punu ga mla kilavaru peve taaga pan la, sape monar ayuñae amio kilavaru naþani vano-o tol pogos naña naga wasuþe sina. ¹⁴ Ana yeririna la nae leþas nene ape nasinekar kiena ne yerkawa nene, ana pogos naña naga pur matan la pa narui, la apisayuia asape la pe sinelan re si naga imi ve kiela þarin suþe poli. Ana amligan visena pa pa þarin suþe keviu na purvanua naþani, asape ‘Pe sinemimin re yar nene imi ve kiamimi þarin suþe poli. A pe sinemimin re nena naña oligan kia keviu nene e naga poli.’ ¹⁵ Ana þarin suþe keviu naþani kila ga, ana yerkawa nene pimi ve suþen ke sina ga kiena leþasa. Ana pimi pio viraviran kiena yar la naña naga þar þesan kilavaru nene pan la, sinenan sape visu sane amiyuñae ea, ana ataulu si kiena kilavaru via.

¹⁶ “Ana yar naña pimi suñal þesan se marana, pisape ‘Suþe kiomña kilavaru taaga naña omla pan inu, nemiyuñae ña amio pano-o netaulu si lualima to metavana.’

¹⁷ “Ana yerkawa nene pisu kiena yar na yuñae nene miyuñae po, ana pisa pania sape ‘Po na po paþisi, ko omiyuñae po manene laa wa. Ana komin naña osuñalu ñarera ose narin yuñae naga naña nemligan e lumomña, ana

nagane nela yuññaena keviu tai van ko, neligan ko ovisuar kiau pupia pulkumali ve lualima.'

18 "Ana siraunia, yar nalua pimi, pisape 'Suḡe, kilavaru taaga naḡa omla pan inu, nemiyuñae m̃a ea pano-o taulu si lima to metavana.'

19 "Ana yerkawa naḡani pisa pania, sape 'Po wa, ko m̃ena omiyuñae po paḡisi, yoko neligan ko ovisuar kiau pupia pulkumali ve lima.'

20 "Yoko kiena yar taḡena pimi, pisape 'Suḡe, kioñña kilavaru naḡa omla pan inu, nepiwo ruru e kinakina kulmrae tai, nemligan ruru toñña ga, nane nesape nela si wasuḡe imi van ko narui.

21 In na nesuñña nepisu ko ke sane ko yar tai naḡa okilia owar plan kioñña sur naḡa yar taḡena ḡarar sike na, a okilia okinana e lokove naḡa pe ko re omapila poli. Kioñña ḡelaga m̃arera towe laa sanene, kila nemaraun ko, ana pe nekila re surian kioñña kilavaru nene po, nepuarar ruru ga toñña ga.'

22 "Ana yerkawa naḡani sinen karia, pisape 'Yaru, opisa kare in laa ne wa, naḡa osape in na yar m̃arera tai ne sanene. Ana pogaga, kioñña visena nene naga ga kar ko ke sina ga. 23 ?Visae in na yar sur na sanene, komin ya ne opuar kiau kilavaru sanene? Po paḡisi naḡa visae oligan ga e pag, vena pogos naḡa nowasuḡea, nekilia nowar plan sina amio narina naḡa naga tauluia.'

24 "Ana yerkawa naḡani pisa pa yar taḡena la naḡa asuñal asike lavisinia, sape 'Awar plan kilavaru nene e limana, awar va yar naḡa taulu lualima.'

²⁵ “Ana apis pa yerkawa nañani, asape ‘!Ana suñe, naga ãar mokliu wa, kiena lualima rui!’

²⁶ “Ana yerkawa pisa pan la pisape ‘Lelaga, ana sanene narui. Naga naña kiena sur mok rui, yoko naga war si va laa sane na wa, ana naga naña pe kiena sur re poli, yoko naga kilalu kiena narin sur ve tokak ga naña naga mla ke rui. ²⁷ Ana e lepas na kiau nasinekar la nene, naña la yepela mavin naña in na neve suñen la, sineun nesape ava aurela aim e nini, awe momar la amarmare e marau.’ ”

Ana ãakaiwa kiena ne Yesu nane ãisi e nene.

Yesu pimi tol yo naña Yerusalem

Matiu 21:1-11; Mak 11:1-11; Yoane 12:12-19

²⁸ Ana Yesu pisa pa visena la nene, suñalu, sumon la, ãere la apa ma Yerusalem. ²⁹ Ana la apim lavisin narin pulkumali lua nene sumo, naña Petpas amio Petani, e lepas nen Kunus Na Purolip lala. Ana Yesu pisa pa kiena nalogena lua, pisape ³⁰ “Kam lua ayalor ava ke ne e narin pulkumali na gare sumo wa. Pogos naña ava loyuma, yoko alual togki tai, amatear teke ea. Togki nañani pe teras ga, pe yar tai to li re e masina poli wa, ana kamlua aluparlua, aure imi e nini. ³¹ Visae aviun tan amiu amlua, avisave ‘E, amluparlua ke pe na ya?,’ yoko avisatamea avisave ‘Suñe sinenan sur mal nini kila kiena yumaena tai.’ ”

³² Yesu pisa sanene pan lalua, ana mligan la apano, ana apano apisu sanena naña pisa pan

la. ³³ Ana apano asuñña amluþarlua ke kilika petan sur mal naþani, ana pogos naþa akila ke sanene, kana þar ne la apiunia asape “?E, asuñña amluþarlua ke kilika petan pe na ya?”

³⁴ Ana apisatañnea asape “Peraga, Suþe sine-nan sape sur mal nini kila ke ne kiena yuññaena tai sumo wa.” ³⁵ Ana atañan narui, aþure togki naþani pimi pa Yesu, ana aþatetae mñala kulkota lala meta e mñasina, amligan Yesu totano ea. ³⁶ Ana Yesu kus togki nene, mial pano, ana pogos naþa mial ke pa sanene, yeririna lala amien plan mñala kulkota lala aþatetae sululu mrapa, vena togki kiena ne Yesu yalor ga metava ea.

³⁷ Ana amial mña e Kunus Na Purolip la pano-o, apim atol yo e naþa mrapa na vitoen garo Yerusalem. Ana pogos naþa pupia þina moki lala na nalogena lala apisu naþa Yesu pimi ke lavisin Yerusalem, asitoññal pupia yuññaena lala a kile lala naþa apisu naga kila, a apisu sane kiela pupia þarin suþe viu tai ne pimi ke ne, ana akekara paþisi, asuñña amieluar Ntewa keviu vanonia. ³⁸ Asuñña apiovionia, asape “!Ntewa na mava, ovisa ruru þarin suþe nene naþa pimi ke e kioñña kia! !Pupia kekarena ma e peni, kam nae ma metava avisirlua kia kiena ne Ntewa, kiena naurarena po na po!”

³⁹ Ana e poglis nene, Varasi laþas asike mñena likan þina la nene, ana pe akekaran re naþa apisirlua ke kia kiena Yesu sanene poli, ana apisa pania asape “!Navianena, ovisaluþar kioñña nalogena lala ve akiikiin ko re si sanene!”

⁴⁰ Ana Yesu pisatañe la, sape “E, peraga narui! Visae ve akiikii re sa nene, pona yoko kilavaru ga la ne sike ne monar akiikii yo.”

Yesu tagin pulkumali wa naña Yerusalem

⁴¹ Ana Yesu pimi lavisin pupia pulkumali nene Yerusalem, kira pito pisuia, sinen miyea, siar naña wamarana mlaunia. ⁴² Kila sanene narui, pisaar nena pania, pisape “Visae ovisu kilale ga ya naña molue pumã nagane! Ntewa sumã kila ke kioñã mrapa wo tai vena olual sumãre ea ana opisu kilale ðele ga. ⁴³ Ana monar nevisa van ko sanini, yoko pogos tai imi van ko naña kioñã nasinekar lala, la ve moki vaðisi naña aimin ko. Yoko asuvivi ko, asuwo ruru ko nenaga, a yoko awar porotano imi ayuwonpolo e yepas nen kioñã pupia kove ana akila mrapa na vitomãsen loyumã, vena awe ko. ⁴⁴ Yoko awe momã narumã lala, a akilawowa make momã yumã lala, awar plan make nena kala kilatapili lala. Nakoena na sanene yoko imi van ko komin naña ko yepmavin visu kilaleen naña nagane naga pe kioñã pogos naña Ntewa pimi mãalivi vena tamalia ko.”

⁴⁵ Ana Yesu mial pa loyumã e pulkumali, pa e Yumã Wa mãana Ntewa, ana pisu la naña akila ke yumãena na tauluen kururu kilavaru ea. Ana naga mēne plan la, sape ⁴⁶ “Ntewa pisa e kiena Visena Wa, pisape ‘Mau yumã wa naga pe yumã na leniena, ana kam na apilon yumã nene narui pimi sane puluve tai mãana yar na vinauena lala.’ ”

⁴⁷ Ana e poglis nene e legiena punu ga Yesu pa ke loyũa e Yũa Wa, ana pian ke yeririna lala, a yerkawa kiena ne yar wa lala amio navianena navisaluaena lala amio mẽna yerkawa kiena ne yeririna lala, pe akekaran re nenaga. Asumņa akalewele ke mrapa vena akilia akila sur tai vena kila narui monar aweņar Yesu. ⁴⁸ Ana peraga, apisu sane tařatete alual mrapa, komin yeririna la nařa amiyagogon ke kiena navianena lala, akekaran manene laa kiena visena lala, la sinelan ga naga silaga.

20

Nasumonena nae Israel lala sinelan asape avisaluřar Yesu

Matiu 21:23-27; Mak 11:27-33

¹ Ana e si e legiena tařena, Yesu řasuře si pa e Yũa Wa mẽana Ntewa gar Yerusalem, sumņa pian ke yeririna lala a mlologon ke mẽna nalologena wo pan la. Ana nasumonena kiena yar wa lala amio navianena navisaluaena lala amio mẽna nasumonon tařena lala apim puna, apiun tania, asape ² “?Ovisali van imimi, sane okila ke sanene e nini e kia kiena ai? ?Ane pisa pan ko pisape okila sa nene?”

³ Ana Yesu pisataņe la, sape “Pogaga, ana yoko in mẽna neviun naviunena tai van amiu sumo wa. Kiau naviunena sanini, sane ⁴ ‘?Nakeena nařa Yoane kila nanua ga ne pa yar lala, naga pe sur tai nařa Ntewa pisa pan pisape kila, pona Yoane ga sitom sape kila? Amiu avisalia.’ ”

⁵ Ana naviunena kiena ne Yesu nene kila narui apis manene ke sina ga pan la, apisa ke asape “?Yoko tevisa ve sanape na vania? !Tevisuar ruruia! Visae tevisave nakeena nene, Ntewa naga pisa pa Yoane, yoko yar nene viun sina tan ita ne visave ana komin ya ne yepeta mavin lelagaena e Yoane? ⁶ Ana visae tevisave Yoane ga sitom sape kila, sa p̄isi yaru la sinela kar ita ana akove ita, komin naṗa amlelaga m̄arera rui sane Yoane naga pe navisawalena kiena ne Ntewa kemua lelaga.” ⁷ Ana sitomena nene kila narui apisatam̄e Yesu asape amninue kare ga narui.

⁸ Ana Yesu pisa pan la, sape “Sanene, in m̄ena ga taṗatete nevisa van amiu ane pisa pan inu sape nekila yuṗaena nene.”

Pakaiwa na yeririna viowa lala navisuaren lokilkerep

Matiu 21:33-46; Mak 12:1-12

⁹ Ana Yesu pisa p̄akaiwa tai pan yeririna la naṗa asike e poglis nene, pisape “Yerkawa tai, amio kiena lokilkerep tai. Naga sinenan sape yaloro re va e purvanua taṗena tai, naṗa m̄eke laa perina, ana naga mligan kiena lokilkerep nene pa yeririna taṗena laṗasa naṗa yoko aim ayuṗaē ea, ana aul vania. ¹⁰ Ana yerkawa naṗani pa suṗa gare pano-o, pisu kilale sane nanagane pogos naṗa mrakerep marua narui. Ana mligan kiena yar tai p̄asuṗe si pa pun la naṗa asike e kiena lokilkerep naṗani, vena war kilavaru na mrakerep komṗasa naṗa monar aul vania. Yar nene pano, ana pogos naṗa m̄alivin la, la pe sinelan re aul poli, ana am̄e kare

naga, amligan si naga p̄asuṣea liman korena ga. ¹¹ Ana yerkaŋa naṣani mligan si kiena yar taṣena pano, ana aṣe m̄ena naga, akila piowa pania paṣisi, ana aṣenelua p̄asuṣe koren ga pa sina. ¹² Ana yam telu narui, yerkaŋa naṣani mligan kiena yar taṣena, ana naga m̄ena ga, aṣea kulu ga kuruta rui, akoven lua e lokilkerep nene pano.

¹³ “Ana yerkaŋa na lokilkerep p̄elaga viowa la ne sanene, mninue kare narui, pisape ‘!Awe! ?Popon nekila ya narui? Pona nanagane monar neligan ga naruu wawa nini narui. Naruu taaga ga nini, nesitom naga paṣisi, ana visae naga vano monar avisu kilalea, avatanonia.’ ¹⁴ Ana mligan naga pano, a pogos naṣa yar la nene apisuia, asitom piowa pania. Apisayu sina pan la, asape ‘Nanene na narin yerkaŋa nene yo. Yar ne na nene narui, naṣa visae yerkaŋa nene kovio, naga ke narui naṣa yoko kus porotano nene sane kiena lalimana. Popon towem̄aria, vena ita ga touarar tano nene ve kieta.’ ¹⁵ Ana asuñal narui atararia, akovenlua naga pa vanua e lokilkerep naṣane, ana aṣem̄aria.”

Ana Yesu sape “Suniena nene pimi maro e nini na ṣa rui, ana popon asitomlia. Pogos naṣa yerkaŋa mloge sur nene, yoko naga imi kila ve sanapen la nene? ¹⁶ Nevisa van amiu sanini, yeririna viowa la nene, yoko naga imi we mom̄ar la, yoko amarmare e nakoaren m̄arera tai, ana yoko ligan lokilkerep naṣani e limana yar laṣas naṣa apowo.”

Ana poglis naṣa amloge Yesu pisa sanene,

amloge kilale naña visena nene sane pisawan ga sur tai, pisayu sape le Yu lala pe sinelan re naga naña pe narina ne Ntewa poli, ana yoko Ntewa were yar la naña pe ape le Yu re poli akus lelela. Ana sur nene pe sinelan re aloge po, apis m̃arera, asape “Sur naña opisa ke ne, Ntewa monar ve ligan re sur nene imi m̃alivi sanene.”

¹⁷ Ana Yesu kira pisu manene la, piun pisape “Pe sinemiun re poli, ana vanon ya ne asiri visen wa naña pisa sanini, pisape *‘Kilavaru nini, yar na yuñāenen yuñā lala asape piowa ga, ana akoven lua pa rui, ana nanagane kilavaru nene pimi pe kilavaru wo tai naña pe na mrapun yuñā, vena uarar yuñā m̃arera.’* *Yauena 118:22*

¹⁸ “Yeririna make ga naña visae avane kilavaru nene, yoko aloru akove kilavaru nena, siwowa kare yepela lala. A visae vano vano-o tol pogos naña kilavaru nene loru, ana yar a naña kilavaru monoaria, yoko kilamumu kare naga vano-o kovio nenaga.”

¹⁹ Ana navianen navisaluaena lala amio yerkawa kiena ne yar wa lala, apisu kilale ãakaiwa kiena Yesu nene panon la nena ga, ana sinela kar manene laa narui, asum̃alu asape auarar nena naga e pogos nene. Sinelan manene laa asape akila sur tai vania, ana akila ãele ga, komin apisu yeririna la akekaran laa naga.

²⁰ Kila sanene narui ana silaga asum̃a apisuaria, a lañasa apa vinau ga apa lavisinia, akila kokanin ga sa naña alelaga e naga, ana sur naña la akila ke ne, asum̃a añar make nena kiena visena lala. Kiela sitomena sane sinelan asape alual visena

laṗas naṗa naga pisa, ana akilia avisawal va yerkawa nae Rom nene Paelat, vena naga kilia la nakoena tai vania sa naṗa la sinelania.

*Sur kiena ne Ntewa, sur kiena ne Sisa
Matiu 22:15-22; Mak 12:13-17*

²¹ Pis na pog tai la naṗa apinaun vena aim lavisin Yesu, apiun naviunena tai tania, sa naṗa akila kotalia ga naga. Asape “Navianena, mepisu kilale sane kioṃa visena lala a kioṃa vianena lala ape lelaga a po paṗisi. A mepisu kilale sa naṗa kioṃa naliṗereen yar lala pe pepe taṗena re poli, naṗa opisu la maran taaga ga, ko opisawal mesmesun ke mrapa kiena ne Ntewa pan yeririna make ga. ²² Ana sinemimin mesape meviun tan ko sanini, sane “?Kieta navisaluaena pisa sanape? ?Sape mesmesun ita le Yu lala toul takis va ṗarin suṗe nae Rom, naṗa Sisa, pona pisape pe mesmes re poli?’ ”

²³ Ana Yesu pisu kilale sane asape akila kotalia ga naga, ana pisa pan la pisape ²⁴ “Ala narin kilavaru tai imi van inu. ?Avisuli sane marana ne ane teke ea? ?A kia naṗa asiri teke ea, kia kiena ai?”

Apisape “Marana Sisa, a kiena kia ṃena ga.”

²⁵ Ana naga pisa pan la sape “Pogaga, sur naṗa pe kiena ne Sisa, ala va Sisa. A sur naṗa pe kiena ne Ntewa, ala va Ntewa.”

²⁶ La nene sinelan manene asape atol ruru Yesu e maran yeririna lala e kiena visena tai, ana pogos naṗa amloge kana navisatarṃeena nena, amilan paṗisi, apisu sane naga kilamṃar ruru kiela kap narui, ana apa ruru la ga asikena, pe apisa re si sur tai po.

*Yar la naña amarmare rui, yoko amamal sina
Matiu 22:23-33; Mak 12:18-27*

²⁷ Ana siraun naga nene, le Satusi lañasa, apim puna Yesu, naña sinelan asape aviun tania e lepas na sur tai naña la amlelaga m̃arera ea, naña asape yar la naña amarmare rui, tañatete amamal sina e legiena maro. ²⁸ Ana apiun tania, asape “Navianena, sinemimin mesape meviun tan ko sanini. Sanapen visena tai naña yermarua Mosis siriyu pan ita na nanua sumo. Naga pisape visae yar tai, wenla mare tan wona, naña lalua pe narila re tai poli wa, yokorena wenla nene monar were letano nene ve wona, vena kila sane sira nene kilia war sisi, vena uarar kia kiena ne wenla naña mare mal tom̃a ga. ²⁹ Pogaga, ana e pogos tai, welelai la olua. Kiela m̃earu ãere wona tai, ana naga mare tan wona nañani lalua pe narila re tai poli wa. ³⁰ Ana wenla na surana naga towe ãere sira nañani, ana yoko naga m̃ena mare tania, ³¹ ana wenla m̃ena na telu, kila sa ke ga, akila m̃a sanene pano-o tol wenla maro na olua, la make ga maran taaga ga, naña pe añar re nena narila tai poli. ³² A siraun wona la punu ga nene, sira m̃ena nañani marñanu. ³³ Ana ovisali sur nene: ?E legiena maro, pogos naña apisa ke asape yoko yeririna la amamal sina, yoko sira nene ve wona ai, komin naña talopa make amio welelai la olua nene?”

³⁴ Ana Yesu pisatam̃e la sape “E ga e yomarava nini, yeririna lala asum̃a atatalopa, ³⁵ ana la naña Ntewa pisape visae akilia amal si vetan marena vena ava loyum̃a e kiena yo, ve akila re sina. E

pogos nene, tařtatete si atalopa narui, ³⁶ a yoko ve amarmare re sina komin nařa aim sa ga navisi la narui. Yoko Ntewa kila amal sina e marena ana avim ave narina ruru nena lala. ³⁷ A e lepas namalen si nene, Mosis mēna pisayu nanua sumo rui e suniena na purlaki nařa kap pivaga ke ea. E nene tepisu nařa Mosis pion pa Ntewa na mava sape naga pe Ntewa kiena ne Epraam a Ntewa kiena ne Aisak a Ntewa kiena ne Sekop. ³⁸ Ana pogos nařa Mosis siri visena nene, la telu nene amarmare e yomarava nini nakonua rui, sane amare e yomarava nini, ana amal asike ma puna Ntewa na wa. Ntewa naga pe pe Ntewa kiena ne yeririna re ga la ne amarmare po, ana naga sinenan sape yeririna la nařa asike amio, yeririna la nařa amali. E navisuena kiena ne Ntewa, yeririna la nařa amarmare e yomarava nini rui, la amal ga asike ga wa.”

³⁹ Ana navianen navisaluaena lala asumā amiyagogon navisatamēena kiena ne Yesu nařa pa le Satusi lala, ana apisu sane manmarua ruru po pařisi, asape “Navianena, kio mā navisatamēena po na po pařisi.” ⁴⁰ Apis sa nene vanon visena kiena Yesu nene kila sane le Satusi lala amaraun nařa aviunli si sur la tania.

Yesu Navisaarena naga pe Ntewa kiena ne yermarua Āarin Suře Tepet

Matiu 22:41-46; Mak 12:35-37

⁴¹ Ana Yesu pis pan la pa laa sane, piun sur tai tan la, sape “Komin ya ne la apian amiun ke asape Navisaarena naga monar mālivi e lus kiena ne yermarua Āarin Suře Tepet, nařa naga pe řarin suře řesania? ⁴² Nepiun nene, komin

nanua sumo, Tepet siri e kiena tus na Yauena lala, sape

'Ntewa na mava pisa pa kiau Suḽe, sape

"Ototano e luḽau lepas na ḽamarua,

⁴³ *otomate ḽa vano-o, yoko neligan kioḽa nasinekar lala aim ve takue tai na kilavannen laḽa."* *Yauena 110:1*

⁴⁴ "Nanene na tepisu sane Tepet pio ke pa Navisaarena sape naga pe kiena Suḽe rui. ? Ana komin naḽa Tepet pisa sanene, sanape naḽa asuḽa apisa ke Navisaarena nene asape yoko molue kome Tepet, naga pe lus nena ga tai?"

Ana yam si tai amilan visena kiena ne Yesu.

Yesu pis ḽarera pa nasumonen na lotena lala Matiu 23:1-36; Mak 12:38-40; Luk 11:37-54

⁴⁵ Ana ḽina la asike amiyagogon ke ga wa, naga pisawal visena tai, naḽa pe kiena ne kiena nalogenaga lala. ⁴⁶ Naga sape "Kam na avisuar ruru yar navianen navisaluaena la nene. Asuḽa aplave manene la e ḽala kulsota viavi la nene, a visave ayaloro e yepesinasa e maran yar lala sinelan asape yar la avatanonla, a avio ruru la asave, '!Kee, pokolulagi, ko na ope Navianen tai naḽa po paḽisi!' A e pogos na ḽaḽagena a loyuḽa e yuḽa na leniena ḽena lala, sinelan asape atoga e lelen yerkawa lala. ?Kam na apisu kilale narui ne? ⁴⁷ A la akila kiela leniena la piayavi paḽisi wa, ana apisokan ke ga ne, komin e ke e pog nene, asuḽa akila kotalia ke ga letano lala, akila kare la. Ana vanon kiela ḽelaga la ne sanene, yoko kiela nakoena naga ḽarera manene laa sane."

21

Letano tai mla narin kilavaru lua pan Ntewa Mak 12:41-44

¹ Ana pogos naña Yesu la asike e yuũa mña Ntewa, apisu naña yar lañasa apimin naña akuan kiela nalaena lala e karo na Yuũa Wa. Ana Yesu teke pisu ke ne, pisu naña yar na sur moki la apim akuan kiela nalaena wo lala, ² a siraunia, naga pisu mña letano tai, naña pe kiena sur re poli, pimi kuan kiena narin kururu varu lua ga.

³ Ana naga pisayu sira nañani pan la, sape “Apisu ke letano nene, naña kuan narin kururu varu lua ga ne? Nevisa sur na lelaga van amiu, sane naga kuan taulu make yar la naña kiela sur moki. ⁴ Yar la nene, kiela kilavaru keviu pañisi, ana akuan ga narin kinakinas komþasa, ana letano nene, narin kilavaru naña mlararia vena ve kiena malena, tamñan make nena pan Ntewa.”

Yesu pisawal naña yoko awe plan yuũa wa mña Ntewa

⁵ Ana siraun naga nene, yar lañas apisayu ke Yuũa Wa, asape apisu po pañisi, amio kana kilatapili nowo lala, a kana sur tanea la naña añaia pe na vayaia punuen kana kove nena. Ana Yesu mloge mña naña asunyu ke sanene narui, naga sape ⁶ “?Kam na apisu sur la nene asape powo liu? Nevisa van amiu sanini, siraunia, e pogos la tai ne pimi ke ne, yoko taþatete si kana kilatapili ne tai to ruru si teke e lelana, komin naña yoko

yar laṣasia aim awe plan tetain kare make yuṁa nene.”

Yoko pog ṁarera monar imi

⁷ Ana pogos naṣa amloge Yesu pisa sanene, apiun tania, asape “?Ana Navianena, yoko awe plan Yuṁa Wa nene pogwai, a yoko mevisu kile ya naṣa visawal visave lavisi sur la nene imi ṁalmṁaliv narui?”

⁸ Ana pisa pan la, pisape “Kam na popon avisuar ruru amiu, vena ve yar tai imi visa kotalia amiu re, komin yoko yar ve moki naṣa ala kiau kia, ana aim avisave ‘!In ne nanini nepe Navisaarena nene!’ pona avisave ‘!Nane, kana pogos ne nanini narui!’ Ana ve ataveve la re. ⁹ A visae e pogos nene, aloge ṁaagena na mara lala, a sur viowa la asike ga lavisi, ana ve sinemiṁ kurkur manene re. Sur la nene monar aṁalmṁaliv sumo, ana naga nene na pe legiena maro re nene po la wa.”

¹⁰ Ana pisa ṁena pan la, sape “A ṣarin suṣe lala, yoko akila sina mara amio ṣarin suṣe taṣena lala, a purvanua lala asuṁalun sina purvanua taṣena lala. ¹¹ Yoko yemninu vaṣisi, a yoko yo kar ga la e yomarava nini pogos na pupia viso vaṣisi a maiena ṁarera lala, a nanene yoko amio ṁena sur na sine kurkurena a pupia kile lala meta e sinapane. ¹² Ana pogos naṣa sur la nene pere wa, yoko yeririna la akila ke ne viowa van amiu. Yoko auarar amiu ṁarera, ala magka van amiu, ana siraunia aligan amiu e limana ne li na sumonen yuṁa nalenena, pona akoven amiu ava asike e yuṁa naloge viowaena, pona akila amiu asuṁalu ase marana ne kiela

ṗarin suṗe lala pona kiela nasumonena lala. Sur viowa la nene yoko akusia vanon naṗa kam na apuarar ke kiau kia m̄arera. ¹³ Pogos nene yoko akila m̄arera van amiu vaṗisi, ana yoko imi sa naṗa kiamiu pulmas na lologonen Lologena Wo van la.

¹⁴ “Ana nagane, pogos naṗa sur la nene pere ke na wa, ve asitom manene re sane yoko aṗa avisa ya ne e pogos nene, ¹⁵ komin naṗa yoko e nena e kana pogos nena, nela visena na manmaruaena van amiu. Ana pog naṗa avisa visena la nene van kiamiu nasinekar lala, yoko ataulu la, yoko taṗatete si avilon kiamiu visena nena.

¹⁶ “Yoko e kana pogos nena, la ga naṗa kam na apio la ke asape arimamiu pona womla pona ṗapo pona erau, la ne sanene la ke naṗa yoko aure plan amiu aligan amiu e limana ne yerkawa lala, ana yoko akilapel amiu sanene vaṗisi vano-o kam laṗasa awe moṗar la. ¹⁷ Yoko yar la sinela kar amiu vaṗisi, yoko laṗasa alamaran si visena van amiu, kam la naṗa kiau kia sike e amiu.

¹⁸ “Ana nevisa van amiu sanini yoko taṗatete vilṗarimiu tai yoko kovio lue. ¹⁹ Yoko asuṗal m̄arera asuṗa vano-o ataulu pog m̄arera nene, a e mrapa nena nanene narui, yoko atol kiamiu malena na lelaga ea.”

Pupia mara gar Yerusalem

²⁰ A e lepas na pupia pog m̄arera naṗa yoko imi, Yesu pisa sina pan la sape “Pogos naṗa visae avisu ṗegas nen yeririna na kilaen mara lala asuṗal asuwo ke yo yervivi pupia pulkumali

naŕa Yerusalem, nane yoko akilia narui sane pupia kana pog na kilaroroen pimi ke lavis narui.

²¹ A pogos naŕa avisu sur nene, kam naŕa asike Sutea, popon aureure ana atapolou e kunus lala, a amiu naŕa asike loyuma Yerusalem, popon amomolue ana aureure, pona amiu naŕa asike yomaŕua, ve akilali re si naŕa ato garo uma.

²² Nanene vanon poglis nene, naga pe pupia legiena na kila maranen sinemimiena kiena ne Ntewa, sa naŕa nasiriena lala nanua sumo apisaaria. ²³ E maena e pogos nene, yoko viowa manene laa va sira la naŕa mepele, amio maena la naŕa amla ke yu pa narila lala. E pog nene, yoko naloge viowaena ve keviu vaŕisi e kieta purvanua, a pupia sinemimiena imi va kieta yeririna la nene. ²⁴ A yoko playu na mara kila la ave moki aloloru, a la ve moki naŕa sen viar limala, aurela ava ayuma korena kiena ne pegas nen yeririna taŕena lala. Ita le Yu lala yoko yar taŕena lala avienena kare kieta pulkumali wa naŕa Yerusalem, la ave suŕenia vano-o tol pogos naŕa Ntewa ga kila sane lala kiela ŕisi narui.”

Yoko Narina ne Yeririna wasuŕe si imi

²⁵ A Yesu pisayu legiena maro, sape “E pogos nene yoko avisu kile lala ma e mrae a e kupario a e verue lala. E yomarava nini, yoko pegas nen yeririna lala aloge viowa, asitom kare sur la vaŕisi, a pogos naŕa avisu sive kululu ve keviu a lapa ke vam metava va ke ura, yoko la aninue kare narui asape ma yoko ve sanapen la na wa.

²⁶ A pogos naŕa la avisu kilale ya naŕa pivim

ke e yomarava nini, a pupia sur la naŕa ma e sinapane kulkulul kar ga narui, yoko sinela kurkur vaŕisi, asumã marala malon marauena, a amarmarluiã. ²⁷ Yoko akila mã sanene vano-o, avisu inu Narina ne Yeririna nomãlivi e lul amio kiau pupia naŕareraena amio kiau pupia naurarena.

²⁸ “Ana e kiamiu lepara, pogos naŕa visae avisu sur la ne sanene asiar aŕmãlãliv, ve amarau re. Ve asitom re suria, ana asumãlu awar plan ŕarimiu vena akira va metava, komin naŕa sur la nene kana kinasa sane kiamiu yaru nawere plan amiuena pimi ke, lavis warpoyo narui.”

Lepas na purpiliva

²⁹ Ana Yesu pisayu ŕakaiwa tai pan la e lepara na pogos mãrera naŕa pimi ke ga wa, sape “Kam na asitomyuli purpiliva nene pona purlaki taŕena naŕa sanene. ³⁰ Pogos naŕa avisu sane korowas la imi memaena, a imi malmalumu, a kana stos la siar miyulua, ana kam na akilia sane pogos na yepisusun pimi ke lavis narui.

³¹ Sanene pogos naŕa avisu kile la nene aim aŕmãlãliv ke sa naŕa nepisa pan amiu ŕa rui, yoko akilia sane nasuŕenena kiena ne Ntewa pimi ke lavisin amiu narui. ³² Lelaga nevisa van amiu, yoko sur punu ga monar imi mãlãlãliv mã sanene vano-o ŕisi, ana siraunia, teras na yaru la naŕa amal ke e pog nene akovio e yomarava nini. ³³ A yoko sinapane amio yomarava nini la m̄ena luwoka akovio, ana kiau visena lala taŕatete akovio pogos tai.”

Kam na monar akila ruru kiamiu malena lala

³⁴ Ana Yesu mla visena nene pan la e pogos nene, pe visena na weŭege laena, sape “Ana e kiamiu lepara, kam na avisuar ruru amiu. Pe pon re kiamiu malena ve taŭena si poli, pona amun manene la kuruta na munena, pona sur kar la ne sanene, a ve kiamiu sitomena su manene re mŕena ga e sur na yomarava nini la silaga. Visae peraga, yoko asumŕa akila mŕa sanene vano-o ailan ga pupia legiena nene imi mŕalivin amiu veraga sa ga ekarpila. ³⁵ Lelaga, yeririna make ga e yo punu ga e yomarava nini, pe asitomŕal re poli, asu wowe ga pe akilia re poli, ana yoko legiena nene imi tol la sa naŭa manu milan ga ŭeregawa suŕal maneno sike e naga, marŭan nenaga. ³⁶ Ana kam na monar avisuar ruru amiu silaga, monar alen lue ga vena akilia asŕal mŕarera vena atamalia amiu e sur la naŭa yoko imi mŕalmŕaliv, vena kila naŭa akilia asumŕal ase marau Narina Yeririna.”

³⁷ Ana Yesu suŕa pian la ke sanene e Yumŕa Wa ko legiena lala, a kolemallo naga petan pulkumali pava ke e Kunus Na Purolip lala. ³⁸ A kolulagi kona lala yeririna lala atavilo koskos, aŭasuŭe la apa si e Yumŕa Wa vena aloge kiena visena lala.

22

Nasumonena nae Israel lala asitom ke asape awemŕar Yesu na wa

Matiu 26:1-5,14-16; Mak 14:1-2,10-11; Yoane 11:45-53

¹ Ana siraunia, pimi ke lavisin pog naña kas punu ga, la akila kiela pupia pãpãgena lua, sane pãpãgena na kanen kiligaþe naña pe is re e poli, amio pãpãgena na sitoñalen natamaliaena.

² A e pogos nene, yerkawa kiena ne yar wa lala amio navianen navisaluaena lala, asitom ke asape aweñar Yesu na wa, ana pe añal re mrapa na kilaen poli, komin amaraun naña asape visae akila, pona yeririna la akila sur tai van la yo.

Sutas sun amio yerkawa lala, pisaar sape þisi na kom varaun Yesu

³ Ana e nena e pogos nene, Yermare pimi pa e sinena Sutas nae Kariot, naga nene la lualima taaga pa lua lala ga tai. ⁴ Ana pe yam piavi re nenaga, Sutas sumãlu, pa mñalivin yerkawa kiena ne yar wa lala amio yerkawa kiena ne kiela lokul lala, pisawal kiena sitomena nena, ana apisayu mrapa ya naña po, vena yoko kilia vielua Yesu van la.

⁵ Ana sitomena kiena ne Sutas nene kila amloge po paþisi, ana la apisu sane popon ala kilavaru tai vania vanonia. ⁶ Ana Sutas kekarania, a siar e pogos nene, silaga naga sumã kale ke kiena pulmas tai naña visae ve yeririna re lala, ana naga kilia vielua Yesu van la.

Yesu pitetalia Pita lalua Yoane vena ava akila ruru kana kinanena maro

Matiu 26:17-25; Mak 14:12-21; Yoane 13:21-30

⁷ Ana apim tol legiena na siaren pãpãgena na kanen kiligaþe naña pe is re e poli, naña e mña nena e legiena nene monar akila kuþaþaena na narin sipsip lala vena sitoñalen natamaliaena.

⁸ Ana Yesu pisa pa Pita amio Yoane, sape “Nevite-talia amlua ava gare, vena akila ruru make sur lala na kinanena na p̃aṣagena nene.”

⁹ Ana lalua apiun tania asape “?Ana ko na sinoṃan ke osape meva mekila ruru e nape ne?”

¹⁰ Ana Yesu sape “Kamlua ava atol pupia pulutava nae Yerusalem, ana pogos naṣa avaliga loyuma ea, alual yar tai naṣa kus ke pupia piawi tai imi vitawe amiu. Ana ataveve avano, yoko naga were amiu ava e yuma tai. ¹¹ Ana pogos naṣa ava loyuma, avis va p̃ar na yuma naṣani, avisave ‘Kieta Navianena piun sape, ? Awa ṃamimi yuma imimi wolawa lala, vena mekilia mese ea makan kinanena nasitoṃalen natamaliaena nene ea?’ ¹² Kamlua avisa ve sanene vania, ana yoko naga kipian amiun pupia lele tai metava, naṣa sur make sike pa e rui, ana yoko akila ruru make sur na kanen la e yo nene.”

¹³ Ana Yesu pisa pa sanene pa nalogena lua nene narui, lalua apano, ana apisu sur la punu ga pimi ṃalivi sa ga naṣa naga pisa ruru p̃esan kemua pan la rui.

Sanene narui, lalua akila ruru kinanena maro kana Yesu.

Kinanena maro

Matiu 26:47-56; Mak 14:2-26; Yoane 18:3-11

¹⁴ Ana siraunia Yesu la apa meta e yo naṣani, ana pog na kinanena, Yesu totano e lelen kinanena, ana li na lologena lala apim atotano amio. ¹⁵ Ana Yesu pisa pan la sape “Na nanua rui, in na nesitom ṃa kata kinanena nasitoṃalen natamaliaena nene. Na nene kau kinanena maro nini, naṣa ita ga tekinana lele taaga, ana

siraunia, nekilia neva ga e kiau pog m̃arera na wa. ¹⁶ Nevisa van amiu sanini, kilaparavi nini kana kinas pisayu natamaliaena. Ana yoko in na ve nakan re si narui, vano vano-o tol pogos naña kiau natamaliaena imi m̃aliv e yomarava nini, e pogos naña nasuñenena kiena ne Ntewa imi.”

¹⁷ Ana naga mlarar piala tai, pisa potenan pa Ntewa, ana pisa pan la, sape “Ala nanini, ataron werewere van amiu, amunia. ¹⁸ Nanene komin naña siar nanagane, in na yoko ve nomun re si kuruta na munena, vano-o tol pogos naña nasuñenena kiena ne Ntewa imi.”

¹⁹ Ana naga mla kala kilaparavi tai, mlenin pisa potena pa Ntewa, kawewowaia pisape “Naga nini tasneu ne, naña netam̃an pan amiu. Ana yoko kam m̃ena ga monar akila ve sanene, sa naña kiamiu nasitom̃alinena.”

²⁰ Ana siraunia, pogos naña akinana pae, naga kila ke sina sa naña kila e kilaparavi sumo, mla piala na munen tai, pisape “Piala nini naga sane kile na kau kuruta naña yoko lau vanon amiu, vena visirluaen naviranarena viu kiena ne Ntewa amio amiu. ²¹ Ana sur viowa tai, yar naña yoko vielua inu, naga ita ga tai naña tekinana ke lele taaga nagane. ²² Yoko inu Narina ne Yeririna monar nemare ve sa naña apisaar kemua nanua sumo rui, ana yar naña yoko vielua inu, sineu miye ke nagane, yoko viowa manene vania!”

²³ Ana pogos naña amloge, asum̃a apiuviun tan la asape akilali naña alual lala ai naña sitom ke sape kila sanene, ana pe am̃al re poli.

?Ane yoko ve kiela nasumonena?

Matiu 20:25-28; Mak 10:42-45

²⁴ Ana e pogos nene, veveyuen tai molue likan nalologena lala, sape lala ai naŕa yoko la monar avisu naga sane naga to laa metavan la sane, ve kiela nasumonena.

²⁵ Ana Yesu mloge, pisa pan la, sape “Ita tekilia ŕelaga kiena ne yerkawa na yomarava la nini rui. Āarin suŕe lala la ape navisuaren kiela yeririna lala, a nasumonen lala, yar la monar avatanon la, ala kia naŕa tometava van la, avio la avisave ‘yar navisuar itaena.’ ²⁶ Ana kam na kiau nalogena lala, monar ve akilali re sa naŕa aim ave yerkawa na yomarava nini. Kam yar tai naŕa pona apisa ke asape naga pe yerkawa, yoko monar imi ve tokakin amiu, sa naŕa pe pras maro. Kam yar tai naŕa sape naga ve kiamiu nasumonena, monar imi ve sa yar na iila amiuena.

²⁷ “E pogos na kinanena, yar tai naga toŕa ga sane kikiran ga, a yar taŕena naŕa ŕar ke kana kinanena pimi pania. Ana lalua nene apisu sane ane pe yerkawa, naga mon manene laa metava? Lelaga kam akilia ŕaga, ana in na pe sa re naga po, in na nepitom e yomarava nini sane naga naŕa kila yuŕaena, miila yar taŕena lala a kila po pan la.”

Yesu pisaar nalaena pan la

²⁸ Ana Yesu pisa pan la, sape “Kam nene, nepisu amiu sane kam na sane amiilar inu po

e pog m̃arera la naṗa netolia, pimi tol nanagane. ²⁹ Ana sa naṗa arimau mligan inu nepe suṗen kiena yo, in m̃ena nevisa van amiu sanini nevisir plan amiu aim ave narin suṗe lala e kiau yo la nene. ³⁰ Sanene, yoko kam ke narui kam naṗa yoko ato si tano amio inu, tekinana lele taaga loyuma e kiau nasuṗenena, a yoko kam m̃ena atotano e lele na totanoena naṗa mon metava vena visuaren lus lualima taaga pa lua nene nae Israel.”

Yesu pisawal naṗa yoko Pita viro naga

Matiu 26:31-35; Mak 14:27-31; Yoane 13:36-38

³¹ Ana Yesu pis amio Saemon Pita, sape “Ake Saemon, ovisuar ruru ko. Yermare sinen kar amiu, sinenan sape kila kare amiu vaṗisi, ana Ntewa tam̃an rui sape yoko naga kilali amiu ve tokak ga, kilia liṗere naṗa po vetan naṗa piowa. ³² Ana in na nemlenwo amiu ke rui, in na nom̃areran ko ke e kiau leniena nesape visae ko na ve sanape, ana yoko kioṃa naviawaena taṗatete loru makea. A siraunia visae ko na oim owo ruru sina, owasuṗe ko oimi, yoko ko na oim ove yar tai naṗa silaga okila womla lala aviawa m̃arera manene laa sane.”

³³ Ana Pita pisatam̃e Yesu, sape “Suṗe, visae akoven ko ova e yuma nakoaena, yoko in na nemio ko woga ga. Pona akila ma van ko vano-o ova otol marena, ana in m̃ena nekekan ga naṗa italua.”

³⁴ Ana Yesu pisa pania, sape “Pita, nevisa sur na lelaga van ko, sane yemalo ga nini, ve

lakaporo kokoreko re wa, yoko ovisa kotalia inu yam ve telu, ovisave ko na omninue in nena ga.”

Pog m̄arera pimi p̄arpo yo rui

³⁵ Ana Yesu piun tan la, sape “Kam na asitoñal ke nanua ne, pogos naña nemligan amiu apa amlologo kar ga e yo la nene. In na nepisa pan amiu nesape ve awar re sur lañas amio amiu, sane taga na varu, pona karo, pona kulus nen lamiu tañena, pona sur la ne sanene. ?Ana sanape, kam na apisu limamiu plasan sur lañas, pona peraga?”

Ana apisatañea, asape “Suñe, pe limamimi plasan re sur tai poli.” ³⁶ Ana Yesu pisa pan la, sape “Lelaga, naga ke narui. Ana nanagane, tesike e pog tañena nini narui. Nanagane, yar naña kiena taga na varu, pona kiena karo toña ga, yoko warar vano. Yar naña pe kiena playu na mara re poli, popon wilwilin lua m̄ana kulkota ana la kana kilavaru, va ul kiena playu na mara tai. ³⁷ In na nepisa nene pan amiu, komin nasiriena wa nasumo lala naña la apisayu inu, apim añalñaliv ape lelaga narui, pano-o tol visena naña Aisea pisa, naña sape

‘Akila pania sa ga naga m̄ena pe yar viowa ga tai naña kilakilaro ke navisaluaena.’ ” Ais 53:12

³⁸ Ana nalogena lala asumã asitom veve ke ga visena kiena Yesu e lepas na playu na mara nene, ana asape “Suñe, opisu ke ne, nanini kieta playu na mara lua nini.”

Ana Yesu pisu sane la pe akilia ruru re kiena visena poli, ana sape “E, tepisayu sur nene torok narui.”

Yesu pa mlen ma Ketsemani ma meta e Kunus na Purolip lala

Matiu 26:36-46; Mak 14:32-42

³⁹ Ana Yesu la amligan yo na ma metava nene, ana sa naña kilakila ke ne, naga mialoro pa tol Kunus Na Purolip lala, naga amio kiena nalogena lala. ⁴⁰ Ana pogos naña atol yo naña Yesu pava ke ea, amap ea, ana pisa pan la, sape “Kam na monar alen silaga, vena nakilaliena lala ve akila amiu re aloru.”

⁴¹ Naga pisa pa sanene pan la, ana mligan la, pa laa perinan laa sane, ana kinai mlen pa Ntewa.

⁴² Naga mlen sanini, sape “Awis Ata, visae okilia okila woga ga, olalua piala na loge viowaena nene vetan inu ve nomun re. Ana ve okila re kiau nasinenanena, okila ga sa naña kioma.”

⁴³ Ana e poglis nene Yesu mloge urmi pan pañisi, ana apisu navisi tai mligan ma e peni pitomi tano, pitomi miila naga vena naga m̄arera sina. ⁴⁴ Ana Yesu suña mloge piowa pañisi, sitom ðele narui ana mlen m̄arera laa sane, mlen ña pano-o kana ninena sigariga sane kuruta kekapili e porotano.

⁴⁵ Ana pogos naña mlen pae, suñal sina, ðasuñe si pa puna nalogena lala, ana pisu naña nasineyeena ñe la rui, amiyuñæn ke ga momalena narui. ⁴⁶ Ana naga pis malum kilap̄ege la, sape “?E, amomalion ke ya ne? Popon asuñalu, akila ve sa naña nepisa pan amiu rui. Kam na

monar alen vena nakilaliena lala ve aim re akila amiu aloru.”

Sutas la apim atarar Yesu

Matiu 26:47-56; Mak 14:43-50; Yoane 18:3-11

⁴⁷ Ana pogos naña Yesu pis ke pan la wa, apisu ga pupia ñegas nen yeririna tai apim akaten la, apisu naña yar tai sumon la apim ke lavis narui, nanene na lala yar ga na sumo tai, naña Sutas. Ana Sutas mial pimi lavisin Yesu, kutararia ana mun pipina. ⁴⁸ Ana Yesu pis ñesan pania sape “Sutas, omun pipiu sanene na pogaga, ana komin ya ne osape owilwilin inu Narina ne Yeririna e mrapa na sanene?”

⁴⁹ Ana la naña ape kiena ne Yesu naña asumãlu asike lavisinia apisu kilale ya naña Sutas la asape akila, la apiun tan Yesu, asape “?Suñe, sanape, tete la e kieta playu na mara lala?”

⁵⁰ Ana Yesu pe pisatamẽ re poli wa, ana nalogena tai sumãlu, ñerelua kiena playu na mara, mligan pan tai tea, naña naga yar kiena ne ñarin yar wa, ana tetereria ga, telua kiligana na ñamarua pano.

⁵¹ Ana Yesu pis pania, sape “!E toko! Ita ve tekila re si sanene van la.” Ana naga tol si lelen kiligana yar nene, kila ruru sina.

⁵² Ana kira pisu yerkawa kiena ne yar wa lala amio yerkawa kiena ne lokul lala na yumã mñana Ntewa, amio nasumonena tañena kiena ne le Yu lala, naña la mñena apiminia, pis pan la, sape “? Sanape na añar kiamiu playu lala a kiamiu plaki la sanene? ?Pona kam na asitom ke asape in na yar tai naña nepinau m̃arera pona nomẽmẽ

yaru? ⁵³ Nanua sumo, e legiena punu ga, in na nesisike nemio amiu e Yumã Wa silaga pano-o, ana komin ya ne kam na pe apim re lavisin in poli vena atarar inu e pogos la nene? Ana nepisu sane kam na ape yar na yemalolo, naña apim amio namãreraena na yemalolo tañena lala, a nanagane kiamiu aora nena napo.”

Ana apim atarar Yesu aþere pano.

Pita piro Yesu

Matiu 26:57-58,69-75; Mak 14:53-54,66-72; Yoane 18:12-18,25-27

⁵⁴ Ana atarar Yesu, aþere þasuþe amio la apano, apa loyumã e kove kiena ne þarin yar wa. Ana Pita mñena mial tapolou ga taveve la e pogos nene, pe pa re lavisin la poli. ⁵⁵ Ana pogos naña apim loyumã e kove nene, laþasa apa akila kapi pivaga vena ategania, ana Pita mñena pa totano amio la.

⁵⁶ Ana la asumã narui kapi pivaga tegoli marana Pita, ana sira mñee na yumãena tai naña naga sike amio la, naga pisu kilalea, sape “!E, avisulia! Yaru nene, naga mñena lala yar tai naña silaga taveve yar naþani!”

⁵⁷ Ana Pita pirovia, sape “!Peraga, vineu! Nepisa ruru ke na pan ko ne, in na pe nekilia re yar nene poli.”

⁵⁸ Ana pe piavi re poli, yar tañena kira pisu Pita, pisu kilalea, sape “E, ko mñena tai nene naña.”

Ana Pita pisatamãea, sape “Peraga, mara.”

⁵⁹ Ana asumã ga aora si taaga ãarovia, taãena pimi pilagan manene ke sina ga pan la, sape “Nevisa ruru van amiu, yar nene naga miaialor kemua amio yere Kalele nene nanua rui. !Apisu ke ne, naga m̃ena pe yere Kalele ruru nena napo!”

⁶⁰ Ana Pita pisatam̃ea, pisa kotalia la ke sina ga sape “Peraga, nemninue nena sur na opisa ke ne.”

Ana pogos naãa Pita pisa ke visena nene wa, lakaporo kokoreko.

⁶¹ Ana pogos naãa lakaporo kokoreko, Suãe pilon ãarina kira pimi pisu manene Pita. Ana Pita sitom̃al si visena kiena ne Suãe naãa pisawal ãesan pania, naãa sape “Nevisaar nena van ko, e yemalo na legiena ga nene, pogos naãa lakaporo pe kokoreko re poli wa, ana yoko oviro inu yam ve telu narui, ovisave ko na omninue in ga.”

⁶² Ana Pita mloge piowa paãisi, pa vanua, tagi na tagi.

Yeririna lala kiena ne ãarin yar wa akila kare Yesu paãisi

Matiu 26:67-68; Mak 14:53-65; Yoane 18:19-24

⁶³ Ana la naãa atarar ke Yesu e pogos nene akila piowa pania, apisa karea, asuia, ⁶⁴ akila m̃a pano-o apiwo marana vena ve kirava re sina, ana pogos naãa asumã amlipa ke naga, apiai pania apiun tania asape “Ei, apisa ke asape ko navisawalena tai, a ko ovisawal lia, ane mlipa ko ga na wa.” ⁶⁵ Ana akila m̃a sanene panpano-o, apisa kare naga paãisi.

Atar Yesu pa e pupia kumali kiena ne yerkawa kiena ne le Yu lala

⁶⁶ Asumña ga sanene pano-o mrae pa metava, ana nasumonena kiena ne le Yu lala, sa naña pupia yerkawa wa lala amio navianen navisaluaena lala, apim lele taaga e kiela pupia kumali. Pogos naña apim pa e lele taaga narui, aþere Yesu pa suñal se marala. ⁶⁷ Ana apis pania, apiun asape “Visae ko ope Navisaarena kemua lelaga, naña le Yu lala akiravan ke asape yoko naga monar imi, sinemimin mesape ovisawal ruru van imimi nanagane.”

Ana Yesu pisatamñe la, sape “Nekilia nevisawal van amiu, ana visae nevisa, pona taþatete akekaran naña alelaga e yo. ⁶⁸ A sineun nesape in mñena neviun sur laþas tan amiu, ana visae neviunia, yoko kam na taþatete mñena avisatamñe yo. ⁶⁹ Ana sur tai naña in na nekekaran nesape nevisawal van amiu, nevisa sanini, nesape ‘Siar nanagane, yoko ve sa naña Tusi Wa pisa rui, naña sape yoko Narina ne Yeririna va totano ma metava e lepas na þamarua puna ne Ntewa na pupia namñareraena.’ ”

⁷⁰ Ana pogos naña amloge visena nene, apiun tania, asape “!Ke, ya ne sa nene! ?Opisa ke osape ko ke naña ope Narina Ntewa narui?”

Ana Yesu pisatamñea sape “Naga ke narui, sane apisa ke ne.”

⁷¹ Ana pogos naña la asumña apisu naña Yesu pisa ke sape naga pe Narina ne Ntewa, sinela mimi, apisa sanini, asape “Yar nene pisa sanene, tepisu kilale ruru sane pupia veveyuena mñe ke ga e naga rui. Yoko ve takale re si yar taþena la

kiena visena imi visawalia, naga kiena visena ga mliṗere sina naga rui.”

23

Aṗere Yesu pa puna ne Paelat, ṗarin suṗe nae Rom naṗa pisuar ke Israel

Matiu 27:1-2,11-14; Mak 15:1-5; Yoane 18:28-38

¹ Ana li na kumali kiena ne le Yu lala, amloge pa visena kiena Yesu rui, ana asuṃalu akuspran la e pupia ṗegas tai, aṗure Yesu pa suṃal se marana ne Paelat e kiena lele naliṗereena. ² Ana apis pa Paelat, apisawal sur la mok paṗisi pania naṗa apisayu Yesu. Asape “Yar nene, naga suṃa kila kare ke sitomena kiena ne yeririna lala e kiamimi purvanua, suṃa pialuṗar la ke sape ve aul re si takis va kioṃa yerkawa nene, Parin Suṗe Sisa nae Rom, a naga ga suṃa pisirlua ke naga sape kus kia naṗa Navisaarena, kila sane naga ve kiamimi ṗarin suṗe keviu. Sur la nene, imimi na mepisu nena e kilamaramimi.”

³ Paelat miyagogon pae kiela visena, ana piun tan Yesu, sape “Ko towe ovisali kioṃa. ?Lelaga kemua naṗa ko ope ṗarin suṗe kiena ne le Yu lala, pona peraga?”

Ana Yesu pisatamea, sape “Naga ke narui, nane opisa ne.”

⁴ Ana Paelat miyagogon visena kiena Yesu, ana pe ṃal re naṗa naga kila sur tai piowa po, ana pisa pa pupia yar wa lala amio kiela yeririna lala, sape “Yar nene, e kiau navisuena, naga mesmesu ga, naga pe kilaro re navisaluaena tai poli.”

⁵ Ana la pe sinelan re logen visena kiena ne Paelat nene poli, ana la akila ga sane sur na vitañilena, añareran manene pania, asape “Peraga, yar nene na piowa ga. Naga suña miyuyur kare sitomena kiena kiamimi yeririna lala, a suña mlologo ke pan la e yo kar ga la ne e yo punu ga, siar gar Kalele, pimi ñar make yo Yutea, pimi tol pupia pulkumali nene rui.”

⁶ Ana pogos naña Paelat mloge asape Yesu siar kiena yumãena gar Kalele, piun sape naga pe yere Kalele naapo pona peraga. ⁷ Paelat piun sanene komin naga pe pisuar re lepas nae Kalele po, ana ñarin suñe tañena naña Erot naga pisuar ke yo nene, a pogos naña apisawal pa Paelat asape Yesu naga nae Kalele, naga pisa pan la sape yoko monar aure naga va m̃alivin nena Parin Suñe Erot e kiena lepasa. Ana e pogos ke nene, ana Erot m̃ena pimi mialiali ke Yerusalem rui, ana añere ga Yesu apa apisuia.

⁸ Ana pogos naña Parin Suñe Erot pisu kilale sape Yesu nene, kekarania komin naña mloge pa kiena suniena rui, kila sane nakonua rui naga sinenan sape visuia ana peraga, ana naga sitom ke sape nanagane narui, pona visu Yesu kila kile tai van yo. ⁹ Ana naga sunli amio Yesu, piun veve sur la mok pania, ana Yesu pe pisatam̃e re poli, toña ga sane, pe pis re poli.

¹⁰ Ana e pogos nene, pupia yerkawa wa lala amio navianen navisaluaena lala, la m̃ena asum̃al asike ga lavis, apis keviu apisasawal ke sur lala e lepas kiena ne Yesu. ¹¹ Ana sur la nene akila Erot amio kiena yar na mara lala pe sinelan

re si Yesu po, akila piowa pania, apisalele karea ãisa. Siraunia amiyen kulmrae nowo ãana ne ãarin suãe ea, vena avitalia, ana akila ãa sanene pano-o, yoko Erot mligan si ãasuãe pa pa Paelat vena visuvevea.

¹² Ana sumon sur la nene, lalua nene Paelat amio Erot lalua ape erau viowa ga, ana siar e poglis naãa lalua amiyuãae si lele taagan liãereen Yesu, ana ãere si lalua apim ape erau wo sina.

Yesu suãal si se marana ne Paelat

Matiu 27:15-26; Mak 15:6-15; Yoane 18:39-19:16

¹³ Ana aãasuãe la si apim e yo kiena Paelat, ana naga pio viraviran pupia yerkawa wa lala amio suãe lala a yeririna lala sape aim avisuia. ¹⁴ Ana pogos naãa apim loyuãa, pis pan la, sape “Naãa aãere ãesan yar nene pimi suãal se marau, kam na apisawal asape naga pilon kare lue ga sitomen kiena ne kiamiu yeririna lala. Ana nepiun sur laãas tania, sa naãa kam na amloge, ana in na pe nomãal re sane naga kila sur la naãa apisa poli, nomãal sane naga mesmesu ga. ¹⁵ Ana nemligan pa pa Erot pisuvevea, ana Erot pe ãa re sur tai e poli, ana mligan sina pimi pan inu. Pogaga, kiau naliãereena naga sanini, sane naga pe kila re nena sur tai naãa monar maren poli. ¹⁶ Visae sanene, yoko in na nekila ga sanini vania, nekila ga naãa awea, yoko aligan si vano, kilia wasuãe si va e kiena yo.”

¹⁷ Ana komin naãa e pogos nene naga pe pogos na kilaen pupia ãaãagena kiena ne le Yu lala, asitom ke asape sa naãa Paelat naga kila ke

silaga, yoko naga monar ligan lua si yere Yu tai naña apuñarar ñeke e kiena yumña na loge viowaena. ¹⁸⁻¹⁹ Ana poglis nene lala yar tai naña Paelat p̄uarar ke ga wa, naga yar naña Parañas, naña nanua sumo, naga p̄ere yar tañena lañas akila sur piowa tai gar Yerusalem pa yar na kilaen mara lala nae Rom, añe momar la, ana Paelat koven pa e kiena yumña na loge viowaena.

Ana pogos naña apisu sane Paelat sinenan sape ligan lua si Yesu molue, apion manene pania, asape “Toko, toko! Imimi na sinemimin ga Parañas wasuñe si imi van imimi. Yar nene, mesape olalua ga kiena malena.”

²⁰ Ana Paelat yepen mavi, naga sinenan sape Yesu na molue koren ga sa ga ne va si vanua, ana kilali naña pis sina ga pan la. ²¹ Ana la ato ga metavania, apionia asape “!Osuaría, osuar e laki torovia!”

²² Ana Paelat pis pan la yam telu narui, sape “?Ana komin ya ne, naga kila ya ne piowa? In na nepisuveve make sur la rui, ana pe nomal re sur tai piowa teke e naga po, naña naga kilia marenia. Yoko nekila awe ga naga, yoko aligan si wasuñe va umña.”

²³ Ana la apisatamñe si Paelat, apion manene laa pan sane, añararan asape Yesu na monar va e lak torovia, ana akila mña sanene pano-o atauluia.

²⁴ Ana yokorena Paelat mla kiena naliñereena, pisawal pisape naga tamñan ya naña la apiunia. ²⁵ Yar naña sike e yumña naloge viowaena komin p̄elaga na kilaen mara amio p̄elaga na wemñaren yaru, Paelat tamñan naga molue si pa pan la, sa naña la apiunia. Ana e lepas kiena ne Yesu, naga

pisawal sape yoko kiena yar na mara lala akila vania ve sa naña le Yu la sinelania.

Añere Yesu pa e yo naña Kalþari

Matiu 27:32-44; Mak 15:21-32; Yoane 19:17-27

²⁶ Ana la añere Yesu pavini, amiyal apa e lele na suaren naga e laktorovia. Poglis naña apa ke narui, añal yar tai pa yom̄arua þasuþea, yar nena naga Saemon naña nanua sumo naga nae Saerin, ana am̄areran asape naga kus laktorovia kiena ne Yesu, ana amligan e purkaunena, ana taveve Yesu vavini.

²⁷ Amiyal apa ke sanene, ana poglis nene yeririna taþena m̄ena la mokliu naña ataveve ke Yesu, naña sira la moki, naña asum̄a atagililue amio pupia sineyeena. ²⁸ Ana Yesu mloge m̄a kiela visena na loge viowaena lala, ana kira þatau pisu la, pis pan la, sape “Sira re Yerusalem lala o, ve atagin in re si sanene. Visae sinemiun tagena popon atagin amiu ga, pona narimiu lala.

²⁹ Nepisa sanene pan amiu, komin naña pog m̄arera tai pimi ke ne naña yoko yar la ne asuwal pog nena yoko avisa sanini, avisave ‘!Visae sira la ve kala sisi re ga rui! A wo manene laa sane visae ve awar re sisi la ne amun ke yu ne, komin e pogos nene yoko m̄arera manene laa van ita temio narita lala.’

³⁰ “A yoko pog nene imi viowa manene laa van la vano-o asum̄alu atag va tavie lala a kunus la avisave ‘Awis, aloru akoar imimi, akove mom̄ar imimi, asinwo imimi.’ ³¹ Monar avisuar ruruia, komin nanagane na lak memaena ke ga wa

ana akila ke m̃arera manene pan inu rui, ana siraunia va m̃a sanene vano-o visae lak imi mano pae, yoko akilia akila viowa manene laa sane van amiu.”

Asuar Yesu e laktorovia

³² Ana e poglis nene, apuarar ke m̃ena yar lua nakilaroen navisaluaena, ana aṽere lalua nene amio Yesu, vena aweṽar la amio naga. ³³ Ana amial m̃a apano-o, apa atol kana yo nene, yo tai naṽa apio asape “Yo na puriu na ṽarin yaru.” Ana la atarar Yesu, asuar naga e laktorovia, apisirlua su lika, ana asuar yar na mlamulena viowa lua nene, apisirlua la tai se ṽamarua a tai se ṽaṽeli.

³⁴ Sa nene narui, Yesu telan m̃eke e lak torovia, ana pis pa Ntewa, pisape “Ata, awis oviewo la nene. La pe apisu kilale re sur na akila ke ne poli.”

Ana siraunia li na mara la asum̃a ga, akila sur sa naṽa amlil m̃apila, vena lualen lala ane yoko war kulmrae m̃ana Yesu tai, a ane war tai.

Apitalia kare Yesu ṽisa

³⁵ A yeririna taṽena la asum̃alu asike laa perina, asum̃a apisuar ke ga, ana kiela nasumona lala apis piowa pa Yesu, apisa karea, asape “Akira avisu yar naṽa! Asape naga tamalia yar taṽena la mok rui, ana nanagane na sanape? Asape naga pe Navisaarena kiena ne Ntewa, pona naga pe yar tanea tai naṽa Ntewa mligan pimi. Visae sanene, popon tamalia towe laa naga narui!”

³⁶ Ana yar na mara m̃ena lala apisa karea, apim akian kuruta namunena naṽa melkalka pania vena munia, ³⁷ asape “!Visae ko ope ṽarin suṽe kiena ne le Yu kemua la lelaga, sa naṽa apisa ke ne, popon otamalia ko nanagane!”

³⁸ A e pogos nene asiri navisakilaleena tai, asuar to meta e laktorovia to metavan ṽarina ne Yesu, naṽa sape “Parin Suṽe kiena ne le Yu lala.”

Lalua na kilaroen navisaluaena apis pa Yesu

³⁹ Ana e pogos nene, lalua naṽa atelan la asike meta e lak torovia amio Yesu apis pania. Tai pis piowa pania, sa ke taṽena lala, sape “?Ko ope Navisaarena naṽa, po peraga? !Popon ovitaṽilin otamalia ita!”

⁴⁰ Ana taṽena pis pania pialuṽaria, pisape “Mara, nanagane kieta pogos na marena narui, ana ko na pe opatanon re Ntewa poli wa. Ita telu nini, naliṽereena naṽa akila pan ita naga taaga ga, ⁴¹ a e lepas na ita lua, mesmesun ga napiowaena naṽa ita lua tekila, ana e lepas na puna, naga pe kila re nena sur tai poli.”

⁴² Ana pis pa Yesu, piun tania, sape “Yesu, pogos naṽa oim ove ṽarin suṽe owasuṽe ko sina, awis, ve sinema ṽesan in re.”

⁴³ Ana Yesu pisatamea, sape “Nevisaar van ko, legiena ga na ṽane, yoko italua tesike e kieta yo wo.”

Yesu mare

Matiu 27:45-56; Mak 15:33-41; Yoane 19:28-30

⁴⁴ Nanagane pimi tol kolpae narui, a siar e pogos nene mrae tego re si po, kila narui yemalolo kalo make ga yo nene, mon m̃a sanene

pano-o tol mrae telu yepakilavi. ⁴⁵ Ana siraunia, kulmrae naña telan mēke loyuma e Yuma Wa m̄ana Ntewa, naña kilawo yo wa naña pe yo wa pañisi, naga purpa lepas lua. ⁴⁶ Ana e pogos nene, Yesu pio maro sape “Ata, neligan ninuu e lumoma.” Pio sanene narui, ana p̄ere maron kiena yalua marpan top.

⁴⁷ Ana pogos naña yerkawa kiena ne yar na mara lala p̄isu sur la nene, naga pisirlua kia kiena ne Ntewa, sape “!Lelaga nañane, yar nene naga pe yar memes ga naña!” ⁴⁸ A p̄ina la naña apim lele taaga e yo nene, la m̄ena ap̄isu make sur la nene naña akila pa Yesu, pe nasineyeena pan la pañisi. Ana siraunia āpasūpela sina, amial apano amio pupia naloge viowaena, apa si m̄ala uma lala.

⁴⁹ A p̄egas nen yeririna tāpena m̄ena lala asike e pogos nene, la asum̄alu asike laa perina sane, asum̄a ap̄isu make sur lala. Naga nene erau kiena ne Yesu lala amio sira la naña amolue gar Kalele nakonua rui, ataveve m̄a Yesu pano-o pimi tol yo nene, ana la m̄ena ap̄isu marena kiena ne Yesu.

Yosop sin Yesu

Matiu 27:57-61; Mak 15:42-47; Yoane 19:38-42

⁵⁰ Ana yar tai, naga nae pulkumali kiena ne le Yu la naña Arimatea, kiena kia Yosop. Naga pe yerkawa tai na pupia kumali kiena ne le Yu lala gar Yerusalem, pe yar memes tai naña kiena p̄elaga po pañisi. ⁵¹ Naga tai naña sinenan manene sape popon sa nasūpenena kiena ne

Ntewa imi, ana nanua pogos naña apisayu ke asape akila ya ne va Yesu, naga taaga kiena sitomena pe sa re nene poli, naga kilali naña pisaluþar la sape ve akila re viowa vania. ⁵² Ana pogos naña mloge asape Yesu mare rui, naga pa suñal se marana ne Paelat, piun tania sape kilia kus tasnena ne Yesu. ⁵³ Ana Paelat tañan pania, ana pa kuslua tasnena ne Yesu e laktorovia, mliluar e kulmrae, kus pa mligan ruru ñeke loyuma e puluve viu tai naña ate mare ga na wa, pe amliganli re yar tai ñene poli wa.

⁵⁴ Ana legiena na marena kiena ne Yesu nene naga e Praere, sa naña pe legiena na kila ruruen sur lala na Legiena Wa. Ana mrae pito ke narui, lavis ke Legiena Wa siar ne, naga nene e ruru nena e pogos naña mrae pito kovio. ⁵⁵ Ana sira la naña nanua ataveve Yesu siar gar Kalele pimi tol kiena laktorovia, nanagane pogos naña akus tasnena pimi, ataveve sina. Ataveve pimi tol kana yo na nasiniena, ana apisu naña amligan ñeke e puluve.

⁵⁶ Ana apisu pae, aþasuþela apa si uña vena akila ruru ponotaninu lala sa naña ñaþes amio pomat. Atol yo uña, ana Legiena Wa siaria, kila narui pe pogos re si tai pan la naña ava avaia tasnena ne Yesu poli. Ana asuña ga uña sanene, sa naña navisaluaena pisape monar akila e legiena wa.

24

*Puluve koren ga ñeke na
Matiu 28:1-10; Mak 16:1-8; Yoane 20:1-10*

¹ Legiena Wa ðaro pano, ana kana legiena taþena na peni, naga legiena þesa na legiena olua. Ana kolulag kona, sira laþas nene aþar ponotaninu sa naþa pomat amio mñaþes naþa akila ruru pa rui, amiyal apa e puluve naþani vena avaia ruru tasnena ne Yesu. ² Ana pogos naþa apitom atol yo, aþal naþa pupia kilavaru na kilawoen puluve nene, amelilivin lua rui, ³ ana apa loyuþa, amilan naþa tasnena ne Yesu kovio rui.

⁴ Ana asuþal ga asike narui asitom wele ña pano-o amilan naþa yar lua asuþalu asike amio la. Lalua nene mñala kulmrae la miyuwowo naþa miyuwowo ruru nena naapo. ⁵ Ana sira la naþani amaraun naþa akira avisu lalua nene, ana akinai tanon lalua, þarila tau pito e porotano. Ana lalua nene apis pan la, asape “E, sira lala, taþatete alual yar na malena e yo na marena. ⁶ Naga pe mon re si e nini poli, Ntewa pisirlua rui. Amiu asitomyuli sina ya naþa naga pisawal pan amiu, pogos naþa naga sike amio amiu nanua gar Kalele, pe apim re e nini poli wa. ⁷ Naga pisa sanini sape sa naþa naga pe Narin Yeririna, yoko monar ataþan naga va e limana ne li viowa lala, ana yoko asuar naga va e laktorovia, ana siraunia, e kana legiena natelu, yoko suþalu mal sina. Nane visena ke nanene narui naþa naga pisawal þesan pan amiu.”

⁸ Sira la amloge narui, kila la asitoþal si visaarena naþa pisa ruru pan la pisape yoko naga kilia mal sina. ⁹ Ana asitoþal sina, amligan

24:6 Mat 16:21, 17:22,23, 20:18,19; Mak 8:31, 9:31, 10:33,34; Luk 9:22, 18:31-33

yo nene aņasuņela, apa apisu nalologena la lualima taaga pa taaga amio lala taņena lala. Sur la naņa apisu e puluve apisayu meraravan pan la, ¹⁰⁻¹¹ ana la pe amlelaga re e poli, apisu sane sira la nene asun wowe ga.

Ana sira la naņa apisu suri la nene, kiela kia la sanini: Maria nae Maktala, Soana, Maria naņa anenane Semes, amio si sira taņena laņasa.

Pita kiriri pa pisuveve puluve

¹² Ana Pita ga naga taaga sinenan sape visuli sur nene pe lelaga pona peraga, ana naga suņalu, kiriri pano, sinenan sape visuveve yo loyuma e puluve. Pimi tol yo nene, pulu pa loyuma, ana pisu ga kulmrae la sike na, tasnena Yesu kovio. Ana pa si vanua, mial siņasuņe pa uma, suma sitom liluenia sape sur nene na sanape ne, pona kana kinas na ya.

Nalogenia lalua amial apa gar Emeas, apitawe Yesu

¹³ Ana siraunia, e ke ga e legiena nene, la ke ga lalua amligan Yerusalem, sinelan asape ava e narin pulkumali tai, kiena kia Emeas. Mraplepa na vaen e yo nene pe piavi manene re poli, sur sane tasme lualima. ¹⁴ Ana pogos naņa lalua amial apa ke narui, lalua asuma asunyu manene laa sur la naņaņaro pa rui.

¹⁵ Asunlilue ma sanene apano, ana Yesu mial pimi piar la, amialpil amio apano. ¹⁶ Apisu naņa mial ke amio la, apisu sane wolawa ga tai, komin naņa apisu kilaleņe naga.

¹⁷ Ana Yesu piun tan la, pisape “?Kam lua amial ke sanene asunyu liluen ke ya ne?” Ana pogos

naña naga piun sanene, aparurula, asuñalu asu, marala piowa ga sike narui.

¹⁸ Ana lala tai nene, kiena kia Kleoñas, naga pisatañe Yesu, pisape “Yar la mok liu na yo kar ga la ne, asuña amialiali ke Yerusalem e pogos nene, ana pona ko ga taaga manene ga pe omlogeyu li re pupia sur la ne kakate mare ga yo na wa?”

¹⁹ Ana Yesu piun pisape “?Ana ya la ne sane opisa ke ne?”

Apisatañea, asape “Naga nene e lepas kiena ne yar nae Nasaret naña, Yesu. Naga pimi, pe navisawalen tai, kila kile la mok liu na kiena pupia namareraena, mlologo, a pian ruru yeririna la po pañisi, kila sanene sinelan naga keviu, pano tol mēna Ntewa na Mava pisawal sape kekaran naga pañisi. ²⁰ Ana siraunia, nanua ga yemlagi nakoneva, pupia yar wa lala amio kieta nasumonena lala sinela karia, añere ña naga pa e pupia kumali la pano-o amlipērea, asape naga monar mare, ana apa asuar naga pa e laktorovia, mare rui. ²¹ Nanua sumo, kiamimi sitomena sike ga e naga, mesape naga ke narui naña yoko tamalia ita le Israel lala, yoko were plan ita vetan namareraena kiena ne le Rom lala, ana nanagane, sur la punu ga pa piowa si narui. Naga kovio petan imimi, nagane kana legiena telu narui.

²² “Ana sur si tai naña kila imimi memilan manene pañisi, ana mesitomyu kañaran ke na wa. Nagane kolulag pogos naña lakaporo koko-reko yam taaga, kiamimi sira lañas asuñal apa si e puluve naña amligan tasnena ne Yesu mēnea,

apavinin asape avaiia ruru wo. ²³ Ana pogos naña apa aporu e yo nene, apisu naña tasnena pe mon re si e lelen poli, ana akirir si añasuþe la apitom pun imimi, apisawalia, a pe naga re ga nene poli, ana pisawal mēna asape apisu navisi lalua, naña apisawal asape Yesu mal si petan marena rui. ²⁴ Ana imimi lañasa sinelan asape ava avisulia, ana la apito e puluve, apisu sanena naña sira la apisa, pe añna re nena ga.”

²⁵ Nanene narui visena la naña lalua apisa pa Yesu, e pogos naña asumāl ga asike mrapa. Ana naga mēna pis, pisa pan la, pisape “Aulai, kam punu ga kiligamiu la poþe ga. Navisawalena la apisawal sur la nene nakonua rui, ana sanape naña kam na pe amlelaga re poli wa? ²⁶ Pona akilia rui naña yoko Ntewa visirlua kiena Navisaarena ve pupia yerkawa e yomarava nini. Ana kam na pe apisu kilale re nena ga naña Nasiriena Wa lala apisawal rui, asape yoko monar akila Navisaarena loge viowa e sur la ve moki, yoko akila kare naga sumo, þisi na Ntewa kilia visirlua naga, vena tol kiena pupia naurarena.”

²⁷ Ana Yesu sunyu ke pan la sanene, pian la pa re laa sane wa. Naga siar e tus lala kiena ne Mosis, pimi tol tus lala kiena ne navisawalena lala, sumña pisa meraravan ruru ke pan lalua nene sanape naña visena marua la nene sumña kiar ke ga naga, apisayu ke ga naga silaga.

²⁸ Ana asumña amialor si apano, pe piavi re poli apim lavisin pulkumali naña lalua apanon ke ne. Ana lalua apisu sane Yesu sumña mlilu mrapa pa yalen silaga. ²⁹ Ana añareran pania vena sike ne

amio la wa. Apis pania, asape “Nagane na mrae pito ke narui, lavis pintaña ne. Oimi osu re omio imimi sumo wa, om̃eke ga e nini.” Ana Yesu pa m̃eke amio la.

³⁰ Asumña ga tol pogos na kinanena, ana apim lele taaga e yo na kinanena. Ana pogos na lenwoen kinanena, Yesu ga sum̃alu mlarar kala kilaparavi, mlen pa Ntewa pisa potena pania, kawe wowaia pion pan la. ³¹ Ana pogos naña kila sanene, e nena ga e pogos nene sa naña kilamarala pike, apisu kilalea sane naga naña sike amio la ne Yesu ke narui. Ana apisu manene m̃a sanene, a yam plas ga kovio nena ga.

³² Ana lalua asumña apisayuia, asape “Suwala, tepisu kilale re poli e, ana kieta Suñe ga naña. Ana lelaga, naga nena ga, komin naña tesun lilue ke temio mrapa naña naga pisayu meraravan ke visena wa pan ita, kiena visena lala sa ga kapi kekan ke sineta.” ³³ Ana pogos naña akilia sane apisu marana ne Yesu rui, pe amomal re si poli, ana asum̃al ke ga, amial e pupia lepamiema añasuñe apa Yerusalem vena avisawal va lañasa.

Ana aṃalivin la lualima taaga pa taaga naña asike e viorena wa, amio lañasa, ³⁴ ana lalua pe apis re pan la poli wa, ana la apis p̃esan pan lalua, asape “E, pogos naña kamlua apa ga sane, sur tai pimi m̃alivin imimi e nini. Visena nanua sira la apisa, lelaga kemua naña, kieta Suñe sum̃alu molue petan marena rui, Pita ne nanene naga pisu e kilamarana.” ³⁵ Ana la m̃ena lua nañani asikol kiela visena, apisayu sanape naña Yesu m̃alivin la mrapa, a naña la pe apisu

kilale re poli, pano-o tol pogos naña kawewowa ga kilaparavi pan la.

Yesu m̃alivin kiena nalogena lala

Matiu 28:16-20; Mak 16:14-18; Yoane 20:19-23; Yum̃aena 1:6-8

³⁶ Ana pogos naña lalua asum̃a asunyu ke sur la nene pan la wa, amilan ga naña Yesu sum̃al ga sike likan la rui, pisa pan la sape “Sum̃are sike amio amiu.” ³⁷ Yesu pimi pula sanene, kila la am̃ape yermare, ana amarau pañisi.

³⁸ Ana Yesu pisu kilale naña amaraunia, piun tan la sape “!E, vanon ya ne asitom manene laa sanene? Ve sinemiu veve lua re! ³⁹ Avisuli lum̃au amio lau, lelen ya na sike e la? !Avisuia, in ga nini! Aim atolili tasneu la kom̃asa, komin sur sane yermare naga pe puryun re poli a pe kilam̃iu re poli sane tasneu nini.” ⁴⁰ Ana sum̃a pisa ke sanene pan la, kipian limana amio lana pan la vena akilia avisuia.

⁴¹ Ana e pogos nene, nalogena lala kiela sitomena miyum̃ae manene sanene, naña akekara pañisi naña apisu si Yesu, ana asitom p̃ele towe ke ga wa. Ana Yesu pis ke sina ga, piun tan la sape “?E, apran kapi rui?”

⁴² Ana la amlega ika tai, manoa ga na wa, ana amla kinakinas tai pa Yesu, ⁴³ ana mlavia, kan ga e marala.

Yesu pis maro pa kiena nalogena lala

⁴⁴ Ana siraunia, Yesu pis pan la, pisape “Pogos naña nesike nemio amiu nanua sumo ne, in na nepisayu visen la moki na lepas make ga na Siriena Wa pan amiu. In na neñar visena la

e tus lala kiena ne Mosis, e tus lala kiena ne Navisawalena lala, a e tus na Yauena Wa lala, ana nesuũa nepisa ke nesape visena ne la nanene narui, asuũa apisayu in ke ga, a nesape yoko aim ave lelaga e inu ve ve piavi re. In na nepisa sanene pan amiu, ana nagane kam na apisu sur la punu ga nene apim ape lelaga e maramiu p̃isi narui.”

⁴⁵ Ana Yesu pian la pa laa sane, kila kiela sitomen la pa keviu li laa sane loyuũa e kinas nen Siriena Wa la nene, ana sur la punu ga pimi merarava ruru pan la. ⁴⁶ Naga pisa pan la, sape “Nane visen la nene kala kinas ne nanini narui, sane Navisaarena, yoko akila naga loge sinelae vano-o marena, ana e kana legiena natelu, yoko suũalu mal si vetan marena. ⁴⁷ A siraunia e ga e kiena kia, yoko kiena yeririna lala asiar gar Yerusalem, a yoko amolue ava e yomarava wetelu, ava alologon va p̃egas nen yeririna make ga, avisawal van la avisave monar avilopu la narui, ana akilia atol naviewoena e kiela mlamulen viowa lala.

⁴⁸ “Ana kam la naũa apisu sur la punu ga nene e kilamaramiu, kam ke narui ava avisawal va yar taũana lala avisave suri la nene na lelaga. ⁴⁹ Yuũaena nene naga pe yuũaena m̃arera tai naũa m̃arera pãisi, ana yoko neligan nam̃areraena tai e amiu vena iila amiu atauluia. Nam̃areraena nene, navisaarena kiena ne Ata sike naũa yoko naga ligan molue ma e peni vitom kokonia amiu, ana sineun nesape nevisa van amiu, ve aur matan re pulkumali nini wa, ana

monar asuňte ma e nini, vano-o atolia.”

Ntewa ĩerelua si Yesu pa ma e peni

Mak 16:19-20; Yumaena 1:9-11

⁵⁰ Ana pogos naĵa Yesu sinenan sape ligan la, sumon la apito garo e narin pulkumali naĵa Petani. Apitom atol yo nene, asuňte sanene, pano-o Yesu ĩar plan limana metavan la, pisa ruru la. ⁵¹ Suma pisa ruru la ma sanene pano-o, suma siar mligan la palilue narui, pa si metava pa nena ma e peni.

⁵² Ana nalogena lala apisu kiela Suĵe kovio sina petan la, ana akinai tano amlotunia, ana aĵasuĵe la si apa gar Yerusalem, naĵa akekara naĵa akekara. ⁵³ Ana asuňte e nene pano-o, ana silaga e pogos na leniena make ga asuňte apa amieluar ke Ntewa e maana Yuma Wa.

Nane Lologena Wo kiena ne Yesu Kristo naĵa in Luk nesiria, ĩisi e nene narui.

**Lologena Wo Kienane Yesu Kristo Kome
Kewo
The New Testament in the Lewo Language of Epi
Island, Vanuatu
Le Nouveau Testament en Lewo langue de l'île d'Épi
au Vanuatu — Niutestamen long Lewo lanwis, blong
Epi Aelan, Vanuatu**

copyright © 2016 Wycliffe Bible Translators, Inc.

Language: Lewo

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 21 Feb 2024 from source files dated 31 Aug 2023

ee028e1c-7e53-571d-8041-681daaf580e8